

# Ki Kam Ki Apostol

## U Lukas U La Thoh Sa Kawei Pat Ka Kitab

**1** <sup>1</sup>Ha u Thiofilos u para baieid eh,  
Ka kitab banyngkong kaba nga la thoh shaphang ki jingleh bad ki jinghikai U Jisu naduh basdang <sup>2</sup>haduh kata ka sngi ba la rong noh ia u sha bneng. Shuwa ba un leit noh, u la kren ha ki apostol kiba u la jied. Bad da ka jingiarap U Mynsiem Bakhuid, u la iathuh ha ki ia kaei kaba ki dei ban leh. <sup>3</sup>Kane ka la long hadien ka jingiap jong u, hynrei u la pynpaw ba u la mihpat ha kiba bun rukom. Ki apostol ki la iohi ia U Jisu bunsien ha ki sawpew sngi naduh ba u la mihpat na kiba iap. Bad u da iathuh ruh ha ki shaphang ka hima U Blei. <sup>4</sup>Ha kawei ka por katba U Jisu u dang iabam lang bad ki, u la ong ia ki ba kin ym mih noh na Jerusalem. U la ong, “Ap haduh ba phin da iohpdang ia ka jingkular U Kpa. To kynmaw, nga la iathuh ia kane ha phi mynshuwa. <sup>5</sup>U Ioannis shisha u la pynbaptis da ka um, hynrei sa khyndiat sngi nangne yn sa pynbaptis ia phi da U Mynsiem Bakhuid.”

### Ka Jingkiew Noh U Jisu Sha Bneng

<sup>6</sup>Ki apostol kiba la iadon lang ha kajuh ka jaka ki la kylli ia U Jisu, “Trai, hato kane ka dei ka por ba men pynioh pat ia ka hima ha ki Israel?”

<sup>7</sup>U Jisu u la ong ha ki, “Tang U Kpa uba don ia ka iktiar ban tip ia ka por bad ka ia ba la buh, kam dei ia phi ban tip ia kita.

<sup>8</sup>Hynrei U Mynsiem Bakhuid un wan ha phi bad un pynkupbor ia phi. Phin sa long ki sakti jong nga bad phin phla ha ki brier baroh shaphang jong nga ha Jerusalem, ha Judia, ha Samaria bad kylleng ki bynta jong ka pyrthei.”

<sup>9</sup>Hadien ba U Jisu u la kren ia kane, la rong noh ia u sha bneng. Katba ki dang iakhmih, te u lyoh u la kah ia u katba kim lah shuh ban iohi. <sup>10</sup>Ki la shu khmih lyngngoh sah sha suiñbneng bad pyrkhath shaei u la leit. Kynsan la paw hangta ar ngut ki rangbah kiba riam lieh, ki da ieng hajan jong ki. <sup>11</sup>Ki la ong ruh, “Ko nong Galilaia, balei phi ieng ban khmih lyngngoh sha suiñbneng? Phi la iohi ba la rong noh ia U Jisu sha bneng. Une ujuh U Jisu un sa wan pat ha kajuh ka rukom kumba phi iohi ia u ba u leit.”

## Ka Jingpynkyntang Apostol Ia U Matthias

<sup>12</sup>Te hadien kata ki apostol ki la leit phai pat sha Jerusalem na u lum ki Olib. Une u lum u jngai kumba shiteng mer<sup>a</sup> na Jerusalem. <sup>13</sup>Haba ki la rung sha ka nongbah, ki la kiew sha ka kamra kaba haneng ha kaba ki la ia shong. Kine ki dei kiba la iadon lang hangta: U Petros, u Ioannis, u Jakob, u Andriw, u Philip, u Thomas, u Bartholomai, u Mathaios, u Jakob u khun u Alphaios, u Simon bashitrem bad u Juda u khun u Jakob.

<sup>14</sup>Te ki apostol ki la don lang ha kajuh ka jaka. Bad ki la iainei skhem ruh ban duwai da kawei ka jingmut. La don lang ruh hangta ki kynthei, ka Mari ka kmie U Jisu bad ki para jong u de.

<sup>15</sup>Hadien khyndiat sngi la don ka jingia kynduh lang jong ki parabangeit bad ki la don kumba shispah arpew ngut baroh. U Petros u la ieng hangta bad u la ong, <sup>16-17</sup>“Ko ki hynmen bad ki para, kumba la thoh, U Mynsiem Bakhuid u la kren lyngba u Dabid shaphang u Judas, uta uba la ju shakri lang bad ngi ha kane ka kynthun ba un sa ialam bad aiti noh ban kem ia U Jisu.”

<sup>18</sup>La siew ia u Judas ban leh ia kane ka kam. Bad da kata la thied ia kawei ka lyngkha. Hynrei ma u, u la pynnoh khongpong ialade na jrong bad ka kpoh jong u ka la pait bad ki snier ki la mih shabar. <sup>19</sup>Baroh kiba ha Jerusalem ki tip bha ia kata. Na kata ka daw la sin kyrteng ia kata ka lyngkha Akeldama, kaba mut “ka lyngkha ka snam.”

<sup>20</sup>U Petros u la ong, “Ha ka kitab jong ki Salm, la thoh shaphang u Judas:

‘Wat ai ba ki brier kin leit sha kata ka jaka;  
Wat ai ruh ban don ba sah brier hangta.’ *Salm 69:25*

Bad la thoh ruh:

‘Ai ba uwei pat un shimti ia ka jaka jong u.’ *Salm 109:8*

<sup>a</sup> **1:12 shiteng mer ka mut,** “Kat ka Jingiaid lynti ha ka sngi Sabbaton.”

21-22“Ka dei mynta ba uwei pat un mih bujli ban sakhi ia ka jingmihpat U Jisu. U dei ban long na kane ka kynhun mynba U Trai Jisu u dang don lem bad ngi. Uba la ju iadon lang ruh naduh ki por ba u Ioannis u la pynbaptis ia ki brierw haduh kata ka sngi ba la rong noh ia U Jisu sha bneng.”

23Te ki la pynieng ia ki ar ngut ki brierw hakmat jong kata ka kynhun. Uwei uba kyrnteng u Joseph Barsabbas ia uba la khot ruh u Justos. Uwei pat uba kyrnteng u Matthias. 24-25Kumta ki la ia duwai, “Trai, me uba ithuh ia ki jingmut jong u brierw. Pyni ha ngi uo na kine uba me la jied ban shimti ia ka jaka kum u apostol ha kaba u Judas u la hap noh bad leit sha kaba kut jong ul” 26Kumta ki la pynnoh ia ka jingiathong ban jied ia uwei na ki, ka jingiathong te ka la hap ha u Matthias. Kumta ki la pynskhem apostol ia u ryngkat bad kita ki khatwei ngut.

### Ka Jingwan U Mynsiem Bakhuid

2 Haba la poi ka sngi Pentekos, ki baroh ki la iadon lang ha kawei ka jaka. 2Kynsan kynsan la wan ka jingsawa na bneng. Kum ka lyer kaba jur kaba beh kyrthep. Kane ka jingsawa ka la pyndap ia kata ka iing ha kaba ki la ia shong. 3Bad ki la iohi kum ki kynja thylliej ding kiba pait pnat ba ki da hap ha kita kiba iadon ha kata ka jaka. 4Te la pyndap ia ki baroh da U Mynsiem Bakhuid bad ki la sdang ban kren da ki kwei pat ki kyntien katba kum ka jingpynshait bor U Mynsiem Bakhuid.

5Te ha kata ka por la don ha Jerusalem ki Jiw ba riewblei kiba na kiwei pat ki ri jong ka pyrthei. 6U paidbah ba bun ruh u la ialum hangta haba ki la iohsngew ia ka jingsawa bajam. Ki da sngewphylla ruh namar ba uwei-pa-uwei u la iohsngew ba ki apostol ki kren ha ka kyntien jong ki.

7Ki baroh ki da sngewkyndit eh bad kim sngewlah mutdur ba ki apostol ki lah ban leh ia kane. Te ki la ia ong ruh, “Hakhmih! Kine ki brierw kim dei ki nong Galilaia. 8Hynrei ngi la iohsngew ba ki iakren ha ki ktien jong ngi. Kumno kata ka lah ban long? Ng i baroh ngi dei na ki ri bapher bapher: 9Ki Parthia, ki Mid, ki Elam, kiba na Mesopotamia, kiba na Judia, kiba na Kappadokia, kiba na Pontos, Asia, 10kiba na Phrygia, na Pamphilia, ki Ijipt, kiba na ki bynta jong ka Libia kiba marjan bad ka nongbah Kyrimi, ki Rom, 11ki Krit bad ki Arab de. Don na ngi kiba dei ki Jiw, kiwei pat kiba la kylla niam bad mane Blei

kum ki Jiw. Ng i baroh ngi dei na kine ki ri bapher bapher, hynrei ngi la iohsngew ba ki iakren ha ki ktien jong ngi hi! Ki da pynkraw ia ki kam phylla jong U Blei.”

12Baroh te ki la kyndit bad sngewlyngngoh. Bad ki la iakylli paralok hi, “Kaei kane?” 13Hynrei kiwei pat ki la iarkhie bein ia ki apostol bad ki la kren kynthah ia ki ba ki la ia buaid waiin.

### Ka Jingialap U Petros

14Hadien kata u Petros u la ieng joit lem bad ki khatwei ngut ki apostol. U la kren jam bad u la ong, “Ko ki rangbah Jiw bad ma phi baroh kiba ha Jerusalem, to shahshkhor bha ia nga, ngan iathuh ha phi ia ka jingshisha. 15Kine ki brierw kim shym la buaid waiin kumba phi ia tharai; namar ka dang long khyndai baje mynstep. 16Hynrei kane kaba phi iohi ba ka jia mynta ka dei ba la kren da u nongiathuhlypa Joel. U da ong:

17 ‘U Blei u ong: Ha ki sngi bakhathuh Ngan theh noh ia U Mynsiem jong nga halor ki bynriew baroh.

Ki khun shynrang bad ki khun kynthei jong phi kin iathuhlypa. Ki samla kin iohi ki jingithuhpaw. Ki tymmen kin ioh ia ki jingphohsniew bakyrpang

18 Ha kita ki sngi ngan theh noh ia U Mynsiem jong nga halor ki shakri, shynrang bad kynthei bad kin iathuhlypa.

19 Ngan pyni ia ki jingphylla sha suinbneng. Bad ki dak khyllah ha ka khyndew. Ka snam, ka ding bad u lyoh tdem.

20 Ia ka sngi yn pyndum, bad u bna i un kylla saw kum ka snam.

Hadien kata, ka sngi bakhraw bad ka burom jong U Trai kan sa wan.

21 Bad baroh kita kiba khot kyrpad ia U Trai yn pynim ia ki.’ Joel 2:28-32

22“Ko ki rangbah Israel, to shahshkhor ia kine ki kyntien: U Jisu na Nasaret u brierw uba kyrpang ia kaba U Blei u la pyni shynna sha phi, u da pynshisha ruh lyngba ki kambah, ki jingphylla bad ki dak khyllah kiba u la leh lyngba U Jisu, ha kaba ma phi hi ruh phim lah ban len ia ka jingshisha. 23Bad da ka jingi arap ki brierw ba bymman phi la aiti ban pyniap noh ia U Jisu da kaba sahnarphna. Hynrei kane baroh ka la jia long kat kum ka jingthmu lypa jong U Blei na bymjukut. 24U Jisu u la mad ia ka jingshitom jong ka jingi ap, hynrei U Blei

u la pyllait ia u bad u la pynmihpat ia u.  
Ka jingiap hi kam lah ban bat sah ia u. <sup>25</sup>U  
Dabid u la kren kumne shaphang jong u:

- 'Nga la iohi ia U Trai ha shuwa jong  
nga borabor;  
U don ha ka liang kamon jong nga  
ban ri bad sumar ia nga.  
<sup>26</sup> Kumta ka mynsiem jong nga ka la  
kmen,  
bad ki kyntien ba nga kren ki dei ki  
kyntien jong ka jingkmn.  
Hooid, ka doh jong nga kan shong  
ha ka jingkyrmen,  
<sup>27</sup> namar men ym iehnoh ia nga ha ka  
jaka ki riawiap.  
Men ym shah ba U Bahok jong  
me un shem ia kaba pyut ha ka  
jingtep.  
<sup>28</sup> Me la hikai ia nga kumno ban im.  
Men wan hajan jong nga ban ai ha  
nga ia ka jingkmn bakhrw.'

*Salm 16:8-11*

<sup>29</sup>"Ko para, nga iathuh ha phi ia kaba  
shisha shaphang u Dabid u kpa tymmen  
jong ngi. U la iap noh, la tep ia u bad ka  
jingtep jong u ka dang don haduh kine ki  
sngi mynta. <sup>30</sup>U dei u nongiathuhlypa uba  
la tip ia kaei ba la kren da U Blei. Kumba U  
Blei u la kular ba na u symbai jong u, un sa  
mih uwei u ban sa shong ha ka khet jong  
u kum u syiem. <sup>31</sup>U Dabid u la tip ba kane  
kan sa jia. Kumta u la kren lypa shaphang  
uta u syiem u ban sa wan:

'Ym shym la iehnoh ia u ha ka jaka ki  
riewiap.  
Ka met jong u kam shym la shem ia  
kaba pyut ha jingtep.'

U Dabid u la iathuh shaphang U Mesaiah  
u ban sa mihpat na ka jingiap. <sup>32</sup>U Jisu u  
dei uta ia uba U Blei u la pynmihpat na  
ka jingiap. Ngi baroh ngi long ki sakhii ia  
kane. <sup>33</sup>La rong noh ia U Jisu sha bneng  
bad mynta u shong sha ka liang kamon  
U Blei. U Kpa u la ai ha u ia U Mynsiem  
Bakhuid ka jingkular. Kumta U Jisu u la  
thoh noh ia U Mynsiem sha ngi kumba phi  
la iohi bad iohsngew ha kane ka sngi. <sup>34</sup>U  
Dabid un shym kren ei ei shaphang ialade  
ba yn rong noh ia u sha bneng. Namar u hi  
dalade u ong,

'U Trai U Blei u la kren ha U Trai jong  
nga:  
To shong sha ka liang kamon jong nga,

<sup>35</sup> tad ynda ngan buh ia ki nongshun  
jongme hapoh ka bor synshar  
jong me. *Salm 110:1*

<sup>36</sup>"Kumta baroh ha Israel kin ioh tip ia  
kane: U Blei u la pynlong ia U Jisu U Trai bad  
U Mesaiah. Ia uba phi la sahnarphna ma  
phi!" <sup>37</sup>Haba uta u paidbah u la iohsngew  
ia kane la pynkynduh shikattei eh ia ki.  
Bad ki la kylli ia u Petros bad ia kiwei pat ki  
apostol, "Ko para, ngin leh kumno?"  
<sup>38</sup>U Petros u la ong ia ki, "To kylla kaba  
mut bad ba yn ioh pynbaptis ia uwei-pa-  
uwei na phi ha ka kyrteung U Jisu Khrhist. Te  
kumta U Blei un mab noh ia ki pop jong  
phi bad phin iohpdjang ruh ia ka jingai  
U Mynsiem Bakhuid. <sup>39</sup>Namar kane ka  
jingkular ka long ia phi, ia ki khun jong  
phi bad ia kita baroh kiba sha jngai ia kiba  
U Trai U Blei un khot ha u."

<sup>40</sup>U Petros u la maham ruh ia ki da  
kiba bun ki kyntien; u la kyntu ia ki, "To  
pynim ialade na kane ka pateng bynriew  
kaba bymman!" <sup>41</sup>Ia kita kiba la pdiang ia  
ka jingialap u Petros la pynbaptis ia ki. Te  
ha kata ka sngi kumba lai hajar ngut la  
pyniasoh sha ka kynhun ki bangeit.

### Ki Parabangeit Ki Iasam Lang

<sup>42</sup>Ki parabangeit ki la pynlut por ban  
shahshkor ia ki jinghikai jong ki apostol.  
Ki da iasam lang ruh sha kiwei kat kaba  
ki don. Ki da iabam lang bad ia duwai  
lang. <sup>43</sup>Te la leh ia ki jingphylla bad ki  
dak khyllah lyngba ki apostol bad ka  
jingsheptieng burom ia U Blei ka la long  
ha uwei-pa-uwei na ki. <sup>44</sup>Baroh ki bangeit  
ki la iadon lang shijaka bad ki la iasam  
lang kat kaba ki don. <sup>45</sup>Ki la die lut ia ki  
jaka bad ia ki jingdon jingem jong ki bad  
ki da sam lang ruh sha kito baroh kiba  
duk bad kiba kyrduh. <sup>46</sup>Te ki bangeit da  
kawei ka jingmut, ki ju pynlut por ban  
iakynduh lang ha phyllaw jong ka Templ.  
Ha ki iing ruh ki da iasam bad iabam lang  
ia ki jingbam da ka dohnud kaba kmen.  
<sup>47</sup>Ki bangeit ki im ban iaroh ia U Blei bad  
la burom ruh ia ki da ki briew baroh. Te  
ha la ka sngi ki briew ki la nangwan sha  
ka jingpynim bad U Trai u la nang iai  
pyniasoh ia kiba la ngeit sha ka balang.

### U Petros U Pynkhiah Ia U Briew Uba Dkoh

**3** <sup>1</sup>Ha kawei ka sngi katba u Petros bad  
u Ioannis ki dang ialeit sha ka Templ.  
Ka la long lai baje noh phai sngi, kaba dei  
ruh ka por jingduwai. <sup>2</sup>Katba ki dang ia

rung shapoh, la don hangta u briew uba dkoh naduh ba dang kha. Bad la ju rah ia u da ki paralok bad buh ia u ha kawei na ki khyrdop ka Templ ia kaba la ju khot ka Khyrdop Baitynnad. Hangta u ju khrong na man ki briew kiba rung shapoh ka Templ. <sup>3</sup>Ha kata ka sngi u la iohi ia u Petros bad u Ioannis ba kin sa rung sha ka Templ. Kumta u la kyrpad ban ioh ei ei na ki ruh.

<sup>4</sup>U Petros bad u Ioannis ki la peit sha uta uba dkoh bad ki la ong, "To khmih sha ngi!"

<sup>5</sup>U ruh u la khmih sha ki da ka jingkyrmen ban iohpdiang ei ei. <sup>6</sup>Hynrei u Petros u la ong, "Ka ksiar bad ka rupa ngam don, hynrei nga don kawei pat kaba nga lah ban ai ia me. Ha ka kyrteung U Jisu Khrist uba na Nasaret ieng joit bad ia!"

<sup>7</sup>Kumta u Petros u la shim ia ka kti kamon jong uta uba dkoh bad u la pynieng ia u. Hangta hi ki kjat jong u ki la ioh bor.

<sup>8</sup>U la sdang ban kynthih bad ban ieng skhem ha la ki kjat, haba u la pyrshang ban ia, u la rung lang bad ki shapoh ka Templ. U da ia id u da kynthih bad iaroh ruh ia U Blei. <sup>9-10</sup>Te ki briew baroh kiba don hangta ki la ithuh bad tip bha ba une u dei uba dkoh uba ju shong khrong ha ka Khyrdop Baitynnad. Mynta haba ki la iohi ia une ujuh u briew ba u da ia id bad iaroh ia U Blei ki la sngewphylla eh bad kim lah ban shemphang ia kaei kaba la jia.

### U Petros U La Kren Sha Ki Briew

<sup>11</sup>Une u briew u la bat ia u Petros bad u Ioannis. Te ki briew kiba la sngewphylla eh ia kata ka jingjia bran bran ki la mareh sha kata ka Baranda u Solomon ha kaba la don u Petros bad u Ioannis.

<sup>12</sup>Haba u Petros u la iohi ia kane, u la ong sha kita ki briew, "Ko rangbah Jiw, balei phi peit lyngngoh kumne? Phi peit sha ngi la kumba da ka iktiar jong ngi hi la pyniaid ia une u briew. Phi tharai ba da ka bor jong ngi, ngi lah ban leh kat ia kane?" <sup>13</sup>Em, U Blei kei uba la leh ia kane! U Blei jong u Abraham, U Blei u Isaak bad U Blei u Jakob. U Blei ki kpa tyimmen jong ngi u la pyndonburom ia U Jisu, U Khun jong u ia uba phi la aiti ban pyniap noh ia u. Wat haba u Pilat u la pyrshang ban pyllait noh ia u, hynrei phi phim shy m la mon. <sup>14</sup>U Jisu u la long uba khlem pop, hynrei phi la kyntait ia u bad phi la pynbor pynban ia u Pilat ban pyllait noh ia u nongpyniap briew ha ka jaka U Jisu. <sup>15</sup>Phi la pyniap noh ia uta uba ai ia ka jingim! Hynrei U Blei u la pynmihpat ia u, ha kaba ngi baroh ngi long

ki sakhi ia kata. Naba ngi la iohi ia kiei kiei baroh da la ki jong ki khmat.

<sup>16</sup>"Une u briew ba dkoh u la iohkhiah namar ka jingngeit jong ngi ha U Jisu. Dei da ka bor U Jisu bad ka jingngeit jong u hi kaba la pynkhiah khran ia u kumba phi la tip bad iohi ia kaba la jia baroh!"

<sup>17</sup>"Ko para, nga sngewthuh kaei kaba phi la leh ia U Jisu ka long namar ka jingbymtip, kumba ki nongialam jong phi hi ruh kim tip. <sup>18</sup>Hynrei U Blei lyngba ki nongiathuhlypa u la dep kren ba kine kiei kiei baroh kin sa jia bad ba ka dei ia U Mesaiah ban shahshitom bad ban iap ruh. <sup>19</sup>Namar kata to kylla kaba mut bad wan phai khmat noh sha U Blei, ba yn ioh mab noh ia ki pop jong phi. <sup>20</sup>Te U Trai un wallam ha phi ia ki aiom jong ka jingjahthait ba kynja mynsiem. Un phah ruh sha phi ia U Jisu. Uta ia uba la jied ban long U Mesaiah.

<sup>21</sup>Hynrei ka dei ia U Jisu ban shong ha bneng tad haduh kata ka aiom ka jingpynthymmai ia kiei kiei baroh. U Blei la kham slem u la kren shaphang kata ka aiom lyngba ki nongiathuhlypa bakhuid jong u. <sup>22</sup>U Moses u la ong, 'U Trai U Blei un sei ia u nongiathuhlypa uba kum ma nga napdeng ki briew jong phi hi. Ka dei ia phi ban shahshkor ia u. <sup>23</sup>Bad uno uno uba kyntait ban kohnguh ia u ta u nongiathuhlypa un iap noh kei bad yn pyniakhlad noh ia u na ki briew jong U Blei.

<sup>24</sup>"Naduh u Samuel, haduh ki nongiathuhlypa kiba mih hadien jong u, ki la iathuh shaphang kine ki sngi. <sup>25</sup>Phi dei ki khun ki ksiew kiba hiar pateng na kita ki nongiathuhlypa kiba la pdiang ia ka jutang kaba U Blei u la iaeh bad ki kpa jong phi. Mynba U Blei u la kren ha u Abraham, 'Ba yn kyrkhu ia baroh ki jaitbynriew ka pyrthei lyngba u symbai jong me'. <sup>26</sup>U Blei u la phah ia U Khun jong u, U Jisu. Nyngkong eh sha phi, khnang ban kyrkhu ia phi da kaba pynlong ia uwei-pa-uwei ban phai noh na ki lynti bymman."

### Ki Apostol Hakhmat Ka Dorbar Jiw

**4**<sup>1</sup>Katba u Petros bad u Ioannis ki dang ia kren ha uta u paidbah, la wan na ki nongialam Jiw ryngkat ki lyngdoh, u kapten jong ki nongap pahara ka Templ bad ki Saddusi. <sup>2</sup>Ki da sngew wit eh ia u Petros bad u Ioannis namar ki jinghikai jong ki ia uta u paidbah. Namar ki la ialap shaphang U Jisu uba la mihpat bad ia ka jingmihpat jong ki briew na kiba iap. <sup>3</sup>Ki nongialam Jiw ki la kem bad set byndi

noh ia u Petros bad ia u Ioannis. Namar ka la miet lypa, kumta la set ia ki haduh mynstep. <sup>4</sup>Hynrei bun na kita kiba la iohsngew ia ki jinghikai ki apostol ki la ngeit bad la don kumba san hajar kiba la pyniasoh ialade sha ka balang.

<sup>5</sup>Ha ka sngi kaba bud, ki nongsynshar Jiw, ki nongialam Jiw ba rangbah bad ki nonghikai ka hukum ki la iakynduh lang ha Jerusalem. <sup>6</sup>U Annas u rangbah lyngdoh, u Kaiaphas, u Ioannis bad u Aleksander bad baroh kiba na ka longiing u rangbah lyngdoh ki la iadon lang hangta. <sup>7</sup>Te ki la pynieng ia u Petros bad ia u Ioannis hakhmat jong ki. Bad ki la iai kylli ia ki, "Kumno phi la pynkhiah ia une uba dkoh? Bad da ka bor aiu ba phi la leh ia kane?"

<sup>8</sup>Te u Petros uba la dap da U Mynsiem Bakhuid u la ong ha ki, "Phi ki nongsynshar jong u paitlang bad ki nongialam ba rangbah, <sup>9</sup>Phi kylli na ngi shaphang kaei kaba la jia bad une u briew uba dkoh? Bad da ka bor aiu ba la pynkhiah ia u? <sup>10</sup>To tip namar kata phi baroh bad u paitlang Israel, ba da ka kyrteng U Jisu Khrist uba na Nasaret ia uba phi la sahnarphna bad ia uba U Blei u la pynmihpat ia u na kiba iap, la pynkhiah ia une u briew uba dkoh bad u la lah ban ieng hakhmat jong phi dei tang namar ka bor ka kyrteng U Jisu! <sup>11</sup>U Jisu u long

'U maw ia uba ki nongtei ki la kyntait, hynrei une u maw u la kylla long u mawdong.' *Salm 118:22*

<sup>12</sup>Tang U Jisu uba lah ban pynim ia ki briew. Naba ym don kawei pat ka kyrteng ha pyrthei ia kaba la ai ba yn pynim ia ngi, hynrei tang lyngba jong u!"

<sup>13</sup>Ki nongialam Jiw ki tip bha ba u Petros bad u Ioannis ki long kiba khlem jinghikai bad kiba khlem jingngang jingstad, hynrei ka la pynlyngngoh ban iohi ia ka jingshlur jong ki ban kren. Kawei pat kaba ki tip ka long ba ki dei kiba la ju don lang bad U Jisu. <sup>14</sup>Haba ki la iohi ia uta uba dkoh uba la iohkhiah bad ba u da ieng ha syndah ki apostol, kumta kim don ei ei shuh ban kren pyrshah ia ki apostol.

<sup>15</sup>Hadien kata ki nongialam Jiw ki la pynmih noh shuwa ia ki na ka dorbar bad ki la iasylla para ma ki, <sup>16</sup>Ki da ong "Aiu ngin leh bad kine ki briew? namar baroh kiba ha Jerusalem ki la iohi ia kane ka kambah ba la leh kum ka dak na U Blei kaba ngim lah shuh ban buhrieh. <sup>17</sup>Hynrei khnang ba kane ka khubor kan ym

saphriang shuh hapdeng ki briew, to ngin byrngem pyntieng ia ki ba kim dei shuh ban dang ialap ia kane ka kyrteng hano hano ruh."

<sup>18</sup>Kumta ki nongialam Jiw ki la khot biang ia u Petros bad ia u Ioannis shapoh. Bad ki la maham ia ki apostol ba kim bit shuh ban dang ialap lane hikai ha ka kyrteng U Jisu. <sup>19</sup>Hynrei u Petros bad u Ioannis ki la jubab sha ki, "Hato phi pyrkhata ba kata ka long kaba dei hakhmat jong U Blei? Hato ngin kohnguh ia phi ne ia U Blei? <sup>20</sup>Ngim lah ban sngapjar noh khlem da iathuh sha ki briew ia kiei kiei baroh kiba ngi la iohi bad iohsngew."

<sup>21-22</sup>Ki nongialam Jiw kim ioh daw ban pynshitom ia ki apostol namar uta u paidbah ba bun uba la iaroh ia ki kam phylla jong U Blei. Kane ka kambah ka long shisha ka dak na U Blei, namar uta u briew uba la iohkhiah u la long palat sawpnew snem. Kumta haba ki Nongialam Jiw ki la maham tynggeh ia ki apostol, ki la pyllait noh ia ki.

### U Petros Bad U Ioannis Ki Wan Phai Pat Sha Ki Parabangeit

<sup>23</sup>U Petros bad u Ioannis ynda ki la mih noh na kata ka dorbar jong ki nongialam Jiw, ki la leit phai pat sha la ka kynhun. Bad ki la iathuh ia baroh ba la kren ha ki da ki lyngdoh bad ki nongialam Jiw ba rangbah. <sup>24</sup>Te haba ki parabangeit ki la iohsngew ia kane, ki la ia duwai sha U Blei da kawei ka jingmut. Ki la ia ong, "Ah Trai Kynrad, me uba la thaw ia ka bneng bad ka khyndew, ia ka duriaw bad ia kiei kiei baroh kiba don ha ka pyrthei. <sup>25</sup>U Dabid u kpa tymmen jong ngi uba long ruh u shakri jong me, da ka jingaibor U Mynsiem Bakhuid u la thoh ia kine ki kyntien:

'Balei ba ki jaitbynriew ki ia pyrta shla? Balei ba u paitlang u pyrkhata ia kaba thala?'

<sup>26</sup>'Ki syiem jong ka pyrthei ki pynkhreh ialade ban ialeh, Bad ki nongsynshar ki ialum lang pyrshah ia U Trai bad pyrshah ia U Mesaiah jong u.' *Salm 2:1-2*

<sup>27</sup>Namar kumba ka la jia mynba u Herod, u Pontios Pilat, kiwei pat ki jaitbynriew lem bad u paitlang Israel baroh haba ki la ialum lang ha Jerusalem pyrshah ia U Jisu, u shakri bakhuid bad uba la sleh jong me. <sup>28</sup>Kine ki briew haba

ki la iawan lang ban ialeh ia U Jisu ki la pyndep noh ia kata ka jingthmu jong me.<sup>29</sup>Mynta, ah Trai, to sngap ia ka jingbyrngem byrsit jong ki, namar ngi long ki shakri jong me. Aibor ia ngi ban kren ia ka ktien jong me da ka jingshlur khlem ka jingsheptieng.<sup>30</sup>Da kaba men pynpaw noh ia ka bor ban pynkhiah ia kiba pang, ban leh ruh ia ki kambah bad ki dak khyllah da ka iktiar ka kyrteng U Jisu, u shakri bakhuid jong me.”

<sup>31</sup>Hadien ba ki la lah duwai te la pynkhyntiuh ia kata ka jaka ha kaba ki la iaseng. Te la pyndap ia ki baroh da U Mynsiem Bakhuid bad ki la iai bteng ban ialap ia ka ktien U Blei khlem jingsheptieng.

### Ki Bangeit Ki Iasam Lang ia Kiei Kiei Baroh

<sup>32</sup>Te kita baroh kiba la ngeit ki la long ha kawei ka jingmut. Ym don napedng jong ki u ban kam trai ia la ki jingdon jingem, hynrei ki da iasam lang sha baroh kat kaba ki don.<sup>33</sup>Bad da ka bor bakhraw, ki apostol ki la phla ia ka jingmihpat U Trai Jisu na kiba iap. Bad U Blei u la kyrkhu eh ia baroh ki bangeit.<sup>34-35</sup>Ym don uwei ruh uba kyrduh hapdeng jong ki, namar kat kiba long trai ia ki lyngkha lane ki iing ki la die noh ia ki. Ki la wanlam ruh ia kata baroh kaba ki la ioh ha ki apostol. Bad kumta la sam sha uwei-pa-uwei baroh kat kum ka jingdonkam jong ki.

<sup>36</sup>Uwei u brier uba kyrteng u Joseph ia uba la sin Barnabas da ki apostol kaba mut, “U nongai mynsiem ia kiwei pat,” u dei u Lebi u nong Kypros.<sup>37</sup>Une ruh u la die noh ia la ka lyngkha bad u la wallam ia kaba u la ioh sha ki apostol.

### U Ananias Bad Ka Sapphira

**5**<sup>1</sup>La don ruh uwei u brier uba kyrteng u Ananias lem bad ka tnga jong u ka Sapphira, uba la die noh shilyngkhot na ka lyngkha jong u.<sup>2</sup>Une u la wanrah ha ki apostol tang shibynta na kata kaba u la ioh na kaba die. Hynrei shibynta u la buhriehnoh na ka bynta ialade bad ka tnga jong u ruh ka la ia suhbuit lang ha kane ka kam.

<sup>3</sup>Hynrei u Petros u la ong, “Ko Ananias balei me shah ba u Soitan un bsut ha me da ki buit bymman? Me la buhriehnoh halade shibynta na kata ka pisa bad me da shukor ruh ia U Mynsiem Bakhuid!<sup>4</sup>Hato shuwa ba men die ia ka lyngkha kam dei ka jong me hi? Wat hadien ba me la die ruh kam shym long ha ka bor jong me ban pyndonkam ia

ka pisa katba me mon. Hynrei kumno ba me la nud ban leh ia kat kane? Me la shukor ia U Blei, ym ia ngi!”

<sup>5-6</sup>Haba u Ananias u la iohsngew ia kine ki kyntien, u la kyllon khram ha madan bad u la dkut mynsiem. Te katto katne na ki samla ki la shim bad sop spaif ia ka met jong u bad rah noh shabar ia ka ban tep. Te ka jingsheptieng ka la ngat ha kita baroh kiba la iohsngew ia kane.

<sup>7</sup>Hadien kumba lai kynta ei ei ka tnga jong u, ka Sapphira ka la wan rung shapoh bad kam shym tip ia kaei kaba la jia ia u tnga jong ka.<sup>8</sup>U Petros u la kylli ia ka, “To iathuh ia nga katno ka pisa pha la ioh na kaba die ia ka lyngkha. Hato ka la long tang katne?”

Ka Sapphira ka la jubab, “Hoooid, ka la long tang katne ka dor jong kata ka lyngkha.”

<sup>9</sup>U Petros u la ong ia ka, “Balei ba pha la ia suhbuit lang bad la u tnga ban tynjuh ia U Mynsiem jong U Trai? Ha sngap! Pha iohsngew ia kita ki brier ha ka jingkhong? Ki dei kiba dang shu wan tep ia u tnga jong pha bad kin rah ruh kumjuh ia ka met jong pha shabar.”<sup>10</sup>Ha kata hi ka khyllipmat ka Sapphira ka la kyllon khram ha ki kjat jong u bad ka la dkut mynsiem. Kita ki samla kiba dang iawan ki la iohi ia ka ba ka la iap, kumta ki la rah noh ia ka bad tep ha syndah u tnga jong ka.<sup>11</sup>Te ka jingsheptieng bakhraw ka la ngat ha ka balang baroh kawei bad ha kita baroh kiba la bna ia kane ka jingjia.

### Ki Dak Na U Blei

<sup>12</sup>Te da ka borbah, ki apostol ki la leh ia ki dak khyllah bad ki kambah hapdeng uta u paidbah. Baroh te da kawei ka jingmut ki la iadon lang ha ka baranda u Solomon.<sup>13</sup>Kiwei pat kim shym la nud ban ia iaid lang bad ki apostol, hynrei baroh pat ki la iakren babha shaphang jong ki.<sup>14</sup>Bun ruh ki la ngeit ha U Trai bad ha la ka sngi la nang pyniasoh ia ki rangbah shynrang bad kynthei sha ka balang.<sup>15</sup>Ki brier ki ju bah ruh ia ki ba pang ha ki palong bad ki shyllah bad pynthiah ruh ia ki ha ki surok da ka jingkhmih lynti ba ka syrngiew u Petros kan shu shat ha ki katba u iaid lyngba nangta.<sup>16</sup>U paidbah ba bun u la tuid na ki shngong baroh sawdong ka Jerusalem. Ki da wallam ruh ia kiba pang bad ia kiba la ban shitom da ki mynsiem bymman. Te la pynkhiah phar ia ki baroh.

### La Kem Noh Ia Ki Apostol

<sup>17</sup>U rangbah lyngdoh lem bad ki nongbud jong u, ryngkat ka kynhun ki Saddusi ba

ki da sngew pihuiñ eh <sup>18</sup>ki la kem bad set byndi noh ia ki apostol. <sup>19</sup>Hynrei mynmiet u angel U Trai u la plie wang ia ki jingkhang kata ka iingbyndi. Bad haba u la ialam noh ia ki shabar, u la ong, <sup>20</sup>“To khie leit bad ieng ha ki phyllaw jong ka Templ. Iathuh ia u paidbah baroh shaphang kane ka jingim kaba thymmai.” <sup>21</sup>Te haba ki apostol ki la iohsngew ia kane ki la leh kumba la bthah ia ki da u angel. Kumta ki la leit rung sha ka phyllaw jong ka Templ la dang step phyrngap bad ki la sdang ban hikai ia ki brieve.

U rangbah lyngdoh lem bad ki lok jong u ki la wan lang bad khot ia ka dorbar bah ryngkat bad ki nongialam Jiw ba rangbah. Te ki la phah brieve ban wallam noh sha ki ia ki apostol na ka iingbyndi. <sup>22</sup>Hynrei haba kita ki brieve ki la poi ki shem pynban ba ki apostol kim don shuh hangta. Kumta ki la leit phai noh ban pyntip ia kane ha ki nongialam Jiw. <sup>23</sup>Ki la ong, “Ia ka iingbyndi la khang skhem bha bad ki nongpahara ki da ieng ha ka jingkhang. Hynrei haba ngi la plie bad rung shapoh ngi shem pynban ba ka iingbyndi ka thylli!” <sup>24</sup>Te haba u kapten jong ki nongap pahara ka Templ bad ki rangbah lyngdoh ki la iohsngew ia kane, ki la sngewlyngngoh lwit bad sngewphylla eh ka mut aiu kane.

<sup>25</sup>Te la wan rung uwei u brieve bad u la ong ha ki, “Hakhmih! Kita ki brieve ia kiba phi la set byndi ki ieng mynta ha ka phyllaw ka Templ bad ki da hikai sha u paidbah.” <sup>26</sup>Ynda kumta uta u rangbah lem bad ki brieve jong u ki la wallam biang pat ia ki apostol shapoh. Hynrei ki shipai kim nud ban leh tohmet ia ki namar ka jingsheptieng ia uta u paidbah ioh ba yn lynthem maw ia ki.

<sup>27</sup>Ynda ki shipai ki la wallam ia ki apostol shapoh bad pynieng ia ki hakhmat ka dorbar, u rangbah lyngdoh u la kylli ia ki <sup>28</sup>bad u la ong, “Ngi la mana ia phi ban ym hikai shuh ha kane ka kyrteeng. Hynrei hakhmih kaei kane kaba phi la leh! Phi la pynkhihwin ia ka Jerusalem da ki jinghikai jong phi. Bad phi mut ban pyntik pap ha ngi ia ka snam jong une u brieve.”

<sup>29</sup>Te u Petros bad kiwei de ki apostol ki la jubab, “Ngi dei ban kohnguh ia U Blei, ym ia phi!” <sup>30</sup>Une U Jisu ia uba phi la pyniap da kaba sahnarphna. U Blei uba U Kpa jong ngi u la pynmihpat ia u. <sup>31</sup>U la pyndonburom bad pynshong ia u ha ka kti kamon jong u. U da pynlong ia u, u Nongsynshar bad u Nongpynim jong ngi. U Blei u la leh ia kane ia ka ban ai ha u Israel ia ka lad ba kin kylla kaba mut bad

ban phai sha U Blei da ka dohnud baroh khnang ba yn ioh mab noh ia ki pop jong ki. <sup>32</sup>Ngi la iohi ia kine kiei kiei baroh, kumjuh ruh U Mynsiem Bakhuid ia uba la ai ha kita baroh kiba kohnguh ia u, u da sakhi ba kine ki long kiba shisha.”

<sup>33</sup>Kita kiba don ha ka dorbar haba ki la iohsngew ia kane ki la sngewbitar eh lep bad ki la thaw lad kumno ban ioh pyniap noh ia ki apostol. <sup>34</sup>Hynrei la ieng uwei napdeng kita ki dkhot ha ka dorbar, u Pharisai uba kyrteeng u Gamaliel, u nonghikai ka hukum ia uba la ju burom da ki brieve baroh. Te u la bthah ia kita ki brieve ban pynmih shuwa shabar shiphang por ia ki apostol. <sup>35</sup>Hadien kata u la ong ha ki, “Ko rangbah Israel, to sumar ialade ia kaei kaba phi thmu ban leh ha kine ki brieve. <sup>36</sup>Phim kynmaw ba khyndiat por mynshuwa la mih u Theudas? Une u da kren sarong ruh shaphang ialade bad kumba saw spah ngut ki rangbah ki la bud ia u. Hynrei hadien ba u la shah pyniap la pynsakma lut ia kita kiba la iasoh bad u bad kim shym la lah ban thaw pyrthei ei ei shuh. <sup>37</sup>Hadien kata, ha kita ki sngi jong ka khana samari la mih u brieve uba kyrteeng u Judas uba na Galilaia. Bun ruh kiba la pyniasoh bad u, une ruh u la shah pyniap noh bad baroh kita kiba la iasoh bad u la pynsakma noh kumjuh. <sup>38</sup>Bad mynta nga ong ha phi, to kynran noh na kine ki brieve bad to iehnoh ia ki. Lada kane ka jingthmu ka dei tang ka jingleh brieve, kan sa kut noh. <sup>39</sup>Hynrei lada ka dei na U Blei pat, phin ym lah ban pyndam ia ka, ioh ba yn shem pynban ia phi ki nongialeh pyrshah ia U Blei!”

Ki rangbah Jiw ki la mynjour ia ki jingkren u Gamaliel. <sup>40</sup>Kumta ki la phah khot pat ia ki apostol, ynda ki la sympat ia ki, ki la mana biang ba kim bit shuh ban dang ialap ia ka kyrteeng U Jisu, kumta la pyllait noh ia ki. <sup>41</sup>Ki apostol te ki la mih noh na kata ka dorbar da ka jingkmien namar ba la niuw ia ki ruh kiba bit ban shahshitom na ka bynta U Jisu. <sup>42</sup>Khlem da pud ki la iaineh ban hikai ia ki brieve bad ialap ruh ia ka Khubor Babha ha ki phyllaw jong ka Templ bad ha ki iing, ki da iathuh ba U Jisu u dei U Mesaiah.

### La Jied Hynniew Ngut Ki Rangbah Sha Ka Kam Bakyrpang

**6**<sup>1</sup>Te ki nongbud U Jisu ki la nang man bun ha la ka sngi. Hynrei ha kajuha ka por, la mih ruh ka jingkhium na ki synran kiba long ki Jiw kiba kren Greek pyrshah ia ki synran Jiw kiba kren Hebru. Namar ba

ki riewkynthei jong ki, kim shym ioh ia ka bhah kumba dei ban ioh ha la ka sngi. <sup>2</sup>Te baroh khatar ngut ki apostol ki la lum lang ia baroh ki bangeit.

Bad ki la ong sha ki, “Kam long kaba dei ia ngi ban iehnoh ia ka kam ialap ktien Blei bad ban bunkam ha ka ban pynbiang bam ia ki briew. <sup>3</sup>Namar kata, to jied napdeng jong phi hynñiew ngut ki rangbah kiba don ia ka nam babha, kiba dap da ka jingstad bad da U Mynsiem, khnang ba ngin shaniah bad aiti noh ia kane ka kam ha ki. <sup>4</sup>Hynrei na ngi ngin pynlut khambun ka por ha ki jingduwai bad ki jinghikai ktien Blei.”

<sup>5</sup>Te baroh ki la iamynjur ia kata ka jingai jingmut. Kumta la jied ia ki hynñiew ngut ki rangbah: ia u Stephan u briew uba dap da ka jingngeit bad da U Mynsiem Bakhuid, ia u Philip, ia u Prokhoros, ia u Nikanor, ia u Timon, ia u Parmena bad ia u Nikolas u nong Antiok uba la kylla Jiw. <sup>6</sup>Ki la pynieng te ia ki hakhmat ki apostol bad haba ki la duwai ki la buh ia la ki kti halor jong ki.

<sup>7</sup>Te ka ktien U Blei ka la nang saphriang kylleng kylleng bad ki nongbud U Jisu ha Jerusalem ruh ki la nangbun. La don ruh shibun na ki lyngdoh Jiw kiba la ngeit bad kohnguh.

### Ki Jiw Ki Pyrshah ia U Stephan

<sup>8</sup>U Stephan uba dap da ka jingaei bad ka bor na U Blei u la leh ki kambah bad ki kam phylla hapdeng uta u paidbah. <sup>9</sup>Hynrei la don napdeng kita ki Jiw jong ka synagog ki riwlaitud kumba la ju khot ia ki. Kane ka kynhun ka kynthup ia ki Jiw na Kyrini, na Aleksandria, na Kilikia bad na Asia, te ki da iasaid nia bad ki Stephan. <sup>10</sup>Hynrei kim lah ban iasaid pyrshah bad u namar ka jingstad bad U Mynsiem da kiba u la kren.

<sup>11</sup>Kumta ki la pynieng ia ki sakhi lamler pyrshah ia u da kaba ong, “Ngi la iohsngew ba u Stephan u la kren bein pyrshah ia u Moses bad ia U Blei!” <sup>12</sup>bad da kumta ki la pynkhihwin ia uta u paidbah, ia ki nongialam Jiw ba rangbah bad ia ki nonghikai ka hukum. Uta u paidbah te u la sngewbitar lep bad kynrup ia u Stephan bad ialam ruh ia u ban bishar ha ka dorbar bah.

<sup>13</sup>Te ki Jiw ki la pynieng ia ki sakhi lamler ha kata ka dorbar pyrshah ia u Stephan bad ki la ong, “Une u briew um sangeh shuh ban kren pyrshah ia kane ka jaka bakhuid bad ia ka Hukum u Moses. <sup>14</sup>Ngi la iohsngew ba u ong, hana uta U Jisu na Nasaret un sa pynjot ia kane ka jaka bad un sa pynkylla lut ia baroh ki niam ki

rukom tynrai ba la ai da u Moses ha ngi.” <sup>15</sup>Te baroh kiba don ha kata ka dorbar ki la khmih shaiñ sha u Stephan bad ki la iohi ia ka khmat jong u ba ka tyngshaiñ kum ka jong u angel.

### Ki Jingiasaid U Stephan

**7** <sup>1</sup>Ynda kumta u rangbah lyngdoh u la kylli ia u Stephan, “Hato kane baroh ka long kaba shisha?” <sup>2</sup>U Stephan te u la jubab, “Ko ki kpa bad ki para Jiw jong nga, to sngap ia nga. U Blei ka burom u la mihpaw ha u kpa jong ngi u Abraham mynba u dang don ha Mesopotamia, mynba um pat leit shong sha Haran. <sup>3</sup>U Blei u la kren ha u, ‘To mih noh na la ka ri bad na la ki briew bad leit sha kata ka ri kaba ngan sa pyni ha me.’

<sup>4</sup>“Kumta u Abraham u la mih noh na ka ri ki Khaldi bad u la leit shong sha Haran. Hadian ba la iap u kpa jong u, U Blei u la pynkynriah noh ia u sha kane ka ri ha kaba phi mynta phi shong. <sup>5</sup>Hynrei U Blei um shym ai bynta ei ei ia kane ka ri ha u, wat tang shiphut ruh. Hynrei U Blei u la kular ba un sa ai ha u bad ha u symbai jong u. Kane ka la jia ha shuwa ba u Abraham un don khun.

<sup>6</sup>“Kane kaba U Blei u la kren sha u: ‘U symbai jong me un shong shnong ha ka ri nongwei. Te ki briew jong kata ka ri kin sa pynlong mraw bad pynshitom bein ia ki jin saw spah snem. <sup>7</sup>Hynrei ngan sa bishar ia kata ka ri kaba la pynlong mraw ia ki.’ Bad U Blei u la kren ruh, ‘Te hadien kine ki jingjia baroh, ki briew jong me kin sa mih noh na kata ka ri bad kin mane ia nga ha kane ka jaka.’

<sup>8</sup>“U Blei u la iateh jutang bad u Abraham; bad u la pynskhem ia kata ka jutang da ka jingotsher. Kumta ka la long mynba u Abraham u la pynkha ia u Isaak la otsher ia u ha kaba phra sngi. U Isaak ruh kumjuh u la otsher ia u Jakob u khun jong u. Bad u Jakob ruh u la leh kumjuh ia la ki khatar ngut ki khun, kiba la kylla long ki kpa tymmen bakhrav jong ngi.

<sup>9</sup>“Te kine ki kpa tymmen jong ngi ki da bishni eh ia u Joseph u para jong ki bad ki la die mraw noh ia u sha Ijipt. Hynrei U Blei u la long lem bad u <sup>10</sup>bad u la ri pynim ia u na shibun ki jingma. Mynba u Pharaoh u la long syiem ha Ijipt u la shem sngewbha eh ia u Joseph namar ka jingstad blei bakyrpang kaba don ha u. Bad u Pharaoh u la thung ia u kum u Lat halor ka ri Ijipt bad halor baroh ki briew ka iing jong u. <sup>11</sup>Te ha kata ka por la don ka ‘nemsniew ha ri Ijipt bad ha Kanaan. Bad ki briew jong ngi ki la



jynjar namar ka jingkyrduh bam, bym don jingthung jingtep shuh na ka daw jong ka jingtyrkhong.

<sup>12</sup>“Hynrei u Jakob u la iöhsngew ba don kyrhai ka jingbam ha Ijipt. Kumta u la phah ia la ki brierw shata. Ka la long ka jingleit iuh kjat banyngkong eh sha Ijipt. <sup>13</sup>Hadien kata ki la leit pat ha kaba arsieen. Bad ha kata ka por u Joseph u la pynithuh ialade sha ki hymnen ba u long ma u, u para jong ki. Bad u Pharoah u la iöh jingtip shaphang ka longiing u Joseph. <sup>14</sup>U Joseph ruh u la phah khot ia u Jakob u kpa jong u, ban wan noh sha Ijipt. Ryngrkat bad u, la ialam lang ruh ia ki bahaiing kiba la don hynniewpheuw ngut baroh. <sup>15</sup>Kumta u Jakob u la leit hiar sha Ijipt. Ma u lem bad ki kpa tymmen jong ngi ki la sah hangta haduh ka sngi jingiap. <sup>16</sup>Hadien ba ki la iap, la bah noh ia ki met jong ki sha Shekhem, ha kaba la tep ruh ia ki ha ujuh u lum jingtep ba u Abraham u la thied da ki sbai rupa na ki khun u Hammor ha Shekhem.

<sup>17</sup>“Te katba ka ia jong ka jingkular U Blei ia u Abraham ka la nangjan, ki brierw jong ngi ruh ki la nangroi ha Ijipt. <sup>18</sup>Te la mih uwei pat u syiem ha ri Ijipt u bym ithuh ia u Joseph. <sup>19</sup>Une u syiem u la leh shukor ia ki brierw jong ngi da kaba pynshitom bein haduh ba kin hap ban bret noh ia la ki khun bad pyniap ia ki.

<sup>20</sup>“Ha kum kane ka por la kha ia u Moses. Une u la long uba bhabriew eh bad lai bnai ki kmie ki kpa ki la lah ban buhrieh ia u ha la iing. <sup>21</sup>Te mynba la bret noh ia u, ka khun u Pharoah ka la shim noh ia u bad pynheh pynsan ia u kum la u jong u khun. <sup>22</sup>Te la hikai ia u Moses ia ki jingstad ka ri Ijipt baroh bad u la long uba donbor ha ki ktien bad ha ki kam jong u baroh.

<sup>23</sup>“Mynba u Moses u la dap sawpnew smem ka rta, u la kut jingmut ban leit ngoh ia la ki para jong u ki Israel. <sup>24</sup>Te haba u la iöhi ia uwei na ki ba u shah leh bymdei ha u nong Ijipt, kumta u la ialeh ia u da ka jingthmu ban iada ia la u para, hynrei u la kum tied eh haduh ba uta u nong Ijipt u la kyllon iap. <sup>25</sup>U Moses u nang tharai ba ki para jong u kin sngewthuh ba U Blei u la wallam ia u ban pyllait ia ki. Hynrei ym don uwei ruh na ki u ban sngewthuh kumta.

<sup>26</sup>“Ha ka sngi kaba bud pat, u Moses u la iöhi ba ar ngut na ki para Israel ki iashoh bad katba u dang thmu ban pyniakhlad noh ia ki, u la ong, ‘Ko para! Balei ba phi ia thmu pynmysaw uwei ia uwei pat?’ <sup>27</sup>Hynrei uta uba leh bymdei ia uwei pat u

la ong, ‘Uei uba la thung nongbisher ia me halor jong ngi?’ <sup>28</sup>Me mut ban pyniap noh ia nga ruh kumba me la pyniap ia uto u nong Ijipt mynhynnin?’ <sup>29</sup>Haba u Moses u la iöhsngew ia kane, u la phet noh na Ijipt. Bad u la leit shong shnong kum u nongwei ha ka ri ki Midian ha kaba u la pynkha ruh ar ngut ki khun shynrang hangta.

<sup>30</sup>“Te ynda la dap sawpnew smem, u angel u la mihpaw ha u, hajan jong u lum Sinai ha ka lawbniap ba meh ding. <sup>31</sup>Haba u Moses u la iöhi ia kane, u la sngewlyngngoh bad u la leit ban peit kham hajan. Hynrei u la iöhsngew ia ka sur U Trai, <sup>32</sup>ka da ong, ‘Nga long U Blei ki kpa jong me, U Blei u Abraham, U Blei u Isaak bad U Blei u Jakob de.’ U Moses te u la khyñniuh da ka jingsheptieng katba um nud shuh ban khmih sha kata ka lawbniap ba meh ding.

<sup>33</sup>“U Trai u la ong ruh, ‘To law noh ia ki sandal jong me, namar kane ka jaka ka long kaba kyntang. <sup>34</sup>Nga la iöhi ia ka jingshitom ki brierw jong nga ha Ijipt. Nga la iöhsngew ia ka jinglyñniar jong ki bad nga la wan hiar ban pyllait noh ia ki. Ale mynta Moses, ngan phah pat ia me sha Ijipt.’

<sup>35</sup>“Ia une u Moses uba ki brierw jong u ki la kyntait, ha uba ki la ong ruh, ‘Uei uba la pynlong nongsynshar bad nongbisher ia me halor jong ngi?’ Hynrei ia une kein U Blei u la phah ban long u nongsynshar bad u nongpyllait, da ka jingiarap uta u angel uba la mihpaw ha ka lawbniap ba meh ding. <sup>36</sup>Kumta u Moses u la ialam noh ia la ki brierw na ka ri Ijipt, mynba u la leh ia ki jingphylla bad ki dak khyllah ha ri Ijipt, ha duriaw ba saw bad ha ka ri khlaw ruh jin sawpnew smem.

<sup>37</sup>“Une ujuh u Moses u la ong ia kine ki kyntien ha ki khun Israel: ‘U Blei un sa pynmih ia u nongiathuhlypa, uba kum ma nga napdeng ki brierw jong phi hi.’ <sup>38</sup>Une ujuh u Moses u la ju don bad u paitlang U Blei ha kata ka ri khlaw lem bad uta u angel uba la kren ia u ha u Lum Sinai, lem bad ki kpa tymmen jong ngi. U la ai ruh sha ngi ia ki ktien ba ai jingim kiba u la pdiang na U Blei.

<sup>39</sup>“Hynrei ki kpa jong ngi kim shym la kohnguh ia u bad ki la kyntait noh ruh ia u. Ki da mon ban leit phai biang sha Ijipt. <sup>40</sup>Ki da ong ha u Aron, ‘U Moses u la ialam ia ngi na ka ri Ijipt bad ngim tip kaei kaba la jia ia u. Kumta u thaw dur blei ha ngi ki ban iaid ha shuwa jong ngi. <sup>41</sup>Te ki la thaw blei ha ka dur u khun masi bad ki da wallam jingknia ha uta u dur bleithaw bad ki da leh kmen leh risa ha kata ka jingthaw

ki kti jong ki. <sup>42</sup>Hynrei U Blei u la phaidien noh na ki bad u la iehnoh ia ki ban mane ia ki blei thala jong ka suifi. Kumba u la kren ha ka kitab ki nongiatuhlypa:

‘Ah phi ki Israel, phim shym la wallam ki jingknia ainguh sha nga, ha ka ri khlaw sawpewh snem;

<sup>43</sup>Phi la iabah ia ita i iingmane u Molokh bad ia ka dur u khlur jong u blei Rephan.

Kine ki dei ki dur ba phi la thaw ban mane ia ki.

Kumta ngan pynwir noh ia phi sha palat ka ri Babilon.’ *Amos 5:25-27*

<sup>44</sup>“Ka Tabernakl ka la don bad ki kpa jong ngi ha kata ka ri khlaw, ia kaba u Moses u la thaw kat kum ka dur ba la bthah da U Blei. <sup>45</sup>Hadien kata, u Joshua u la ialam ia ki kpa tymmen jong ngi ban jop thma ia ki ri ba marjan. Bad mynba ki brieve jong ngi ki la rung shapoh, U Blei u la beh krad noh ia ki brieve jong kata ka ri. Bad ki brieve jong ngi ki la wallam lang shapoh ia kata ka Tabernakl kaba ki la iohpdian na ki kpa tymmen kaba la don ruh haduh ka por u Dabid. <sup>46</sup>U Dabid uba la shem ka jingsngewbha na U Blei, u la kyrpad na U Blei ban tei ka Templ ia U Blei u Jakob. <sup>47</sup>Hynrei dei u Solomon pat uba la pyndep ban tei ia kata ka Templ.

<sup>48</sup>“Hynrei uta U Blei bahakhlieh duh um ju shong ha ki iing ba la thaw da ki kti ki brieve. Kumba ong u nongiatuhlypa:

<sup>49</sup>‘U Trai u ong, ka bneng ka long ka khet jong nga, Bad ka khyndew ka jaka iuh kjat jong nga.

Hato phi pyrkhath ba phi lah ban thaw ka iing ia nga ba nga lah ban shong jahthait?

<sup>50</sup>Te kynmaw, dei ma nga uba la pynlong ia kiei kiei baroh!” *Isaiah 66:1-2*

<sup>51</sup>Hadien kata u Stephan u la ong ha ki, “Phi ki nongialam Jiw kiba eh ryndang! Phi la kyntait noh ban pyndem la ki dohnud sha U Blei bad ban shahshkor ia u. Khlem da pud phi ialeh pyrshah ia U Mynsiem Bakhuid, kumba ki kpa tymmen jong phi ki la leh! <sup>52</sup>Ki kpa tymmen jong phi ki la pynshitom bein ia ki nongiatuhlypa bad ki la pyniap ruh ia kita kiba iathuhlypa shaphang ka jingwan uta u Bahok. Bad mynta pat sa ma phi kiba la ialeh pyrshah ia uta u Bahok bad phi la pyniap noh ruh

ia u. <sup>53</sup>Phi dei kita kiba la iohpdian ia ka hukum U Blei lyngba ki angel pynban phim shym la kohnguh ia ka!”

### Ka Jingpyniap Ia U Stephan

<sup>54</sup>Kita baroh kiba don ha ka dorbar haba ki la iohsngew ia kata, ki la bitar shla bad ki la kyriat briat ia u. <sup>55</sup>Hynrei u Stephan uba la dap da U Mynsiem Bakhuid, haba u la khmied sha bneng u la iohi ia ka burom U Blei bad ia U Jisu ba u da ieng sha ka liang kamon U Blei. <sup>56</sup>Te u la ong, “Hakhmih! Nga iohi ia ka bneng ba la liang bad ba U Khun u Brieve u da ieng sha ka pieng kamon U Blei.”

<sup>57</sup>Hynrei baroh ki la pyrta da ka ktien bajam, ki da set ia la ki shkor bad ki la tur puk sha u. <sup>58</sup>Te haba ki la ia patan ia u shabar ka nongbah, ki la lynthem maw ia u. Kita kiba la sakhi lamler pyrshah ia u Stephan ki la aiti noh ia ki jainkup jong ki ha uwei u samla uba kyrteng u Saul. <sup>59</sup>Te katba ki dang ia lynthem maw, u Stephan u la duwai bad u la ong, “Ah Trai Jisu, to pdiang noh ia ka mynsiem jong nga!” <sup>60</sup>Te u la dem la ki khohsiew bad pyrta ha ki jingduwai, “Ah Trai, wat thew ia ka pop jong ki!” Kine ki dei ki kyntien bakhatduh ha shuwa ba un khlad.

**8**<sup>1-3</sup>U Saul ruh u la iamynjur lang ba kata ka jingpyniap ia u Stephan ka long kaba bha. Katto katne ki brieve kiba riwblei, ki la tep noh ia u Stephan bad ki la iam pangnud eh na ka bynta jong u.

### La Pynshitom Bein Ia Ki Bangeit

Ha kata ka sngi ki Jiw ki la sdang ban pynshitom bein ia ka Balang ha Jerusalem bad ka jingpynshitom ka la long kaba jur haduh katta katta. U Saul ruh u la thombor tynggeh ia ka balang, u da rung sha ki iing ban ioh ring noh kynthei bad shynrang ia ka ban set byndi ia ki. Te la pynsakma ia ki bangeit kylleng ka ri Judia bad Samaria hynrei tang ki apostol ki la sah ha Jerusalem. <sup>4</sup>Te kita kiba la shah pynsakma, kat shaba ki poi ki la ialap ia ka Gospel jong ka jingpynim.

### U Philip U Ialap Ia Ka Gospel Ha Samaria

<sup>5</sup>U Philip u la leit hiar sha ka nongbah Samaria bad u la ialap ia U Khrist hangta. <sup>6</sup>Te ki brieve ha kata ka jaka ki la shahshkor ia u Philip namar ba ki la iohi ia ki kambah ba u la leh hangta. <sup>7</sup>Namar ki mynsiem bymman kiba ju shong ha ki brieve ki da lynniar da ka sur bajam bad ki da mih noh shisyndon na ki. Shibun kiwei pat kiba

dkoh bad kiba pang ki la iohkhiah lyngba u Philip. <sup>8</sup>Te la pyndap ia kata ka nongbah da ka jingkmien!

<sup>9</sup>La don uwei u brier ha kata ka nongbah uba kyrteng Simon. Ha shuwa ba U Philip un wan poi shata, une u la ju pynthame ia ki nong Samaria da ki jingleh byrtong jong u. U da kob ruh ialade ba u dei u brier bakhraw. <sup>10</sup>Bad ki brier ha kata ka shnong naduh ki barit haduh kiba khraw ki la ngeit bha ia u. Bad ki da ong, "Une u brier te u don shisha ia ka bor U Blei ba la khot 'ka Bor Bakhraw.'" <sup>11</sup>La kham slem u Simon u la pynthame ia ki brier da ki jingleh byrtong jong u, kat ban pynshoh tyndep ia kiba bun ban bud ia u. <sup>12</sup>Hynrei mynba u Philip u la ialap ia ka Gospel jong ka Hima U Blei bad ia ka kyrteng ba donbor U Jisu Khrist, bun te ki la ngeit bad la pynbaptis ruh ia ki. <sup>13</sup>U Simon ruh de u la ngeit bad la pynbaptis ia u, une u la bu da kti ha kjat ia u Philip. U la lyngngoh ruh ban iohi ia ki kambah bad ki dak khyllah kiba jia lyngba u Philip.

<sup>14</sup>Te haba ki apostol ha Jerusalem ki la iohsngew ba ha Samaria ruh la don kiba pdiang ia ka ktien U Blei, ki la phah ia u Petros bad ia u Ioannis sha Samaria. <sup>15</sup>Bad haba ki la poi, ki la duwai ia kita ki parabangeit ha Samaria ba kin iohpdiang ia U Mynsiem Bakhuid. <sup>16</sup>Ia kine ki brier la pynbaptis ha ka kyrteng U Trai Jisu, hynrei kim pat shym la iohpdiang ia U Mynsiem Bakhuid. <sup>17</sup>Kumta u Petros bad u Ioannis haba ki la duwai bad buh kti ha ki, te ki la pdiang ia U Mynsiem Bakhuid.

<sup>18</sup>Haba u Simon u la iohi ba da kaba buh kti ki apostol la ai ia U Mynsiem Bakhuid, kumta u la tyrwa pisa sha ki. <sup>19</sup>Bad u la ong, "To ai ha nga ruh ia kane ka bor ba haba ngan buh kti hano hano, kin iohpdiang ia U Mynsiem Bakhuid."

<sup>20</sup>Hynrei u Petros u la ong ha u, "Ma me bad ka spah jong me kin jot noh, namar me la mut ban thied ia ka jingai U Blei da ka pisa. <sup>21</sup>Mem don bynta ei ei bad ngi ha kane ka kam, namar ba ka dohnud jong me kam shym long kaba beit hakhmat U Blei. <sup>22</sup>To kylla kaba mut! Bad to phai noh ruh na kane ka jingpyrkhat ba sniew jong me bad khot kyrpad ia U Trai, lehse ym dang lah ban mab ia me. <sup>23</sup>Namar nga iohi ba me long uba dap da ka jingpihuiñ ba kthang bad mem lah ruh ban iehnoh na kaba leh bymman."

<sup>24</sup>U Simon u la jubab, "To duwai lem na ka bynta jong nga, khnang ba kata kaba me la kren kan ym wan jia ha nga."

<sup>25</sup>Kumta kine ki ar ngut ki apostol ynda ki la iathuh lut shaphang U Jisu bad haba ki la lah ialap ia ka ktien U Trai ki la leit phai pat sha Jerusalem. Lynter lynti, ki la rung sha ki shnong jong ka Samaria bad ki da ialap ia ka Khubor Babha sha ki.

### U Philip U Hikai Ia U Nong Ithiopia

<sup>26</sup>U angel U Trai u la kren ha u Philip bad u la ong, "feng joit, leit ruh shaphang shathie sha kata ka lynti lyngba ka ri khlaw kaba lam arsut na Jerusalem sha Gasa."

<sup>27</sup>Kumta u Philip u la leit. Te ha lynti u la iohi ia u brier na Ithiopia, u iunukh uba khraw uba dei peit ia ka spah ka phew jong ka Kandasi, ka syiem Ithiopia. Une te u dang wanphai na ka jingmane na Jerusalem. <sup>28</sup>Te ha lynti katba u dang shong ha ka kali kulai jong u ban leit phai sha la iing u da pule ia ka kitab u Isaiaah u nongiathuhlypa.

<sup>29</sup>U Mynsiem u la ong ha u Philip, "Khie leit hajan ka kali kulai jong u." <sup>30</sup>Kumta u la leit hajan bad snoh ha kata ka kali bad u la iohsngew ba u pule ia u Isaiaah u nongiathuhlypa. U Philip u la kylli, "Hato me sngewthuh ia kaei kaba me pule?"

<sup>31</sup>U te u la jubab, "Kumno ngan sngewthuh lymda don ba pynshai ia nga?" Kumta u la khot ia u Philip ban shong lang ha ka kali jong u. <sup>32</sup>Ka bynta jong ka jingthoh Bakhuid kaba u la pule ka long kane:

"Kum ka langbrot la ialam noh ia u sha ka jingpyniap.

Bad kum i khunlangbrot iba sngap jar hakhmat u nongkhap shñih.

Um shym la kren ei ei.

<sup>33</sup>La pynlehraiñ ia u bad ia ka hok jong u la shim noh na u.

La shim noh ia ka jingim jong u na khyndew.

Kumta ym ym don khana ei ei shuh shaphang ka pateng jong u."

*Isaiah 53:7-8*

<sup>34</sup>Te u iunukh u la ong ha u Philip, "To iathuh ia nga shaphang jongno ba u nongiathuhlypa u kren hangne? Hato u kren na ka bynta ialade ne na ka bynta uwei pat?" <sup>35</sup>U Philip u la sdang ban hikai da kaba sdang na kine hi ki dkhot bad u la ialap ia ka Khubor Babha shaphang U Jisu Khrist.

<sup>36</sup>Katba ki dang ialeit ha kata ka lynti ki la poi ha ka jaka ba don um. Te u iunukh u la ong, "Hakhmih ka um! Kaei ka ban

pynpep ban pynbaptis ia nga?" <sup>37</sup>U Philip u la ong, "Lada me ngeit da la ka dohnud baroh me lah keiñ." U iunukh u la jubab, "Nga ngeit ba U Jisu Khrist u long U Khun U Blei." <sup>38</sup>Bad uta u iunukh u la pynsangeh ia ka kali bad baroh ar ngut te ki la hiar sha kata ka wah bad u Philip u la pynbaptis ia u iunukh hangta. <sup>39</sup>Ynda ki la wan kiew noh na ka um, U Mynsiem U Trai u la rah noh ia u Philip shawei pat; bad uta u iunukh um shym iohi shuh ia u. Kumta u la leit phai sha la iing da ka jingkmn <sup>40</sup>Hynrei la shem ia u Philip ha ka nongbah ba la khot Asotos. Lynter lynti u da ialap ia ka Khubor Babha ha man ki shnong haduh ba un da poi ha Kaisaria.

### U Saul U Kylla Long U Nongbud U Jisu

**9** <sup>1</sup>Te ha Jerusalem u Saul u la nang pynher syrngiew bad byrthen pyniap lut ia baroh ki synran U Trai. Kumta u la pan jingbit da ka jingthoh na u rangbah lyngdoh <sup>2</sup>sha ki synagog jong ka nongbah Damaskos, ba lada un shem iano iano ruh ia ki brieve jong kata ka Lynti kynthei bad shynrang un khum ia ki bad wallam sha Jerusalem.

<sup>3</sup>Ka la jia te katba u dang leit bad ba u la jan poi artad ha Damaskos, kynsan kynsan la wan ha u ka jingthaba ba tyngshaiñ eh na bneng. <sup>4</sup>U te u la kyllon khram ha madan bad u la iohsngew ia ka sur kaba ong, "Saul, Saull! Balei me pynshimot bein ia nga?"

<sup>5</sup>U Saul u la ong, "Me long u ei, Ah! Trai?"

Bad kata ka sur ka la jubab, "Nga long U Jisu, ia uba me pynshimot bein." <sup>6</sup>To ieng mynta leit ruh sha kata ka nongbah, te yn sa iathuh ia me ia kaei kaba me dei ban leh."

<sup>7</sup>Ki rangbah kiba la leit lang bad u Saul ki la shu ieng hangta khlem nang kren ei ei. Ki la iohsngew tang ia ka sur, hynrei kim iohi iano iano ruh. <sup>8</sup>Kumta u Saul u la ieng joit na madan bad u la plied ia la ki khmat hynrei um lah shuh ban iohi. Te kita ki rangbah ki la shu btin ia u bad ialam noh sha Damaskos. <sup>9</sup>Kumba lai sngi la tap matlah ia ki khmat u Saul bad um shym la bam ne dih ei ei ruh em.

<sup>10</sup>Te la don ha kata ka nongbah u synran U Jisu uba kyrteng u Ananias bad ha ka jingiohipaw U Trai u la kren ha u, "Ko Ananias!"

U Ananias ruh u la jubab, "Nga hangne, ah Trai."

<sup>11</sup>U Trai u la ong ha u, "To khie bad to leit sha kata ka lynti ba la khot Babeit. To wad ruh ia ka iing u Judas bad ia u brieve uba kyrteng u Saul uba na Tarsos. U don hangta, u da duwai. <sup>12</sup>Bad u ruh u la iohi ia u brieve uba kyrteng Ananias ba u wan ban buh kti ha u khnang ba un ioh imat pat."

<sup>13</sup>Hynrei u Ananias u la jubab, "Ah Trai, nga la iohsngew na shibun shaphang une u brieve bad la iathuh ha nga ia ki kam sniew kiba u la leh pyrshah ia ki brieve jong me ha Jerusalem. <sup>14</sup>Mynta ruh u la wan sha Damaskos da ka jingaibor u rangbah lyngdoh ban khum noh ia baroh kiba ngeit ha me."

<sup>15</sup>Hynrei U Trai u la ong pat ha u, "To khie leit! Namar nga la jied ia u sha ka kam, ia ka ban leit rah ia ka kyrteng jong nga sha kiwei pat ki jaitbynriew, sha ki syiem bad sha ki Israel ruh de. <sup>16</sup>Ngan pyni ruh ha u katno u dei ban shah na ka bynta jong nga."

<sup>17</sup>Kumta u Ananias u la leit sha ka iing u Judas. Te haba u la buh ia ki kti ha u Saul, u la ong ruh, "Saul, u para jong nga, U Trai Jisu ia uba me la iohipaw ha ka lynti u la phah ia nga sha me khnang ba men ioh imat pat bad ba yn pyndap ia me da U Mynsiem Bakhuid." <sup>18</sup>Kumne kumne hi, la hap noh kum ki sarew na ki khmat jong u bad u la lah ban iohi pat! Te u la ieng joit bad la pynbaptis ia u. <sup>19</sup>Hadien ba u la bam la dih la pynshaitbor ia u.

### U Saul U La Sdang Ban Ialap Ia U Jisu

Te u Saul u la sah lang bad ki synran U Jisu ha Damaskos kumba katto katne sngi. <sup>20</sup>Hadien kata u la sdang ban rung sha ki synagog bad u la iathuh ha ki brieve ba U Jisu u dei U Khun U Blei.

<sup>21</sup>Te baroh kat kiba la iohsngew ia u ki la kyndit eh bad ki la ia ong, "Une um long uta uba na Jerusalem uba la pyrshang ban pynduhjait ia kita kiba khot kyrpad ha ka kyrteng U Jisu! Bad u la wan khnang shane ruh da ka jingthmu ban khum noh ia ki synran U Jisu bad ban ialam pat ia ki hakmat u rangbah lyngdoh."

<sup>22</sup>Hynrei u Saul u la nang iohbor ha ka jingialap ban pynshisha ba U Jisu u dei uta U Mesaiah, wat ki Jiw ha Damaskos ruh kim lah ban ia pyni nia bad u.

### U Saul U Lait Im Na Ki jiw

<sup>23</sup>Te hadien bun sngi, ki Jiw ki la iasylla lang ban pyniap noh ia u Saul. <sup>24</sup>Te ki la ap thap ha ki khyrdop mynsngi bad mynmiet khnang ba kin ioh pyniap noh ia u, hynrei u Saul u la tip ia kata ka jingthmu jong ki. <sup>25</sup>Kumta ki synran jong u ki la iarap ban pynmih noh ia u mynmiet na kata ka nongbah, te ki la buh ia u ha ka shang bad pynhiar da u tyllai na ka thliw kaba ha ka kynroh.

### U Saul Ha Jerusalem

<sup>26</sup>Te haba u la poi ha Jerusalem. U la pyrshang ban pyniasoh ialade bad ki synran, hynrei

bun na ki, ki la sheptieng ia u bad kim pat lah ban pdiang ba u long da shisha u synran U Jisu.<sup>27</sup>Hynrei u Barnabas u la pdiang ia u Saul bad ialam ia u ha ki apostol. Bad u la iathuh ba kumno u la iashem ia U Trai ha kata ka lynti bad ba u la lah kren ruh ha u. U da iathuh ruh kumno ba u la ialap ia ka kyrteng U Jisu ha kita ki brier ha Damaskos.

<sup>28</sup>Kumta u Saul u la sah bad ki synran, u la leit ruh kylleng ka nongbah Jerusalem u da ialap shitrhem ia ka kyrteng U Trai.<sup>29</sup>U la iakren pyninia ruh bad ki jiw kiba kren Grik, kiba la wad dong pynban ban pyniap noh ia u.<sup>30</sup>Te haba kita ki parabangeit ki la tip ia kane ki la pynkynriah noh ia u Saul sha Kaisaria bad nangta pat sha ka nongbah Tarsos.

<sup>31</sup>Te ka la don ka jingshongsuk ia ka balang ha Judia, Galilaia bad Samaria. Da ka jingpynshaitbor U Mynsiem Bakhuid ki bangeit ki la nangskhem ha ka jingngeit bad la pyndonburom ia U Trai da ka jinglong jingim jong ki. Kumta ka balang ruh ka la nangroi ha la ka sngi.

### U Petros Ha Lydda Bad Joppa

<sup>32</sup>U Petros ruh u la ia id lyngba ki phang ka Jerusalem bad u la leit jngoh ia ki parabangeit kiba ha Lydda.<sup>33</sup>Hangta u la iakynduh ia u brier uba kyrteng u Inias, uba la shu thiah namar ka jingpang iapshiliang kaba la ban ia u la palat phra snem.<sup>34</sup>U Petros u la ong ha u, "Inias U Jisu Khrist u la pynkhiah ia me. To khie noh bad lum ia la ka jingthiah!" Te kumne kumne hi u la ieng joit.<sup>35</sup>Baroh te kiba ha ka shnong Lydda bad kiba ha ka pyntha jong ka Sharon haba ki la iohi ia kane, ki la kut jingmut ban ngeit noh ha U Trai.

<sup>36</sup>Te la don ha ka nongbah Joppa kawei ka synran kaba kyrteng ka Tabitha. Ka kyrteng Greek jong ka, ka dei ka Dorkas kaba mut "ka skei". Kane ka kynthei ka la ju leh bha ia ki brier baroh bad ka ju ai isynei ruh ia kiba duk ba kyrduh.<sup>37</sup>Katba u Petros u dang don ha Lydda, ka Tabitha ka la shitom jur bad ka la iap. Te haba ki la pynsum ia ka met jong ka, ki la buh ha ka kamra ba haneng.<sup>38</sup>Ki synran ha Joppa te haba ki la tip ba u Petros u don ha Lydda, ki la phah brier ban leit shaw ki da kyrpad ia u ban wan kloj sha Joppa. Namar ba ka Lydda kam da jngai na Joppa.

<sup>39</sup>Kumta u Petros u la leit lang bad ki. Ynda haba u la poi, ki la ialam ia u sha kata ka kamra ba haneng ha kaba la pynthiah ia ka Tabitha. Te ki riewkynthei ki la ieng sawdong jong u ki da ia iam sngewsih bad ki la pyni ruh ha u ia kita ki jaiñ kiba ka

la lah thaiñ lem bad ki.<sup>40</sup>U Petros hadien ba u la phah noh ia ki shabar, u la dem khohsiew bad u la duwai. Haba u la phai te sha ka Tabitha, u la ong, "Tabitha, ieng joit" Te ka la plied ia la ki khmat bad haba ka la iohi ia u Petros, ka la khie shong.<sup>41</sup>Haba u la kner ia la ka kti u la pynieng ia ka. Hadien kata u la khot noh ia ki parabangeit bad ia ki riewkynthei ba kin rung shapoh, te ki la shem ba ka Tabitha ka la im pat!

<sup>42</sup>Ki brier baroh ha Joppa ki la bna ia kane, bun ruh na ki, ki la ngeit ha U Trai.<sup>43</sup>U Petros u la isisah ha Joppa ha ka iing u Simon, u nongshna snieh.

### U Petros Bad U Kornilios

**10**<sup>1</sup>Te la don ha Kaisaria u brier uba riewblei, uba kyrteng u Kornilios, u rangbah shipai Rom na ka pyrton ba la khot Italia.<sup>2</sup>Ma u lem bad ka iing jong u ki la long kiba riewblei bad khlem da pud u ju duwai ha U Blei bad leh isynei ruh ia kiba duk.<sup>3</sup>Te ha kawei ka janmiet kumba lai baje ei ei, u Kornilios u la iohipaw ia u angel jong U Blei ba u wan sha u bad u da ong, "Kornilios!"

<sup>4</sup>Ha ka jingsngew sheptieng bad sngew maian u la khmih sha u angel bad u la ong, "Kaei Kynrad?"

Te u angel u la iathuh ha u, "U Blei u la iohsngew ia ki jingduwai jong me, u la iohi ruh ia ki jingai isynei jong me ia kiba duk. Bad la buh jingkyrmaw ia baroh kiba me la leh.<sup>5</sup>Mynta te to phah brier sha Joppa ban leit iashem ia u brier uba kyrteng u Simon Petros.<sup>6</sup>U sah ha ka iing jong u Simon, u nongshna snieh, kaba don harud duriaw."<sup>7</sup>Uta u angel hadien ba u la dep kren ia kine kiei kiei baroh u la leit noh. Kumta hi u Kornilios u la khot ar ngut na ki shakri jong u bad u shipai uba riewblei uba la ju long ruh u nongiarap ba ha syndah jong u.<sup>8</sup>Hadien ba u la batai ha ki ia kiei kiei baroh, u la phah noh ia ki sha Joppa.

<sup>9</sup>Te ha ka sngi kaba bud haba kita ki la jan poi artad sha Joppa bad ka la long ka por janmiet, u Petros u la kiew shalor ka iing ban duwai.<sup>10</sup>Te u la sngew thngan bad kwah bam jingbam. Bad katba ki dang pynkhreh jingbam, u Petros u la iohipaw.<sup>11</sup>Bad u la iohi ia ka bneng ba la plien bad ia ka jingsiang ba sawdong ba la pynhiar haduh ka khyndew.<sup>12</sup>Hangta ki la don ki mrad bad ki kynja ba par ba bunjait bad ki sim ba her.<sup>13</sup>U la iohsngew ruh ia ka sur kaba ong, "To ieng ko Petros; to pyniap bad to bam ruh."

<sup>14</sup>Hynrei u Petros u la ong, “Em ah Trai! Namar ngam ju bam mynno myno ruh ia ki jingbam bymkhuid lane ki bymbit ia nga ban bam.”

<sup>15</sup>Hynrei ka sur ka la wan pat ha kaba arisien, “Ia kaba U Blei u la pynkhuid wat niew sang ma me ban bam.”<sup>16</sup>Bad kane ka la jia haduh lai sien. Haden kata la shim biang ia kata ka jingsiang sha bneng.<sup>17</sup>Te u Petros u la sngewlynggoh sah ka mut aiu kata ka jingithuhpaw kaba u la iohi.

Kita ki brierw ia kiba la phah da u Kornilios ki la poi ha kata ka iing u Simon bad ki da ieng ha ka jingkhang.<sup>18</sup>Te ki la kylli, “U Simon Petros u sah hangne?”

<sup>19</sup>Katba u Petros u dang pyrkhath sah ia kata ka jingithuhpaw, U Mynsiem u la kren ha u, “Hakhmih lai ngut ki brierw ki ia wad ia me.”<sup>20</sup>To khie namar kata leit ryngkat bad ki khlem jingartien namar dei ma nga ba la phah ia ki.”<sup>21</sup>Kumta u Petros u la leit hiar sha ki bad u la ong, “hakhmih dei ma nga uta uba phi ia wad. Balei phi iawan shane?”

<sup>22</sup>Te ki la iathuh, “U Kornilios, u rangbah shipai, u brierw uba bha bad uba riewblei bad baroh ki jiw ki burom bha ia u. U angel uba la mihpaw ha u, u la bthah ban phah khot ia me sha iing jong u bad ban shahshkor ia ki kyntien kiba me don ban kren.”<sup>23</sup>Kumta u Petros u la khot basa ia ki ha kata ka miet.

Te ha kaba lasha u la leit ryngkat bad kita ki lai ngut, la don ruh na Joppa ki parabangeit kiba la leit lang bad u.<sup>24</sup>Ha ka sngi kaba bud ki la poi ha Kaisaria. Katba u dang ap ia ki, u Kornilios u la lum lang ia ki bahaing hasem bad ki paralok ba jan jong u.

<sup>25</sup>Haba u Petros u dang poi ha phyllaw, u Kornilios u la leit sha u bad u la dem ha ki kjat ban mane ia u.<sup>26</sup>Hynrei u Petros u la pynieng ia u, u da ong, “Ieng joit! Nga long tang u brierw kum ma me hi.”<sup>27</sup>Kumta u la bteng ban iakren bad u Kornilios. Bad haba u la rung shapoh u la shem ia ki brierw kiba bun kiba la iadon lypa hangta.

<sup>28</sup>Te u Petros u la ong ha kita ki brierw, “Phi baroh phi ia tip ba ka long pyrshah ia ka hukum ki jiw ban iasoh bad uno uno u bymdei u jiw. Hynrei U Blei u la pyni ha nga ba ngam dei ban niew sang lane niew bymkhuid iano iano ruh.”<sup>29</sup>Kumta ngam shym la kyrngah mynba ki brierw jong phi ki la wan shaw ia nga. Mynta te, to iathuh balei ba phi la phah wan ia nga shane.”

<sup>30</sup>U Kornilios u la ong, “Saw sngi mynshuwa, katba nga dang duwai ha la iing bad ka la long kumba lai baje janmiet. Kynsan kynsan la ieng hakhmat jong nga

uwe i u brierw uba riam da ki jaiñ lieh ba phyrnai.”<sup>31</sup>U da ong, “Kornilios, U Blei u la iohsngew ia ki jingduwai jong me bad u la iohi ruh ia ki jingai isynei jong me ia kiba duk. U la kynmaw ruh ia baroh kiba me la leh.”<sup>32</sup>Mynta te to phah brierw sha Joppa ban leit iashem ia u brierw uba kyrnteng u Simon Petros. U sah ha ka iing u Simon, u nongshna snieh, kaba don harud duriaw.”<sup>33</sup>Kumta nga la phah shaw ia me. Bad me ruh me la leh bha ba me la wan shane. Mynta te ngi baroh ngi iadon hangne hakhmat U Blei ban shahshkor ia kaei kaba U Trai u la hukum ia me ban kren ha ngi.”

### U Petros U La Ialap Ha Ka Iing U Kornilios

<sup>34</sup>Ynda kumta u Petros u la sdang ban kren: “Mynta shisha nga sngewthuh ba U Blei um ju niew shiliang khmat iano iano ruh.”<sup>35</sup>U pdiang ia kita baroh kiba mane ia u bad kiba beit ka dohnud. Kam pher na kano ka jaitbynriew ki long.<sup>36</sup>U Blei u la kren sha u paitlang Israel bad u la phah ia ka khubor babha jong ka jingsuk lyngba U Jisu u la brierw, uba long U Trai halor baroh.

<sup>37</sup>“Phi baroh phi tip ia kaba la jia ha Judia, da kaba sdang na Galilala mynba u Ioannis u la ialap sha ki brierw ba ka dei ia ki ba yn pynbaptis.”<sup>38</sup>Phi la iohsngew ruh shaphang U Jisu uba na Nasaret, kumno ba U Blei u la pynsleh ia u da U Mynsiem Bakhuid bad da ka bor. Uba la leit kylleng, u da leh babha ia ki brierw bad u da pynkhiah ruh ia kita baroh kiba la ban shitom da u Soitan, namar ba U Blei u long ryngkat bad u.

<sup>39</sup>“Ngi la iohi ia baroh ba U Jisu u la leh ha Judia bad ha Jerusalem. Ia uba ki la pyniap noh da kaba sahnarphna.”<sup>40</sup>Hynrei ha ka sngi kaba lai, U Blei u la pynmihpat ia u na kiba iap bad u da pynpaw ialade ha kiba bun.<sup>41</sup>Ym shym la pynpaw ia u ha baroh, hynrei tang ha ngi kiba u la ied ban long ki sakhi jong u. Ngi la iabam iadih ryngkat bad u hadien ba u la mihpat na kiba iap.

<sup>42</sup>“U Jisu u la hukum ia ngi ban leit bad iathuh ia kane sha ki brierw, ba u dei uba la thung da U Blei ban long u nongbisher ia kiba im bad kiba iap.”<sup>43</sup>Bad baroh kiba ngeit ha ka kyrnteng U Jisu yn mab noh ia ki pop jong ki. Kata ka dei kaba ki nongiathuhlypa ki la kren shaphang jong u.”

### U Blei U Pdiang Ia Baroh

<sup>44</sup>Katba u Petros u dang kren ia kine ki ktien, U Mynsiem Bakhuid u la hiar ha kita baroh kiba la shahshkor ia ki jingkren jong u.<sup>45</sup>Kita ki parabangeit jiw kiba la

iawan lang bad u Petros ki la sngewphylla eh namar ba ha ki Jentil ruh la theh noh ia ka jingai U Mynsiem Bakhuid. <sup>46</sup>Ki la iohsngew ba ki da kren iaroh ia U Blei ha kiwei pat ki thylliej. Te u Petros u la ong, <sup>47</sup>“Don mano mano ban khang ia ki ban pynbaptis ha ka um? Kine ki la iohpdang ia U Mynsiem Bakhuid kum ma ngi hi!” <sup>48</sup>Te u la hukum ba yn pynbaptis ia u Kornilios bad ia kita baroh kiba don lem bad u ha ka kyrteng U Jisu Khrist. Kumta ki la ia kyrpad ia u Petros ba un dang iaisah bad ki sa katto katne sngi.

### U Petros U Leit Phai Pat Sha Jerusalem

**11** <sup>1</sup>Te ki apostol bad ki parabangeit ha Judia ki la iohsngew ba ki Jentil ruh ki la pdiang ia ka ktien U Blei. <sup>2</sup>Bad haba u Petros u la wan sha Jerusalem, katto katne ki parabangeit jiw ki la la iakren khñium. <sup>3</sup>Ki da ong, “Me leit sha ki iing jong ki Jentil bad kiba khlem otsher, me da iabam iadhi ryngkat bad ki!”

<sup>4</sup>Kumta u Petros u la iathuh ha ki ia baroh kaba la jia. <sup>5</sup>U la ong, “Mynba nga la don ha Joppa bad katba nga dang duwai, nga la iohi ia ka bneng ba la plie bad ia ka jingsiang ba sawdong ba la pynhiar haduh ka khyndew. <sup>6</sup>Bad haba nga la khmih shapoh nga la iohi ia ki mrad ba bun jaid, ia ki mrad khlaw kumjuh ruh ia ki kynja ba par bad ki sim. <sup>7</sup>Nga la iohsngew ruh ia ka sur kaba ong, “To ieng ko Petros; to pyniap bad to bam ruh.” <sup>8</sup>Hynrei nga la ong, “Em ah Trai! Namar ngam ju bam mynno myno ruh ia ki jingbam bymkhuid lane ki bym bit ia nga ban bam.”

<sup>9</sup>Hynrei ka sur ka la wan biang ha kaba arsien, “Ia kaba U Blei u la pynkhuid wat ñiew sang ma me ban bam!”

<sup>10</sup>“Kane ka la jia haduh laisien. Haden kata la shim noh ia kata ka jingsiang sha bneng. <sup>11</sup>Te kumta kumta hi la don lai ngut ki rangbah kiba la ieng shabar ka iing ba nga sah ia kiba la phah da u Kornilios ban wan wad ia nga. <sup>12</sup>U Mynsiem ruh u la iathuh ha nga ba nga dei ban leit lem bad ki khlem jingartatien. Kine ki rangbah baroh hynriew ngut ruh ki la leit lang bad nga sha ka iing u Kornilios. <sup>13</sup>U ruh u la iathuh ha ngi shaphang u angel uba la mihpaw, uba da ieng ha ka iing jong u. Uta u angel u la ong, “To phah brieve sha Joppa ban leit shaw ia u Simon ia uba la sin Petros. <sup>14</sup>Te un sa iathuh ha me ia kiei kiei baroh khnang ba yn pynim ia me bad ia ka iing jong me.”

<sup>15</sup>“Hadien ba nga la sdang ban kren, U Mynsiem Bakhuid u la hiar ha ki kumba ka la jia bad ngi ha kaba mynnyngkong. <sup>16</sup>Te nga la kynmaw ia ki kyntien U Trai Jisu mynba u ong: ‘U Ioannis u la pynbaptis ia phi ha ka um, hynrei yn sa pynbaptis ia phi ha U Mynsiem Bakhuid.’ <sup>17</sup>U Blei u la ai ruh sha ki ia kajuha ka jingai kumba u la ai ha ngi bad ha kita baroh kiba la ngeit ha U Trai Jisu Khrist. Te nga dei uei ban pynpep ia kata ka mon jong U Blei?”

<sup>18</sup>Haba kita ki parabangeit Jiw ki la iohsngew ia kane, ki la sangeh noh na kaba iakren khñium bad ki la iaroh pyndonburom ia U Blei ki da ong, “U Blei u la ai ia ka jingkylla kaba mut sha ki Jentil, khnang ba ma ki ruh kin ioh mad ia ka jingpynim jong u!”

### Ka Gospel Ka La Poi Sa Sha Antiok

<sup>19</sup>Te la pynsakma kylleng ia ki bangeit da kata ka jingpynshitom kaba la jia hadien ka jingiap u Stephan. Don napdeng jong ki kiba la poi sha Phoiniki, sha Kypros bad shaduh Antiok de. Kat shaba ki poi ki da ialap ia ka Gospel, hynrei tang ha ki para jiw hi. <sup>20</sup>Hynrei la don napdeng ki synran kiba na Kypros bad Kyrini haba ki la poi ha Antiok ki la ialap sha ki brieve ki bym dei ki jiw. Ki da ialap ha ki ia ka Khubor Babha shaphang U Jisu Khrist. <sup>21</sup>Te U Trai u la long lem bad ki, shibun ruh ki la ngeit bad kut jingmut ban bud ia U Trai.

<sup>22</sup>Haba ka balang ha Jerusalem ka la iohsngew ia kane, ka la phah ia u Barnabas ban leit sha Antiok. <sup>23-24</sup>U Barnabas u la long u brieve uba bha bad uba dap da U Mynsiem bad ka jingngeit. Haba u la poi ha Antiok u la sngewkmen eh ban iohi hangta ba katno U Blei u la kyrkhu eh ia ki parabangeit. U da ai mynsiem ia ki, da kaba ong, “To ieng skhem ha U Trai bad shakri ia u da ka dohdud baroh.” Shibun ruh ki la nangwan ban pyniasoh ialade sha U Trai.

<sup>25</sup>Te u Barnabas u la leit noh sha ka nongbah Tarsos ban wad ia u Saul. <sup>26</sup>Hadien ba u la shem ia u, u la ialam noh sha Antiok. Te ki la sah hangta baroh shisnem. Man ka por ba ka balang ka iakynduh lang, u Barnabas bad u Saul ki ju hikai ia ki. Ka la long te ha Antiok ba la khot nyngkong eh “Khristan” ia ki nongbud jong U Trai Jisu.

<sup>27</sup>Ha kita ki sngi la don ki nongiathuhlypa kiba la leit na Jerusalem sha Antiok. <sup>28</sup>U wei na ki u kyrteng Agabos. Une u la ieng joit bad u la kren ha ka bor U Mynsiem u da ong, “Ka nem sniew kan sa wan jia long ha

ka pyrthei baroh kawei bad ka jingkyrduh bam kan sa lap ia ki briew." Kane ka 'nem sniew ka la jia shisha ha ki sngi u Patsha Klaudios. <sup>29</sup>Te kita ki synran baroh ha la ka jingkotbor ki la lum bad phah ia ka jingiarap sha ki parabangeit kiba don ha Judia. <sup>30</sup>Ynda ki la lah lum ia kata ka pisa ki la phah rah sha ki Basan ha Judia lyngba ka kti u Barnabas bad u Saul.

### La Nang Pynshitom Jur ia Ki Bangeit

**12** <sup>1</sup>Ha kata hi ka por, u Syiem Herod u la sdang ban pynshitom ia ki dkhot jong ka balang. <sup>2</sup>Bad u la ai hukum ban pyniap noh ia u Jakob, u para u Ioannis, da ka waitlam. <sup>3</sup>Te haba u Herod u la iohi ba kane ka la pynsngewbha ia ki Jiw, u la thmu ban kem sa ia u Petros ruh. Bad ki la dei artad ki sngi jong ka jingkhawai niam u Kpu Bakhlem thiat. <sup>4</sup>Kumta haba u la kem ia u Petros u la set byndi ia u ha kaba la pahara pyrkhing bha da ki khathynriew ngut ki shipai. U Herod u la thmu ban pynmih ia u Petros hakhmat u paidbah hadien ba la kut kita ki sngi jong ka jingkhawai niam ka jinglait. <sup>5</sup>Hynrei katba u Petros u dang don ha iingbyndi, ka balang ka la pynlong ia ka jingduwai kaba jur ha U Blei na ka bynta jong u.

### La Ialam Noh ia U Petros Shabar Ka iingbyndi

<sup>6</sup>Ha kawei ka miet, katba u Petros u dang iohthiah ba la khum da ar tylli ki kynjri hapdeng ar ngut ki shipai kiba pahara ia u, kiwei pat ki shipai ki dang ap phira hakhmat ka iingbyndi. Te u Herod u la thmu ban sa pynmih noh ia u Petros hakhmat u paidbah ha ka sngi kaba bud. <sup>7</sup>Kynsan kynsan u angel U Trai u la ieng hajan jong u bad ka jingshai ka la tyngshaiñ ha kata ka jaka. Uta u angel te u la kyrsiew ia u Petros bad u la ong, "Khie joit klo." Te kita ki kynjri ki la hap noh na ka kti u Petros. <sup>8</sup>Uta u angel u la ong ruh, "To kup ia la ka jaiñkup bad phong ia la ki sandal bad wan bud nadien jong nga" Te u Petros u la leh kumba la bthah uta u angel.

<sup>9</sup>Kumta u angel U Trai u la mih noh shabar bad u Petros u la bud ia u. U Petros um shym tip ba kata ka la long kaba shisha u nang tharai ba ka dei ka jingiohipaw. <sup>10</sup>Te haba ki la iaïd lyngba ka jingap pahara banyngkong bad kaba ar, ki la mih noh te na ka khyrdop nar kaba pyniakhlad na ka nongbah. Kata ka khyrdop nar ka la plie hi wang bad katba ki dang ia iaïd katto katne jam sha khmat uta u angel u la jah noh.

<sup>11</sup>Hangta u Petros u la peiphang ia kaei kaba la jia. U la pyrkhathalade, "Shisha U Trai u la phah ia u angel jong u ban pyllait noh ia nga na ka kti u Herod bad na kita baroh ki jingthmu jong ki Jiw pyrshah ia nga."

<sup>12</sup>Hadien kata u Petros u la leit sha ka iing jong ka Mari, ka kmie u Ioannis, ia uba la sin Markos. Bun ngut ki bangeit ki la iaïdon hangta bad ki la ia duwai. <sup>13</sup>Te haba u la tied ia ka jingkhaw jong kata ka iing, kawei ka shakri kynthei kaba kyrteng ka Rhoda ka la wan shajan ka jingkhaw. <sup>14</sup>Haba ka la sngewthuh ba dei ka sur u Petros, ka la sngewkmen eh haduh ba ka la klet noh ban plie ia ka jingkhaw bad ka la mareh bran ban iaathuh ia kita kiba don hapoh ka da ong, "U Petros u don hakhmat ka jingkhaw!" <sup>15</sup>Kita ki parabangeit haba ki la iohsngew ia kane ki la ong ia ka, "Pha kren bieit aiu kumta!" Hynrei ka la iaï bteng ban iaathuh ba ka long kaba shisha. Kumta ki la pyrkhath, "U dei u angel jong u."

<sup>16</sup>Hynrei u Petros u la iaï tied ia kata ka jingkhaw. Bad haba kita ki bangeit ki la plie ia kata ka jingkhaw ki la sngewphylla eh ban shem ba u dei shisha u Petros. <sup>17</sup>Kumta u la ai dak ia ki ba kin sngapiar. Hadien ba u la dep iaathuh lut ha ki ia kaba la jia baroh. U la ong, "To iaathuh ia kane ha u Jakob bad ha ki parabangeit baroh." Ynda kumta u la mih noh bad u la leit sha kawei pat ka jaka.

<sup>18</sup>Te ha ka sngi kaba bud ki shipai ki la sngewkhuslai shikatdei eh. Ki da sngewlyngngoh kaei kaba la jia ia u Petros. <sup>19</sup>U Herod u la thwet kylleng hynrei um shym la shem satia ia u. Kumta hadien ba u la tohkit ia kita ki shipai u la hukum ban pyniap noh ia ki.

### Ka jingiap U Herod Agrippa

Hadien kata u Herod u la kynriah noh na Judia sha ka nongbah Kaisaria bad u la sah hangta katto katne por. <sup>20</sup>U Herod u dang bitar sah ia ki briew jong ka Tyros bad Sidon. Hynrei namar kine ki nongbah ki donkam jingbasa na ka ri jong u, kumta ki la leit ban iasuk bad u da kaba pynlong paralok bad u Blastos, u shakri ba syndah eh jong u syiem.

<sup>21</sup>U Herod ruh de u la mynjur ban ia kynduh bad ki. Te ha kata ka sngi u la phong da ki jaiñkup syiem ba itynnad tam. U la shong ha ka khet syiem bad kren sha uta u paidbah. <sup>22</sup>Ki paidbah te ki la risa jam, ki da ong, "Kane ka dei ka jingkren u blei ym shuh ka jong u briew!" <sup>23</sup>Hynrei



u Herod um shym la ai burom ia U Blei, kumta u angel U Trai u la shoh ia u bad naduh kata ka sngi u la kem pang. Ki ksain ki la bam ia ka doh jong u bad u la iap noh.

<sup>24</sup>Te ka khubor U Blei ka la nang saphriang sha ki briew baroh.

<sup>25</sup>Hadien ba u Barnabas bad u Saul ki la pyndep ia ka kam ha Jerusalem, ki la leit phai pat sha Antiok, ki da ialam lang ruh ia u Ioannis Markos lem bad ki.

### **La Jied Ia U Barnabas Bad Ia U Saul Sha Ka Kam Bakyrpang**

**13** <sup>1</sup>Te la don ha Antiok ki nongiathuhlypa bad ki nonghikai, u Barnabas, u Simeon ia uba la khot Niger, u Loukious na Kyrini, u Manain uba la heh la san bad u Herod u tetrark lem bad u Saul de. <sup>2</sup>Kine baroh katba ki dang shakri ia U Trai bad shah jingit, U Mynsiem jong U Trai u la kren ha ki, “To pynkyrpang ha nga ia u Barnabas bad ia u Saul sha kata ka kam kaba nga la khot ia ki.”

<sup>3</sup>Kumta hadien ba ka balang ka la shah jingit bad duwai bad buh ia la ki kti ruh ha u Barnabas bad u Saul, te ki la phah noh ia ki.

### **U Barnabas Bad U Saul Ha Kypros**

<sup>4</sup>Ia u Barnabas bad u Saul la phah noh da U Mynsiem Bakhuid, kine ki la leit noh sha ka nongbah Selukia bad nangta pat ki la leit da ka lieng sha ka dewlynnong Kypros. <sup>5</sup>Haba u Barnabas bad u Saul ki la poi ha Salamis ki la ialap ia ka ktien U Trai ha ki synagog ki Jiw bad u Ioannis Markos ruh u la don lang ban iarap ia ki.

<sup>6</sup>Te ki la leit lyngba ia ki phang jong ka dewlynnong haduh Paphos. Hangta ki la iakynduh ia uwei u Jiw ia uba la ju khot Bar-Jisu, u nongleh byrtong, u nongiathuhlypa balamler. <sup>7</sup>Une u la ju don lem bad u Serjios Paulos, u riew shemphang uba long ruh u Lat kata ka nongbah. Te uta u Lat u la khot sngewbha ia u Barnabas bad ia u Saul sha iing jong u namar ba u kwah ban iohsngew ia ka khubor U Blei. <sup>8</sup>Hynrei uta u nongleh byrtong, u Elimas ia uba la ju sin Bar-Jisu u la kren pyrshah ia ki bad pyrshang ruh ban pynpep ia u Lat ba un ngeit ha U Jisu. <sup>9</sup>Hynrei u Saul ia uba la pynkylla ia ka kyrteng sha u Paul, uba la dap da U Mynsiem Bakhuid u la peit shlip sha u Elimas, <sup>10</sup>bad u la ong, “Ah me u khun u Soitan, uba pun tang ki jingshukor bad ki buit bymman suda! Bad u nongshun ia ka jingshisha. Hato men ym wai shuh ban pynbakla ia ki lynti ba beit jong U Trai? <sup>11</sup>Mynta te ka kti U Trai kan long pyrshah

ia me bad men matlah shisyndon bad shipor men ym imat ei ei shuh wat ia ka jingshai jong ka sngi ruh.”

Kumta hi la tap matlah ia ki khmat u Elimas. U la iaid ruma shane shatai, u da wad jingiarap na kiwei pat ban lam lynti ia u. <sup>12</sup>Te haba uta u Lat u la iohi ia kane u la ngeit. U da sngewphylla ruh ia ki jinghikai kiba u la iohsngew shaphang U Trai.

### **U Paul Bad U Barnabas Ki Leit Sha Antiok Bad Pisidia**

<sup>13</sup>U Paul lem bad kita kiba bad u, ki la leit noh da ka lieng na Paphos. Te ki la poi ha Perga, ka nongbah ha Pamphilia. Dei hangta ba u Ioannis Markos u la iakhlad lok noh bad ki ha kaba u la leit phai pat sha Jerusalem. <sup>14</sup>Hynrei ki te ki la nangleit ha ka lynti na Perga bad ki la poi ha Antiok, ka nongbah ha Pisidia.

Ha ka sngi sabbaton ki la ialeit rung hapoh ka synagog ki Jiw bad shong ruh hangta. <sup>15</sup>Hangta la pule ia ka Hukum u Moses bad ia ki jingthoh jong ki nongiathuhlypa. Kumta ki nongialam jong kata ka synagog ki la phah ktien ha u Paul bad u Barnabas: “Ko para, lada phi don kano kano ka kyntien kyntu ia une u paitlang, sngewbha men kren.”

<sup>16</sup>Te u Paul u la ieng joit bad rah ia la ki kti, u da ong, “Ko rangbah Israel bad baroh kiba mane ia U Blei bashisha, to shahshkor ia nga! <sup>17</sup>U Blei u Israel u la jied ia ki kpa jong ngi bad u la pynman khraw ia ki mynba ki la shong kum ki nongwei ha ri Ijipt. Hadien kata u la ialam noh ia ki na kata ka ri da ka bor bah bakhrav jong u. <sup>18</sup>Bad ha kata ka ri khlaw u la iaishah slem bad ki jin sawpwh snem. <sup>19</sup>U Blei u la pynjot thiaw ia ki hynñiew ki jaitbynriew ha ka ri Kanaan bad u la aiti ia kata ka ri ha ki briew jong u. <sup>20</sup>Kane baroh ka la shim por kumba sawspah sanpewh snem.

“Te hadien kane, U Blei u la ai ruh ha ki ia ki nongbishar haduh ka por u nongiathuhlypa Samuel. <sup>21</sup>Hadien kata ki la ia pan ban ioh da u syiem. Te U Blei u la ai ha ki ia u Saul u khun u Kish uba na ka jait Benjamin bad u la synshar sawpwh snem. <sup>22</sup>Hadien ba la kyntait syiem ia u Saul, U Blei u la jied ia u Dabid ban long syiem halor ki Israel ia kaba u la phla ruh; ‘U Dabid, u khun u Jesse, u briew uba kum ka dohnud jong nga, u ban leh ia ka mon jong nga baroh.’

<sup>23</sup>Kumba u la kular, U Blei u la sei na u symbai u Dabid ban long u nongpynim jong ngi. Bad uta u symbai u dei U Jisu.

<sup>24</sup>Shuwa ka jingwan jong u, u Iöannis u la dep iathuhlypa kumno ba ki Israel ki dei ban leh. U la ong, ba donkam ban pynbaptis ia ki kum ka dak jong ka jingkylla kaba kut. <sup>25</sup>Haba u Iöannis u dang pyndep ia la ka kam, u la ong, 'Phi pyrkhata ba nga dei uei! Ngam dei U Mesaiiah hynrei uta keiñ uba wan nadien, uba kam bit ia nga wat tang ban loit ia ki sandal jong u ruh.' <sup>26</sup>'Ko ki para jong nga bad ki khun ki ksiew u Abraham, lem bad ma phi baroh ki nongmane ia U Blei bashisha, to sngap! Ha ngi keiñ la phah ia kane ka khubor ka jingpynim. <sup>27</sup>Hynrei ki Jiw lem bad ki nongialam jong ki kiba ha Jerusalem kim shym la ithuh ba U Jisu u dei uta U Nongpynim. Kim shym la sngewthuh ruh ia ki ktien ki nongiathuhlypa ba la kren shaphang jong u ia kiba la ju pule man ka sngi Sabbaton. Pynban ki la pynrem ia U Jisu bad haba ki la leh ia kane ki pyndep ia ki ktien jong ki nongiathuhlypa. <sup>28</sup>Wat la kim shym la shem daw ei ei ban rai pynrem ia u, pynban ki la dawa na u Pilat ban pyniäp noh ia u.

<sup>29</sup>'Kine ki Jiw ki la pyndep ia kita baroh ba la thoh shaphang ki jingshah U Jisu. Haba ki la pynhiar ia u na ka diengphna ki la buh ia u ha ka jingtep. <sup>30</sup>Hynrei U Blei u la pynmihpat ia u na kiba iäp! <sup>31</sup>Hadien kane, la iöhi ia u bun sngi da kita kiba la leit lang bad U Jisu na Galilaia sha Jerusalem. Bad mynta ki la long ki sakhi jong u sha ki brierw jong ngi.

<sup>32</sup>'Ngi iathuh ha phi ia ka Khubor Babha shaphang kata ka jingkular U Blei kaba u la ai ha ki kpa tymmen jong ngi. <sup>33</sup>Naba ngi long ki khun jong ki bad U Blei u la pyndep ia kane ka jingkular ha ngi da kaba u la pynmihpat ia U Jisu na kiba iäp. Kumba la thoh ha ka Salm kaba ar:

'Me long U Khun jong nga.  
Ha kane ka sngi nga la long U Kpa  
jong me.' *Salm 2:7*

<sup>34</sup>U Blei u la pynmihpat ia U Jisu na kiba iäp. Bad U Jisu un ym leit phai pat sha ka jingtep ia ka ban pyut. U Blei u la ong ruh,

'Ngan ai ha phi ia kita ki jingkular  
bashisha bad bakhuid  
Kumba nga la kular ha u Dabid.'

*Isaiah 55:3*

<sup>35</sup>Hynrei ha kawei pat ka Salm u la ong,  
'Un ym shah ia uta U Bakhuid jong u  
ban pyut ha ka jingtep.' *Salm 16:10*

<sup>36</sup>'U Dabid u la leh ia ka mon U Blei mynba u dang im. Hadien ba u la iäp la tep ia u kum ia ki kpa tymmen jong ngi bad ka met jong u ka la pyut ha ka jingtep! <sup>37</sup>Hynrei uta ia uba U Blei u la pynmihpat na kiba iäp um shym la pyut noh ha jingtep. <sup>38-39</sup>Ko para, to tip mynta ia kane ka jingshisha kaba ngi ialap sha phi. Ba lyngba U Jisu keiñ phi lah ban iohpdang ia ka jingmab ia ki pop jong phi. Ka hukum u Moses kam lah ban pyllait ia phi na ki pop. Hynrei mynta phi lah ban ioh ka hok ha U Blei tang lada phi ngeit ha U Jisu. <sup>40</sup>Kumta to sumar, ioh ba kata kaba la kren da ki nongiathuhlypa kan wan urlong ha phi:

<sup>41</sup>'To shahshkor, ah phi kiba artatien!  
Phi sngewphylla bad phi phai noh  
ruh ia ka ban iäp;  
namar ha kita ki sngi jong phi,  
Ngan leh ia kiei kiei kiba phin ym  
ngeit.  
Shisha keiñ phin ym ngeit ia kata,  
Wat lada la pynshai ia ka ha phi  
ruh!'" *Habakkuk 1:5*

<sup>42</sup>Haba u Paul bad u Barnabas ki la iamih noh na kata ka synagog, u paidbah u la kyrpad ia ki ban wan biang ha ka sngi Sabbaton kaba bud khnang ban ioh pynshai shuh shuh shaphang kine kiei kiei. <sup>43</sup>Hadien ba la wai ka jingialang, bun na uta u paidbah ki la bud ia u Paul bad u Barnabas, kynthup ruh ki Jiw bad kita ki brierw kiba riewblei kiba la kylla sha ka niam Jiw ia ka ban mane ia U Blei bashisha. Te u Paul bad u Barnabas ki la kyntu ia ki ba kin iaineh skhem ha ka jingaiei U Blei.

<sup>44</sup>Te ha ka sngi Sabbaton kaba bud, la jan baroh shi shnong ki la iawan lang ban shahshkor ia ka ktien U Trai. <sup>45</sup>Te haba kita ki Jiw kiba don hangta ki la iöhi ia uta u paidbah ba bun, ki la sngew pihuiñ eh. Ki da kren bein ruh ia ki jinghikai jong u Paul. <sup>46</sup>Hynrei u Paul bad u Barnabas ki la kren da ka jingshlur. Ki da ong, "Ka dei ia ngi ban iathuh nyngkong eh ha phi ki Jiw ia ka khubor U Blei, hynrei phim mon ban shahshkor ia ka. Ka paw shai ba phim long kiba bit ban ioh ia ka jingim bymjukut, mynta te ngin phai khmat noh sha ki Jentil. <sup>47</sup>Kane kaba U Trai u la kren ha ngi:

'Nga la pynlong ia phi kum ka jingshah  
na ka bynta kiwei pat ki  
jaitbynriew,  
ban pyni sha baroh ki brierw ka

pyrthei ia ka lynti ban iohlait im.”  
Isaiah 49:6

<sup>48</sup>Te kita ki Jentil kiba don hangta haba ki la iohsngew ia kane, ki la kmen shikatdei eh. Ki la ainguh namar kata ka ktien U Trai, bun ruh de ki la ngeit ia kata ka ktien ba la kren. Kine ki dei kita kiba la jied ia ka ban ioh ia ka jingim bymjukut.

<sup>49</sup>Kumta ia ka ktien U Trai la ialap kylleng kata ka ri. <sup>50</sup>Hynrei ki Jiw kiba don hangta ki la kynshoit ia ki kynthei ba kham pawkhat bad ki riew rangbah jong kata ka shnong ban ialeh pyrshah ia u Paul bad u Barnabas bad la beh noh ruh ia ki na kata ka shnong. <sup>51</sup>Kumta u Paul bad u Barnabas haba ki la kynther noh ia ka khyndew na ki kjat jong ki, ki la leit noh sha ka nongbah Ikonium. <sup>52</sup>Hynrei la pyndap ia ki synran U Trai ha Antiok da ka jingkmn bad da U Mynsiem Bakhuid.

#### U Paul Bad U Barnabas Ha Ikonium

**14** <sup>1</sup>Te u Paul bad u Barnabas ki la leit sha Ikonium. Bad kumba ki la leh ha Antiok, hangta ruh ki la rung ha ka synagog jong ki Jiw bad ki da ialap ruh ha ki Jiw bad ki Grik, bun ruh na ki, ki la ngeit ia ka jingialap jong ki. <sup>2</sup>Hynrei don ruh napedng kita ki ruh kiba la kyntait ban ngeit, ki da kynshoit ruh ia ki Jentil hangta ban ieng ialeh pyrshah ia kita kiba la ngeit. <sup>3</sup>Kumta u Paul bad u Barnabas ki la shong kham slem hangta bad da ka jingsngewshlur ki la ialap ia ka kyrteng U Trai bad ia ka jingaiei U Blei. U Trai ruh u da pynskhem ia ka ktien kaba ki ialap da ki kambah bad ki dak khyllah lyngba jong ki. <sup>4</sup>Hynrei la don ruh ha kata ka shnong katto katne ki brieve kiba la iasoh bad kita ki Jiw ki bymngseit ia u Paul bad u Barnabas. Katba katto katne pat ki la bud ia ki apostol. Kumta ka nongbah ka la don ha ka jingiapait.

<sup>5</sup>Kita ki Jiw kiba la don hangta, kumjuh ruh ki nongialam jong ki lem bad katto katne ki Jentil, ki la thmu ban pyniap noh ia u Paul bad u Barnabas da kaba lynthem maw. <sup>6</sup>Ki te haba ki la bna ia kane ki la phet noh na kata ka nongbah bad ki la leit lyngba ka Lystra bad Derbi, ki nongbah kiba ha Lykaonia bad sawdong kita kiwei pat ki phang. <sup>7</sup>Ki da ialap ia ka Gospel hangta ruh.

#### U Paul Ha Lystra Bad Derbi

<sup>8</sup>Te la don ha Lystra uwei u brieve uba dkoh ki kjat naduh myndangkha. <sup>9</sup>U da shong

bad shahshkor dngong ia ki jingialap u Paul. Te haba u Paul u la khmih shaiñ sha u, u la iohi ba une u brieve u ngeit ba U Blei u lah ban pynkhiah ia u. <sup>10</sup>Kumta u la pyrta sha uta uba dkoh, “To ieng joit ha la ki kjat!” Uta u brieve te u la rynsied bad u la sdang ban iaied.

<sup>11</sup>Te haba uta u paidbah u la iohi ia kata ka kambah ba la leh da u Paul, ki la pyrta da ka sur bajam ki da ong ha ka ktien Lykaonia, “Ki blei ki la wan hiar hapdeng jong ngi ha ka dur jong ki brieve!” <sup>12</sup>Te ki la khot da ka kyrteng “Zeus” ia u Barnabas bad “Hermes” ia u Paul, namar u dei u nongkren ba kham hakmat eh. <sup>13</sup>Namar ba ka templ u blei Zeus ka la long hajan ka nongbah, u lyngdoh jong kata ka templ u la wallam ia ki mrad bad ki syntiew ha ki khyrdop ka nongbah bad uta u lyngdoh lem bad uta u paidbah baroh ki la pynkhreh ban ai jingknia ainguh sha u Paul bad u Barnabas.

<sup>14</sup>Hynrei hadien ba u Barnabas bad u Paul ki la sngewthuh ia kaei kaba kita ki brieve ki thmu ban leh, ki la kad ia la ki jaiñkup,<sup>a</sup> ki da mareh sha uta u paidbah bad ki la pyrta: <sup>15</sup>“Ko rangbah, balei phi leh kumne? Ngim dei ki blei kumba phi pyrkat, hynrei tang ki brieve kiba kum ma phi hi. Ngi la wan ban iathuh ha phi ia ka Khubor Babha khnang ba phin iohlait noh na kine kiei kiei ki bym don jingmut satia. To phai noh sha U Blei uba im, uta keiñ uba la thaw ia ka bneng bad ia ka khyndew, ia ki duriaw bad ia kiei kiei baroh kiba don ha ka.

<sup>16</sup>“Ha kaba mynnyngkong U Blei u la shah ia ki jaitbynriew ba kin iaied ha la ka jong ka mon jong ki hi. <sup>17</sup>Hynrei U Blei u iai don ban leh ia kiei kiei ki babha ban pynpaw ba u long uba shisha. U ai ha phi ia u slap bad ia ki aiom ba seisoh bad kyrhai ruh ka jingbam kat ban pyndap ia ki dohnud jong phi da ka jingkmn.”

<sup>18</sup>Wat hadien ba u Paul bad u Barnabas ki la ong ia kine kiei kiei ruh, da kaba eh ki la lah ban pynsangeh ia uta u paidbah na kaba ai jingknia sha ki.

<sup>19</sup>Hynrei la poi hangta ki Jiw kiba na Antiok bad Ikonium kiba la pynkhiah ia uta u paidbah ban ieng pyrshah ia u Paul. Kumta ki la lynthem maw ia u bad ring noh ia ka met jong u shabar ka nongbah da kaba pyrkat ba u la iap. <sup>20</sup>Hynrei haba kita ki synran ki la ieng tawiar ia u,

<sup>a</sup> 14:14 kad ia la ki jaiñkup Kane ka pynpaw ia ka jingbitar shla jong ki.

u la khie joit bad u la leit shapoh kata ka shnong. Ha kaba lashai u la leit noh sha Derbi lem bad u Barnabas.

### Ka Jingwanphai Sha Antiok Ha Syria

<sup>21</sup>Te ki la ialap ia ka Gospel ha Derbi bad bun ruh ki la ngeit ha U Jisu. Haden kata ki la leit pat sha ka nongbah Lystra, Ikonium bad sha Antiok. <sup>22</sup>Bad ki la ai mynsiem ia ki parabangeit ha kita ki shnong, ba ka dei ia ki ban ieng skhem ha ka jingngeit da kaba shaniah lut ha U Blei. Bad ki la iathuh ruh, “Ba ka dei ia ngi ban bsut sha ka hima U Blei lyngba shibun ki jingjynjar.” <sup>23</sup>Te ki la thung ia ki basan ha man la ki balang bad haba ki la duwai lem bad kaba shah jingit ki la aiti noh ia ki ha U Trai Jisu ha uba ki la lah ngeit.

<sup>24</sup>U Paul bad u Barnabas ki la leit lyngba ia ka Pisidia bad ki la poi ha Pamphilia. <sup>25</sup>Ki la ialap ruh ia ka ktien U Blei ha Perga hadien kata ki la leit hiar sa sha ka nongbah Atalia. <sup>26</sup>Nangta pat ki la leit da ka lieng sha Antiok kaba ha Syria. Kane ka dei ka nongbah kaba ki bangeit ki la aiti noh ia ki ha ka jingsumar U Blei bad ba la phah noh ia ki ban trei ia kata ka kam. Mynta te ki la lah pyndep ia ka.

<sup>27</sup>Haba u Paul bad u Barnabas ki la poi, ki la ialum lang ia ka balang. Ki la iathuh ha ki ia kata baroh kaba U Blei u la leh lyngba jong ki. Ki da ong, “U Blei u la plie wang ia ka jingkhang na ka bynta ki Jentil ruh ba kin ioh ngeit!” <sup>28</sup>Ki te ki la iaisah kham slem hangta ryngkat bad ki nongbud jong U Trai.

### Ka Jingiakynduh Lang Ha Jerusalem

**15** <sup>1</sup>Te la don katto katne ki brieve kiba la wan sha Antiok na Judia kiba la sdang ruh ban hikai ia kita ki bangeit Jentil, ki da ong, “Phim lah ban iohlait im lynda la otsher ia phi katba kum ka hukum u Moses.” <sup>2</sup>U Paul bad u Barnabas ki la pyrshah jur ia kata ka jinghikai bad ki la iasaid nia ruh bad ki shaphang kata. Kumta ka balang ka la rai ban phah ia u Paul, u Barnabas lem bad katto katne ngut ban leit kren ia kane ka kam ryngkat bad kiwei pat ki apostol bad ki basan ha Jerusalem.

<sup>3</sup>Ka balang te ka la pynbit pynbiang ia ka jingleit jong ki. Kita ki la leit noh lyngba ka ri Phoiniki bad Samaria, ha kaba ki la iathuh hangta kumno ki Jentil ruh ki la phai sha U Blei bashisha. Kane ka khubor ka la pynkmen eh ia kita ki parabangeit hangta. <sup>4</sup>Te haba ki la iapoi ha Jerusalem,

la pdiang sngewbha ia ki da ki apostol, ki basan lem bad ka balang hi baroh kawei. U Paul bad u Barnabas lem bad kiwei de ki la iathuh ha ki ia kiei kiei baroh kiba U Blei u la lah leh lyngba jong ki. <sup>5</sup>Katto katne na ki bangeit ha Jerusalem kiba dei na ka kynhuh ki Pharisi ki la ieng bad ki la ong, “Ka dei ia ki bangeit Jentil ban otsher bad ban kohnguh ia ka hukum u Moses baroh!”

<sup>6</sup>Kumta ki apostol bad ki basan ki la ialum lang ban tai sani bha ia kane ka jingeh. <sup>7</sup>Haden ka jingiatui kaba la slem bha, u Petros u la ieng joit bad u la ong sha ki, “Ko para, nga thikna ba phi dang kynmaw kumno ba ka la jia ha ki sngi kiba mynnyngkong mynba U Blei u la jied ia nga napdeng jong phi ban leit ialap ia ka Gospel sha ki Jentil. Bad dei lyngba jong nga kine ki brieve ki la iohsngew ia ka Gospel bad ki la ngeit. <sup>8</sup>U Blei uba tip ia ki jingmut jong ki brieve, haba u la pdiang ia ki u da pynskhem ruh ia kane da kaba u la ai ia U Mysiem Bakhuid kumba u la leh ha ngi. <sup>9</sup>Ha U Blei, ym don kano kano ka jingpyniapher hapdeng jong ngi bad ki. Mynba ki la ngeit, u la pynkhuid ia ki dohnud jong ki. <sup>10</sup>Namar kata, balei phi kwah ban buh ia ka lyngkor kaba khia ha ka ryndang jong ki? Hato phi pyrshang ban pynkhih bitar ia U Blei? Wat ma ngi hi ruh lymne ki kpa jong ngi ngim lah ban kit ia kata ka lyngkor kaba khia. <sup>11</sup>Em, ym kumta namar ngi ngeit ba da ka jingaei U Trai Jisu la pynim ia ngi bad kumjuh ia ki ruh.”

<sup>12</sup>Te baroh ki la ia sngap jar noh bad ki la shahshkor ia u Paul bad u Barnabas katba ki dang iathuh ia ki kambah bad ki jingphylla kiba U Blei u la lah leh lyngba jong ki hapdeng ki Jentil. <sup>13</sup>Haden ba ki la dep iathuh, u Jakob u la ong, “Ko para to sngap ia nga. <sup>14</sup>Phi la iohsngew kumno u Simon Petros u la iathuh ha ngi ba ka long ka sien kaba nyingkong eh ba U Blei u la pynpaw ia la ka jingieid sha ki Jentil bad pdiang ruh ia ki ban long u paitlang jong u. <sup>15</sup>Ki nongiathuhlypa ruh ki la kren ia kane:

- <sup>16</sup> ‘Haden kane ngan wan phai pat.  
Bad ngan pynieng pat ia ka  
tabernakl u David kaba la kyllon.  
Ngan tei pat ia kata kaba la pynpra  
bad ngan pynlong ia ka kaba  
thymmai.

- <sup>17</sup> Te kiba sah na kita ki brieve kin wad ia  
U Trai U Blei,  
kita kiwei ruh ki jaitbynriew kiba  
long u paitlang jong nga.  
U Trai u la kren ia kane.

Bad dei ma u, uba la leh ia kine kiei  
kiei baroh.' *Amos 9:11-12*

<sup>18</sup> 'Uba la pynbna ia kine kiei kiei baroh  
naduh kaba mynnyngkong.'

<sup>19</sup> "Kumta ngim dei ban bankhia ia kito  
ki Jentil kiba la ngeit bad phai sha U Blei.  
<sup>20</sup> Pynban, ka dei ia ngi ban thoh sha ki ba  
kim dei ban leh ia kine kiei kiei kum:

Kaba bam ia ki jingbam ba la knia ha  
ki bleithaw.

Ban kiar na ki jingklim sih.  
Ban ym bam ia ki mrad ba shu  
khyrwait lymne ia ka snam.

<sup>21</sup> Kam bit ia ki ban leh ia kine kiei kiei  
baroh, namar haduh mynta ki don ki brierw  
kiba hikai ia ka hukum u Moses ha man  
la ki nongbah da kaba ia i puleruh ha ki  
synagog man ka sngi Sabbaton."

#### **Ka Shithi Sha Ki Bangeit Jentil**

<sup>22</sup> Ki apostol, ki basan lem bad ka balang hi  
baroh kawei ki la sngewdei ban phah brierw  
napdeng ka kynhun jong ki ban synran ia  
u Paul bad u Barnabas ban leit sha Antiok.  
Kumta ki la jied ia u Judas, ia uba la ju  
khot Barsabas bad ia u Silas, ki brierw kiba  
la niewburom da ki parabangeit. <sup>23</sup> Kumta  
ki la phah noh ia ki, ryngkat bad kata ka  
shithi ba la thoh:

Na ki apostol bad ki basan, kiba long ki  
hynmen,

Sha kita ki Jentil kiba la wan sha ka  
jingngeit, kiba don ha Antiok, ha Syria bad  
ha Kilikia.

"Ki para baieid eh:

<sup>24</sup> Ngi la bna ba don ki brierw napdeng  
jong ngi kiba la wan hi sha phi bad kaei  
kaba ki la hikai ka la pynkhuslai ia phi,  
hynrei ngim shym la phah ia ki ban leh  
ia kane. <sup>25</sup> Te ngi la mynjur ban phah sha  
phi ia ki rangbah lem bad ki para baieid eh  
jong ngi, u Barnabas bad u Paul. <sup>26</sup> Kiba la  
aiti lut ia la ka jingim ban shakri ia U Trai  
Jisu. <sup>27</sup> Bad ngi la phah lang ruh ia u Judas  
bad u Silas lem bad ki. Kin sa iathuh ha phi  
ia kine kijuh kiei kiei. <sup>28</sup> Ngi mynjur lem  
bad U Mynsiem Bakhuid ban ym bankhia  
ia phi, hynrei tang ia kita kiei kiei kiba  
donkam eh:

<sup>29</sup> Ban ym bam ia ki jingbam ba la knia  
ha ki bleithaw.

Ban ym bam ruh ia ki mrad ba shu  
khyrwait lymne ia ka snam.  
Bad kiar na ki jingklim sih.  
Shisha lada phi sumar ialade na kine,  
phin man bha keifi.

Khublei shibun."

<sup>30</sup> Kumta u Paul, u Barnabas, u Judas,  
lem bad u Silas ki la mih na Jerusalem  
bad leit sha Antiok. Hangta ki la lum ia  
baroh ki bangeit bad ki la ai ha ki ia kata  
ka shithi. <sup>31</sup> Te haba ki la pule, la pynkmen  
bad pynntgen ia ki, da kata ka shithi.  
<sup>32</sup> U Judas bad u Silas, kiba long ruh ki  
nongiathuhlypa ki la kren shibun kiei  
kiei ban ai mynsiem bad pynskhem ia ka  
jingngeit jong ki. <sup>33</sup> Haden katto katne por  
ba ki la sah hangta, ki parabangeit ki la  
phah noh ia u Judas bad u Silas ryngkat  
bad ki jingkyrkhu jong ka jingsuk ban  
leit phai pat sha kita kiba la phah ia ki.  
<sup>34</sup> Hynrei u Silas u la kut jingmut ban  
iaisah hangta.

<sup>35</sup> Hynrei u Paul bad u Barnabas ki la  
nang iaisah ha Antiok. Ma ki lem bad kiwei  
pat ki la hikai ha ki parabangeit bad ki la  
ialap ruh ia ka Gospel U Trai sha kiwei pat.

#### **U Paul Bad U Barnabas Ki Iakhlad Lok**

<sup>36</sup> Khyndiat sngi hadien kata, u Paul u la  
ong ha u Barnabas, "Ka dei ia ngi ban leit  
jngoh ia ki parabangeit ha kita ki shnong  
kiba ngi la ialap, ban tip kumno ki ia long."

<sup>37</sup> Te u Barnabas u la kwah eh ban ialam  
lang ia u Ioannis Markos ban leit lem bad  
ki. <sup>38</sup> Hynrei u Paul um mynjur ia kata ka  
jingai jingmut, namar ba u Ioannis Markos  
u la iehnoh ia ki ha Pamphilia bad um  
shym la leit lem bad ki sha kata ka kam  
ba la phah nyngkong. <sup>39</sup> Kumta la mih  
ka jingiana bajur hapdeng u Paul bad u  
Barnabas shaphang kane, kat haduh ba ki  
la iakhlad lok noh la ka jong ka lynti. Te  
u Barnabas u la leit noh da ka lieng lem  
bad u Ioannis Markos sha Kypros. <sup>40</sup> U Paul  
de u la jied ia u Silas ban leit lem bad u.  
Te ki bangeit ha Antiok ynda ki la lah aiti  
ia u Paul ha ki kti U Trai, ki la phah noh  
ia u. <sup>41</sup> Kumta u Paul bad u Silas ki la leit  
lyngba ki phang jong ka Syria bad Sisilia,  
ki da pynskhem ruh ia kita ki balang ha  
kita ki jaka.

#### **U Timothi U La Synran Ia U Paul Bad U Silas**

**16** <sup>1</sup> U Paul u la leit sha ka nongbah  
Derbi bad nangta sha Lystra, ha kaba

la don u synran uba kyrnteng u Timothy. Ka kmie u Timothy ka dei ka Jiw kaba la ngeit, hynrei u kpa jong u, u la long u Grik. <sup>2</sup>Te kita ki parabangeit ha Lystra bad Ikonium ki la phla babha shaphang jong u. <sup>3</sup>U Paul u la mon eh ban ialam lang ia u Timothy ha kata ka jingleit, hynrei ki Jiw kiba ha kita ki phang ki tip ba u kpa jong u u dei u Grik. Kumta u Paul u la otsher shuwa ia u Timothy namar kita ki Jiw.

<sup>4</sup>Hadien kata u Paul lem bad kita kiba bad u, ki la leit lyngba kita kiwei pat ki shnong. Ki la aiti ruh ha ki ban sumar bad kohnguh ia kita ki rai ba la thoh da ki apostol bad ki basan ha Jerusalem. <sup>5</sup>Kumta ki balang ki la nang khlaif ha ka jingngeit bad ki parabangeit ruh ki la nangroi ha ka jingbun brieve ha la ka sngi.

### La Khot Ia U Paul Ban Leit Sha Makedonia

<sup>6</sup>U Paul lem bad kita ki lok jong u ki la ialeit noh sha ki phang jong ka Phrygia bad Galatia namar ba U Mynsiem Bakhuid u la pynpep ia ki ban ialap ia ka ktien U Blei ha Asia. <sup>7</sup>Haba ki la iapoi hajan u pud ka Mysia, ki la pyrshang ban leit sha Bithynia, hynrei U Mynsiem jong U Jisu um shah ia ki ban leit shata. <sup>8</sup>Kumta ki la iaid lait noh ia ka Mysia bad leit sha ka nongbah Troas.

<sup>9</sup>Ha kata hi ka miet u Paul u la iohipaw. Uwei u brieve na Makedonia u la wan ban kyrpad ia u Paul bad u la ong, "To wan sha shiliang sha Makedonia bad to iarap ia ngi." <sup>10</sup>Te haba u Paul u la iohi ia kata ka jingithuhpaw, shisyndon ngi la khreh ban leit sha Makedonia. Ngida sngewthuh shai ba U Blei u kwah ia ngi ban leit ialap ia ka Gospel sha kito ki brieve.

### Ka Jingkylla Kaba Mut Jong Ka Lydia

<sup>11</sup>Ngila mih noh na Troas da ka lieng ban leit sha ka dewlynnong Samothraki. Te kum lashai ngi la leit pat sha Neapolis. <sup>12</sup>Hadien kata ngi la leit sha Philippi, ka nongbah ba pawnam eh jong ka Makedonia ia kaba la buhai shnong da ki nong Rom. Bad ngi la sah hangta kumba katto katne sngi.

<sup>13</sup>Ha ka sngi Sabbaton ngi la leit mih noh na ka nongbah, sharud wah. Ngila wad ruh ia ka jaka ba kham kyrpang ban duwai. La don katto katne ki kynthei kiba la ialum hangta, kumta ngi la shong hangta bad iasyllok ruh bad ki. <sup>14</sup>La don ruh hangta ka kynthei kaba kyrnteng ka Lydia kaba na ka shnong Thiatira, ka nongdie jaiif saw bthuh. Ka dei ruh ka brieve kaba mane ia U Blei. Te

katba ka dang shahshkor ia u Paul, U Trai u la plie noh ia ka dohnud jong ka bad ka la ngeit ruh ia ki jingsyllok jong u. <sup>15</sup>Kumta la pynbaptis ia ka lem bad ki bahaiing jong ka baroh. Hadien kane ka la khot sngewbha ia ngi sha iing, ka da ong "Lada phi la niew ia nga ka bangeit ha U Trai Jisu, to wan bad to sah ha iing jong nga." Ka la pynkohnguh ruh ia ngi ban sah ha iing jong ka.

### U Paul Bad U Silas Ha iingbyndi

<sup>16</sup>Te ha kawei ka sngi katba ngi dang ialeit sha ka jaka duwai, ngi la iaknynduh ia kawei ka shakri kaba don u mynsiem <sup>17</sup>bad ka bor ban batai kupar ia ka ban sa jia bad da kaba leh kumne ka ju pynkamai spah ia la ki kynrad. <sup>17</sup>Te ka la bud ia u Paul bad ia ngi ka da pyrta jam, "Kine ki brieve ki long ki shakri jong U Blei bahakhlieh tam eh! Kiba pynbna ha phi ia ka lynti jingpynim!" <sup>18</sup>Kane ka brieve ka la iai leh kumta bun bun sngi. Kane ka la pyndik ia u Paul, kumta haba u la phai sha ka u la kren sha uta u mynsiem, "Ha ka kyrnteng U Jisu Khrist nga hukum ia me ban mih noh na ka!" Kumta hi uta u mynsiem u la mih noh na ka.

<sup>19</sup>Te haba kita ki kynrad jong kata ka khynnah ki la iohi ia kane, ki la sngewthuh ba mynta te kin ym ioh kama spah shuh na ka. Kumta ki la kem ia u Paul bad ia u Silas bad ki la ring noh ia ki hapteng u paidbah ban ialam sha ki nongsynshar. <sup>20</sup>Te haba la pynieng ia ki hakmat ki nongsynshar Rom, ki la ong, "Kine ki brieve kiba long ki Jiw ki la pynkulmar ia ka shnong jong ngi. <sup>21</sup>Ki da hikai ruh ia u paidbah ban leh ia kita kiei kiei kiba long pyrshah ia ka dustur jong ngi kum ki nong Rom."

<sup>22</sup>Uta u paidbah lem bad ki rangbah nongsynshar haba ki la khieh bitar eh ia u Paul bad u Silas, ki la kad ia la ki jainphong bad ki la hukum ban sympat ia ki da ki thri. <sup>23</sup>La sympat jur ia ki bad la aiti noh ruh ban set byndi ia ki. Bad u nongsynshar u la bthah ia u rangbah nongap byndi, "Ban ap pyrkhing bha ia ki!" <sup>24</sup>Te haba uta u nongap byndi u la ioh kat kata ka hukum, u la set noh ia u Paul bad ia u Silas ha ka iingbyndi ba kham shapoh bad u da khum skhem bha ia ki kti ki kjat jong ki ha ki dieng song.

<sup>25</sup>Hamar kaba shiteng synia u Paul bad u Silas ki la duwai bad rwai iaroh ia U Blei.

<sup>a</sup> 16:16 mynsiem U mynsiem na u ksuid u ba ai ia ka jingpyntip bakyrpang.

Kiwei pat ki nongsah byndi ki la iöhsngew ia ki. <sup>26</sup>Kynsan kynsan u jumai bajur u la khynñiuh kat haduh ba la pynkhih ia ki nongrim jong kata ka iingbyndi. Te ki jingkhang jong ka iingbyndi ki la plie wang bad ki kynjri ba la khum ia ki koidi ruh ki la dkut lut baroh. <sup>27</sup>Te haba uta u rangbah nongap byndi u la khie bad u la iöhi ba ki jingkhang jong ka iingbyndi ki la plie rynghang, u nang tharai ba ki koidi ki la phet lut baroh. Kumta u la sei ia la ka waitlam ban pyniäp nah iälade. <sup>28</sup>Hynrei u Paul u la pyrta, “Wat pynmynsaw iälade! Ngï baroh ngï don hangne!”

<sup>29</sup>Uta u rangbah nongap byndi u la hukum ban wallam ia ka jingshai bad u la mareh shapoh, u la kyuih da ka jingsheptieng bad u la dem hakhmat u Paul bad u Silas. <sup>30</sup>Te haba u la iälam noh ia ki shabar u la ong, “Ko rangbah, kaei kaba nga dei ban leh ba ngan iöh im?”

<sup>31</sup>Ki te ki la ong ha u, “To ngeit ha U Jisu uba U Trai te yn pynim ia me bad ia ka iing jong me.” <sup>32</sup>Kumta u Paul bad u Silas ki la iälap ia ka ktien U Trai ha u bad ha baroh ki bahaiing jong u. <sup>33</sup>Te ka la miet eh bad uta u rangbah nongap byndi u la shim ia u Paul bad u Silas bad u la sait ia ki jingmong jong ki. Hadien kata la pynbaptis ia uta u nongap byndi lem bad kita kiba bad u. <sup>34</sup>Hadien kane uta u rangbah nongap byndi u la iälam noh ia u Paul bad u Silas sha la iing bad u la ai jingbam ia ki ban bam. Ki baroh te ki la iäkmen eh namar ba ki la ngeit ha U Blei.

<sup>35</sup>Te ha ka step kaba bud, ki nongsynshar Rom ki la phah shipai ban bthah ia u rangbah nongap byndi ban pyllait noh ia u Paul bad u Silas.

<sup>36</sup>Uta u nongap byndi u la ong ha u Paul, “Ki nongsynshar ki la phah ktien ha kine ki shipai ban pyllait noh ia phi, te phi lah ban iälait noh ha kaba suk.”

<sup>37</sup>Hynrei u Paul u la ong ha kita ki shipai, “Ki nongsynshar kim shym la shem daw ei ei ban pynshitom ia ngi, hynrei ki la sympat ia ngi hakhmat u paidbah bad set byndi ruh ia ngi wat haba ngi dei ki trai shnong Rom. Mynta pat ki mut ban phah leit noh jar jar ia ngi nangne. Em, ki dei ban wan dalade bad iälam ia ngi shabar!”

<sup>38</sup>Te kita ki shipai ki la leit lam ia kane ka khubor ha ki nongsynshar. Ki te haba ki la iöhsngew ba u Paul bad u Silas ki dei ki trai shnong Rom, ki la sheptieng shikatdei eh. <sup>39</sup>Kumta ki la leit ban panmab na ki bad haba ki la iälam noh shabar ka iingbyndi ki la kyrpad ia ki ban

mih noh na kata ka nongbah. <sup>40</sup>Hynrei u Paul bad u Silas haba ki la mih noh na iingbyndi, ki la leit sha ka iing jong ka Lydia. Te haba ki la iashem ia ki parabangeit hangta ki la ai mynsiem ia ki. Nangta ki la leit noh pat.

### U Paul Bad U Silas Ha Thessaloni

**17** <sup>1</sup>U Paul bad u Silas ki la leit lyngba ia ki nongbah Amphipolis bad Appollonia. Ki la wan poi sha ka nongbah Thessaloni, ha kaba la don ka synagog jong ki Jiw. <sup>2</sup>Te u Paul kumba u ju leh u la leit rung ha kata ka synagog bad kumba lai sngi Sabbaton u la iäsyllök ha ki na ki jingthoh Bakhuid. <sup>3</sup>Da kaba pynshai sha ki ba ka dei ia U Mesaiah ban iäp bad ban miapat na kiba iap. U la ong ruh, “Une U Jisu uba nga la iälap sha phi u dei uta U Mesaiah.” <sup>4</sup>Te la don na ki Jiw kiba la ngeit ia u Paul bad u Silas, ki la kut jingmut ban iäsoh bad ki. Kumjuh ruh, ki Grik ba riewblei lem bad ki kynthei ba pawnam ki la iäsoh bad ki.

<sup>5</sup>Hynrei la don napdeng kita ki Jiw ki bymngreit kiba la sngew pihuiñ eh, ki da ainong ha ki brieve ba runar bad kita ki la sdang ban pynkhihwin ia kata ka nongbah. Ki la iälum paidbah ban thwet ia u Paul bad u Silas, te ki la leit ha ka iing jong u Jason ban sei noh ia ki hakhmat uta u paidbah. <sup>6</sup>Hynrei haba kim shym la shem ia ki, ki la tan ia u Jason bad ki parabangeit hakhmat ki nongsynshar. Ki da pyrta ruh, “Kine ki brieve kiba la pynkulmar kylleng ka pyrthei mynta ki la wan poi ha kane ka shnong jong ngi ruh!” <sup>7</sup>Bad u Jason u la ai jaka sah ia ki ha iing jong u. Kine ki dei kita kiba iälöh pyrshah ia u Kaisar. Ki da ong ba u don uwei pat u syiem ia uba la khot U Jisu.”

<sup>8</sup>Haba ki rangbah jong kata ka shnong ki la iöhsngew ia kane, ki la khuslai shikatdei eh. <sup>9</sup>Te ynda ki la phah bahjamin ia u Jason bad ia kita ki parabangeit, ki la maham tynggeh ia ki ba kim bit shuh ban wanrah jingkulmar. Hadien kata la pyllait noh ia ki.

### U Paul Bad U Silas Ha Beria

<sup>10</sup>Ha kata kajuhi hi ka miet ki parabangeit ki la phah noh ia u Paul bad u Silas sha ka nongbah Beria. Haba ki la iäpoi hangta ki la iälait sha ka synagog ki Jiw. <sup>11</sup>Ki nong Beria ki kham shai jingmut ban ia ki nong Thessaloni. Bad haba ki la iöhsngew ia ki jinghikai u Paul ki la kmen shikatdei eh. Ha la ka sngi ruh ki da it bniah ia ki jingthoh Bakhuid ban shem ba kata kaba la hikai ka

long ne em kaba shisha.<sup>12</sup>Kumta shibun ki la ngeit, kynthup lang ruh ki rangbah bad ki kynthei ba pawnam jong ki Grik.

<sup>13</sup>Hynrei kita ki Ji w kiba na Thessaloni haba ki la bna ba u Paul u la ialap ha Beria ruh, ki la leit shata bad ki la pynkhihwin bad pynkulmar ia uta u paidbah.<sup>14</sup>Kumta kita ki parabangeit mar mar hi ki la phah noh ia u Paul sharud duriauw, hynrei u Silas bad u Timothi ki la nang sah ha Beria.<sup>15</sup>Kita kiba la leit lem bad u Paul ki la leit on ia u shaduh ka nongbah Athen. Ki la wan phai ryngkat bad ka khubor sha u Silas bad u Timothi ba kin leit klois sha u katba lah.

### U Paul Ha Athen

<sup>16</sup>Katba u Paul u dang ap ia u Silas bad ia u Timothi ha Athen, la pynkhih ia ka mynsiem jong u, namar u la iohi ba kata ka nongbah ka dap da la bleithaw suda.<sup>17</sup>Ha ka synagog u ju iasaid nia bad ki Ji w lem bad ki Grik ba riewblei. Ha la ka sngi ruh u ju leit sha ki jaka iew ban iakren bad ki brieve ki ba ia id lynti nangta.<sup>18</sup>Te la don ki riewstad na ki Epikuri bad na ki Stoik kiba la itai nia bad u.

Don kiba la ong, "Une u brieve um tip ia kaei kaba u kren. U mut ban ong aiu?" Namar ba u Paul u la ialap ia ka Gospel U Jisu bad ia ka jingmihpat jong u. Kumta ki la ia ong, "I kumba u ialap ia ki blei khyllah aiu re."

<sup>19</sup>Kumta ynda ki la ialam noh ia u Paul sha ka dorbar ha Ariopagus. Ki la ong, "To pynshai ha ngi ia kane ka jingialap ba khyllah.

<sup>20</sup>Namar kane ka long thymmai ha ngi kaba ngim pat ju iohsngew mynno mynno ruh. Ng i da kwah eh ban tip ka mut aiu."<sup>21</sup>Ki trai shnong bad ki nongwei ruh kiba sah ha Athen ki sngewtynnad bha ban iakren bad iohsngew ia kiei kiei kiba thymmai.

<sup>22</sup>Te haba u Paul u la ieng hakhmat kata ka dorbar Ariopagus u la ong, "Ko rangbah Athen, Haba nga peit sha phi nga iohi ba phi dei ki brieve kiba wad blei bha."<sup>23</sup>Namar haba nga ia id ha ki lynti shnong nga iohi ia ki jingmane jong phi. Nga shem ia ka duwan ba la thoh ia kine ki kyntien: 'Ha U BLEI U BYMITHUH.' Phi mane ia u blei uba phim ithuh. Dei ia une U Blei keiñ ba nga ialap ha phi.

<sup>24</sup>"U long U Blei bad U Trai ba kneng bad ka khyndew, uba la thaw ia ka pyrthei bad ia kiei kiei baroh kiba don ha ka. U bym ju shong ha ki iing ba la thaw da ki kti ki brieve.<sup>25</sup>Ma u keiñ uba ai jingim bad uba pyndap ia ki jingdonkam u bynriew baroh. Um ju donkam ia ka jingiarap jong ki namar u dap kyrtai ha kiei kiei baroh.<sup>26</sup>U Blei u la thaw ia u brieve bad na uta uwei u brieve u la pynroi ia ka pyrthei ha kaba ki la iashong. Bad u

la buh ia ki aiom bad ki pud ki sam ba kin shong kin sah.

<sup>27</sup>"U Blei u da mon ba ki brieve kin wad ia u, ioh lehse ha ka jingwad jong ki kumno re kumno kin shem ia u, namar um long jngai na ngi.<sup>28</sup>Ha u ngi im, ngi kkih bad ngi long kumba ngi long mynta. Kumba ki myllung jong phi hi ki la ong, 'Ngi baroh ngi wan na u.'

<sup>29</sup>"Ka long kaba shisha. Ngi baroh ngi wan na U Blei. Kumta phi dei ban sngewthuh ba U Blei um long kumba ki brieve ki mutdur lane thawdur. Ym shym la thaw ia u da ka ksiar, da ka rupa lane da u maw.<sup>30</sup>Mynnor eh ki brieve kim shym la shemphang ia U Blei bad U Blei u la leh kum bym iohi ia kata. Hynrei mynta u la hukum ia uwei-pa-uwei ban kylla kaba mut bad phai khmat noh sha u.<sup>31</sup>U Blei u la buh ia ka sngi ban bishar ia ka pyrthei ha ka hok, da uta u brieve ia uba u la dep jied. Bad u la pyni shynna ruh shaphang uta mynba u la pynmihpat ia u na kiba iap!"

<sup>32</sup>Haba uta u paidbah u la iohsngew ia ka jingialap shaphang U Jisu uba la mihpat na kiba iap, la don napdeng jong ki, kiba la iarkhie bein. Hynrei kiwei pat ki la ong, "Ngin nang iohsngew shuh shuh na me shaphang kane."<sup>33</sup>Kumta u Paul u la mih noh na kata ka dorbar.<sup>34</sup>Hynrei la don napdeng uta u paidbah kiba la ngeit bad pyniasoh ialade bad u Paul. Hapdeng kita la don u Dionisios, u dkhot jong ka dorbar Ariopagus, ka kynthei ruh kaba kyrteng ka Damaris, lem bad kiwei de.

### U Paul Ha Korinth

**18**<sup>1</sup>Hadien kane, u Paul u la kynriah noh na Athen bad u la leit sha ka nongbah Korinth.<sup>2</sup>Hangta u la ia kynduh ia uwei u Ji w uba kyrteng u Akwila, uba na Pontos lem bad ka tnga jong u ka Priskila, kiba la kynriah shnong na Itali sha Korinth. Namar ba U Klaudios u la hukum ia ki Ji w baroh ban kynriah noh na Rom. U Paul u ju leit ia kynduh bad ki borabor.<sup>3</sup>Kine ruh ki long ki nongthaw iingjaiñ kum u Paul, kumta u la sah lang bad iatrei lang ruh bad ki.

<sup>4</sup>Man la ka sngi Sabbaton u Paul u ju leit sha synagog, ban ialap shaphang U Jisu, u da pyrshang katba lah ban pynkohnguh ia ki Ji w bad ia ki Grik ban ngeit ha U Jisu.<sup>5</sup>Hadien ba u Silas bad u Timothi ki la wan na Makedonia, u Paul u la pynlut khambun ka por ban kren ia ka khubor U Blei sha ki Ji w, u da pyrshang ban pynngeit ia ki ba U Jisu u long U Mesaiah.<sup>6</sup>Hynrei haba kim shym la pdiang ia kita ki jingialap bad ki la sdang ban kren bein ruh ia u. Kumta haba u la kynther noh ia ka khyndew na la ki



jaiñ, u la ong ruh, “Lada ym shym la pynim ia phi, phi kit pop hi ma phi! Nga, nga la pyndep ia ka kamram. Naduh mynta ngan leit noh sha ki Jentil.”

<sup>7</sup>Kumta u Paul u la mih noh na ka synagog bad u la leit sah ha ka iing u Titos Justos, u briew uba mane ia U Blei uba im. Ka iing jong u ka long ha syndah kata ka synagog. <sup>8</sup>U Krispos u rangbah nongialam ka synagog lem bad ki bahaiing jong u ruh ki la ngeit ha U Trai Jisu. Bun ruh ha Korinth kiba la shahshkor ia ki jingialap u Paul, haba ki la ngeit te la pynbaptis ia ki ruh.

<sup>9</sup>Mynmiet, U Trai u la kren ha u Paul ha ka jingithuhpaw bad u la ong, “Wat sheptieng bad wat sangeh noh ban kren sha kine ki briew. <sup>10</sup>Hakhmih ngan long ryngkat bad me bad yn ym don uno uno ruh u ban pynmysaw ia me. Naba nga don bun ki briew ha kane ka nongbah.” <sup>11</sup>Te u Paul u la sah hangta kumba shisnem shiteng, u da hikai ruh ia ka ktien U Blei sha ki briew baroh.

### La Wallam Ia U Paul Hakhmat U Gallio

<sup>12</sup>Te mynba u Gallio u la long u Lat ha Akhaia, la don napdeng ki Jiw kiba la ieng pyrshah ia u Paul bad ki la ialam noh ia u sha ka iingbishar. <sup>13</sup>Ki la mudui ia u hakhmat u Gallio ki da ong, “Une u briew u la hikai paidbah ia ka rukom mane kaba long pyrshah ia ka aiñ jong ngi!”

<sup>14</sup>Haba u Paul u la sdang ban kren ei ei, u Gallio u la ong ha kita ki Jiw, “Ngan jin da la shahshkor ia phi lada ki jingmudui ki long namar ki kam runar lane ki kam bymman. <sup>15</sup>Hynrei ka jingmudui ka dei tang namar ki ktien ialap bad ka kyrteng kaba long pyrshah ia ki aiñ jong phi. Kumta phi lah ban pynbeit ia kine ki jingeh dalade hi. Ngam kwah ban bishar ei ei halor kane ka phang.” <sup>16</sup>Kumta u Gallio u la phah mih noh ia ki na ka iingbishar.

<sup>17</sup>Hadien kata ki la kynrup ia u Sosthenis, u rangbah ka synagog. Ki la bom la shoh ia u hakhmat ka iingbishar. Hynrei u Gallio um suidñiew ei ei ia kata.

### Ka Jingwanphai U Paul Sha Antiok

<sup>18</sup>U Paul u la nang iaisah khambun sngi bad la ki parabangeit hangta. Hadien kane u la leit noh da ka lieng sha Syria. Ka Priskila bad u Akwila ruh ki la leit lem bad u. Te ynda la poi ha Kenkhria u Paul u la khi noh ia la u ñiuhkhlieh, kumba u la lah kular ha U Blei. <sup>19</sup>Ynda ki la rung sha ka nongbah Ephesos, u la iehnoh ia

ka Priskila bad u Akwila hangta. Katba u Paul u dang don ha Ephesos u la rung ha ka synagog bad u da iakren bad ki Jiw. <sup>20</sup>Te ki la kyrpad ia u ban nangshah kham slem, hynrei um shym la treh. <sup>21</sup>U la leit noh na ki bad u da ong, “Lada U Blei u ibit te ngan sa wan phai pat sha phi.” Kumta u la mih noh da ka lieng na Ephesos.

<sup>22</sup>Haba u la poi ha Kaisaria, u la leit sha Jerusalem ban leit jngoh ia ka balang. Hadien kata u la leit sha Antiok. <sup>23</sup>Te ynda u la sah hangta katto katne por. U la mih noh bad leit lyngba ki phang jong ka Galatia bad Phrygia. U la rung ha man la ki shnong jong kata ka ri, ban ai mynsiem ia ki parabangeit ha U Trai Jisu ba kin ieng skhem ha ka jingngeit.

### U Apollos Ha Ephesos Bad Ha Korinth

<sup>24</sup>Te uwei u Jiw uba kyrteng u Apollos uba na Aleksandria u la wan sha Ephesos. Une te u long uba shemphang bad uba tip bha ia ki Jingthoh Bakhuid. <sup>25</sup>Uba la ioh jinghikai bha shaphang U Trai bad uba shithrem ruh ban sakti bad iathuh ha ki briew shaphang U Jisu. Hynrei u la tip tang shaphang ka jingpynbaptis u Ioannis. <sup>26</sup>U Apollos u da ialap shithrem bha ha ka synagog. Hadien ba ka Priskila bad u Akwila ki la iohsngew ba u ialap, ki la ialam noh ia u sha la iing bad ki la iarap ia u ba un sngewthuh khambha ia ka lynti U Blei. <sup>27</sup>Te u Apollos u la kwah eh ban leit sha Akhaia. Kumta ki parabangeit ha Ephesos ka la iarap ia u bad ki la thoh da ka shithi sha ki synran ha Akhaia bad ki da kyrpad ba kin pdiang sngewbha ia u. Te haba u la poi sha ki, u la long ka jingmyntoi bakhrav sha kita ki parabangeit, namar kata ka jingaiei U Blei kaba la long lem bad u. <sup>28</sup>U la ju pyni nia bad u ju pyniap nia ruh ia ki Jiw hakhmat u paidbah. U da pynshisha na ki Jingthoh Bakhuid ba U Jisu u dei U Mesaiah.

### U Paul Ha Ephesos

**19** <sup>1</sup>Katba u Apollos u dang don ha nongbah Korinth, u Paul u la leit jngoh ardat ia ki katto katne ki jaka ha kata ka jingleit lynti jong u sha Ephesos. Ynda u la poi ha Ephesos u la ia kynduh ia ki parabangeit ha U Trai. <sup>2</sup>Haba u la kylli ia ki, “Hato phi la pdiang ia U Mynsiem Bakhuid mynba phi la ngeit?”

Kita ki parabangeit te ki la iathuh ha u, “Ngim pat ju iohsngew ruh shaphang U Mynsiem Bakhuid!”

<sup>3</sup>Te u Paul u la kylli ia ki, “Ka jingpyn baptis kaba kumno phi la pdiang?”

Te ki la ong, “Ka jingpynbaptis u Iöannis.”  
<sup>4</sup>Kumta u Paul u la ong, “U Iöannis u la iathuh tang ia ka jingpynbaptis jong ka jingkylla kaba mut. Hynrei ka dei ia phi ban ngeit ha uta uba wan hadien jong u bad uta u dei U Jisu.”

<sup>5</sup>Haba kita ki parabangeit ki la iöhsngew ia kata, la pynbaptis ia ki ha ka kyrnteng U Trai Jisu. <sup>6</sup>Te haba u Paul u la buh kti ha ki, U Mynsiem Bakhuid u la hiar halor jong ki. Bad ki la sdang ban kren ha ki thylliej ba thymmai bad ki da iathuhlypa. <sup>7</sup>Te ki la don kumba khatar ngut ki rangbah hangta.

<sup>8</sup>Te u Paul u la leit rung shapoh ka synagog bad u da kren shlur bha bad ki jin lai bnai. U da pyrshang ban pynkohnguh ia ki shaphang ka hima U Blei. <sup>9</sup>Hynrei don napdeng kita ki Jiw kiba la pyneh bad kyntait ruh ban ngeit. Ki da kren pyrshah ia kata ka Lynti hakhamat kiba bun. Kumta u Paul u la iehnoh ia kita ki Jiw bad u la leit lem bad kita ki parabangeit sha ka jaka jong uwei u briew uba kyrnteng u Tairanos uba don ia ka skul. Ha la ka sngi u Paul u la hikai ia ki briew hangta. <sup>10</sup>U la iai bteng ban leh kumne jin ar snem. Bad namar kata ka jingtrei jong u, bun bah kiba ha Asia, ki Jiw bad ki Grik de ki la iöhsngew ia ka ktien U Trai.

### Ki Khun U Skeba

<sup>11</sup>U Blei u la leh ruh ia ki kambah bakhray lyngba u Paul. <sup>12</sup>Don napdeng kita ki briew haba ki la rah noh ia ki jaiñ rumal bad ki jaiñphong ba u Paul u la ktah bad haba ki la buh ha kita kiba pang, kita kiba pang ki la khiah phar bad ki mynsiem bymman ki la mih noh ruh na ki.

<sup>13-14</sup>La don ha kata ka shnong napdeng ki Jiw kiba ju shang kylleng ban beh ksuid. Te ki hynñiew ngut ki khun u Skeba u rangbah lyngdoh ki ju leh ia kane. Kine ki Jiw ki la pyrthuh bad ban beh ia ki mynsiem bymman na kita ki briew da kaba pyndonkam ia ka kyrnteng U Jisu. Ki da ong, “Ha ka kyrnteng U Jisu uba u Paul u ialap, nga hukum ia me to mih noh!”

<sup>15</sup>Hynrei ha kawei ka por u mynsiem bymman u la ong ia kita ki Jiw, “Nga ithuh ia U Jisu bad nga ithuh ruh ia u Paul, hynrei phi phi long kiei?”

<sup>16</sup>Te uta u briew uba shong u mynsiem bymman ha u, u la rynsied ha kita ki Jiw namar u la kham donbor ban ia ki baroh. U da shoh ia ki bad tar ia ki jaiñphong jong ki, ki te ki la iaphet iap noh na kata ka iing.

<sup>17</sup>Baroh ki briew ha Ephesos, ki Jiw bad ki Grik ruh haba ki la bna shaphang kane, la

pyndap ia ki da ka jingsheptieng bad ki la ai burom ia U Trai Jisu. <sup>18</sup>Bun na kita kiba la ngeit ki la phla ia la ki kam bymman ba ki la leh. <sup>19</sup>Don napdeng jong ki, ki dei ki nongleh byrtong, kiba la wanrah ruh ia ki kot leh byrtong jong ki bad la thang ia ki hakhamat uta u paidbah. Bad ka dor jong kita ki kot ka long haduh kumba sanpnew hajar ki sbai rupa. <sup>20</sup>Kumta ka ktien U Trai ka la nang saphriang ha ka bor bad bun ruh ki la ngeit.

### U Paul U Pynbeit Ia Ki Jingleit Lynti Jong U

<sup>21</sup>Hadien kane u Paul u la thmu ban leit lyngba ka Makedonia, Akhaia nangta pat sha Jerusalem. U la pyrkat, “Hadien ba nga la iuh kjat ha Jerusalem, ngan leit ruh sha Rom.” <sup>22</sup>Kumta u Paul u la phah ia u Timothi bad u Erastos ki nongiarap ba ha syndah jong u ban nang leit ha shuwa jong u sha Makedonia, hynrei ma u pat u la iaisah ha Asia sa katto katne por.

### Ka Jingkhihwin Ha Ephesos

<sup>23</sup>Ha kata ka por la mih ka jingkhihwin ha Ephesos shaphang kata ka Lynti. Ka la jia kumne. <sup>24</sup>La don uwei u briew uba kyrnteng u Dimetrios, u nongshna rupa. Une u la thaw ia ka dur templ jong ka blei Artemis da ka rupa bad kamaï spah ruh nangta.

<sup>25</sup>U Dimetrios haba u la lum lang ia ki briew lem bad kita kiba trei lang kum ma u, u la kynshoit ia ki, da kaba ong, “Phi tip hi kumno ngi kamaï spah da kane ka kam jong ngi. <sup>26</sup>Hynrei hakhmih kaei kaba une u briew, u Paul u la leh. Sngap ia ki jingken jong u. U da pynkohnguh ia ki briew ha Ephesos bad kylleng ka Asia ban pynkylla noh ia ka jingngeit jong ki. U ong hana ba ki blei ba la thaw da ki kti ki briew kim long kiba shisha. <sup>27</sup>Nga sngewsheptieng ioh ba ka khaï pateng jong ngi kan sa duh noh bad kaba kham sngewsheptieng ka long, ioh ba ki briew kin pyrkat ba ka temple jong ka blei Artemis ruh kam da donkam shuh bad ba ka nam jong ka ruh kan sa duh sa dam noh syndon. Namar ka Artemis ka dei ka blei kaba baroh kiba ha Asia bad ha kylleng ka pyrthei ki ia mane.”

<sup>28</sup>Haba kita ki briew ki la iöhsngew ia kane, ki la sngew bitar eh. Bad ki la pyrta, “Kaba khray long ka Artemis, ka blei jong ka Ephesos!” <sup>29</sup>Te kata ka nongbah ka la kulmar hi thlim. Kumta kita ki briew ki la kem ia u Gaios bad ia u Aristarkhos ki nong Makedonia kiba ju leit lem bad u Paul bad

ki la ialam noh ia ki sha iing shnong.<sup>30</sup> U Paul u la kwah eh ban leit pynshai sha kita ki brieve, hynrei ki parabangeit ki la khang ia u ban leit.<sup>31</sup> La don ruh ki rangbah jong kata ka shnong kiba ia ieiid paralok bad u Paul, ki ruh ki la phah khubor sha u ba un ym leit mih sha kata ka jaka.

<sup>32</sup>Te kita ki brieve ki la ia pyrta uwei da kumwei bad uwei da kumwei pat. Kata ka dorbar te ka la kulmar hi thlim bad bun ruh na kita kiba la iawan lang hangta kim tip balei ba ki la iawan lang hangta.<sup>33</sup> Ki Jiw kiba hangta ki la pynieng ia u Aleksander ban kren ei ei hapdeng uta u paidbah, une u la ieng bad kaweh kti ban pynshai sha uta u paidbah.<sup>34</sup> Hynrei haba kita ki brieve ki la tip ba u Aleksander u dei u Jiw, ki la dsang ban hylla biang kumjuh. Jin haduh saw kynta ki la iai pyrta, "Kaba khraw long ka Artemis ka blei jong ka Ephesos!"

<sup>35</sup>Te la ieng u nongbuh jingthoh jong kata ka shnong bad haba u la pynsgap jar ia uta u paidbah. U la ong, "Ko rangbah ka Ephesos, baroh ki tip ba ka nongbah Ephesos ka don ia ka templ ba pawnam jong ka blei Artemis bad ki tip ruh ba ngi sumar ia u lum ba kyntang jong ka.<sup>36</sup> Ym don ba lah ban len ia kata, kumta to sngap bad pyrkat bha ia kaei kaba phi leh.

<sup>37</sup>"Phi la wallam ia kine ki brieve shane, hynrei kine kim shym la kren ei ei kaba pyrshah ia ka blei jong ngi, lymne kim shym la tuh ei ei ruh na ka temple jong ka.<sup>38</sup> Ngii don ia ki iingbisha bad ki nongbisha de. Hato u Dimetrios lem bad kita kiba trei bad u ki don kano kano ka jingmudui pyrshah ia ki? Leit sha ka iingbisha bad ai kin ia said nia hangta.

<sup>39</sup>"Lada dang don ei ei shuh ban iakren, wanlam ia kita sha ka dorbar shnong ban ia pynbeit.<sup>40</sup> Nga ong ia kane namar don kiba peit ia ngi bad mudui ba ngi dei ki nongpynkulmar shnong ha kane ka ngi. Ngim lah ban pynshai ei ei halor kane ka jingkulmar, namar ym don ki daw kiba shongnia na ka bynta kane ka jingialang."<sup>41</sup> Haden ba u nongbuh jingthoh jong kata ka shnong u la kren ia kine kiei kiei baroh, u la phah noh ia ki sha la iing.

#### U Paul U Leit Sha Makedonia Bad Sha Ka Ri Ki Grik

**20**<sup>1</sup>Te haba la thanda kiei kiei baroh, u Paul u la phah wan ia ki parabangeit ban iakynduh ia u. Haden ba u la ai katto katne ki kyntien sneng u la mih noh ban leit sha Makedonia.<sup>2</sup> Ha lynti u da leit iakynduh ruh ia ki parabangeit jong ki

shnong bapher bapher bad sneng kyntu ia ki. Haden kata u la leit sha ka ri ki Grik<sup>3</sup> bad u la sah hangta lai bnai.

U Paul u la thmu ban leit da ka lieng sha Syria, hynrei katto katne ki Jiw ki la thmu sniew pyrshah ia u, kumta u la rai ban leit phai biang lyngba ka Makedonia ban poi sha Syria.<sup>4</sup> Kine ki brieve ki la leit lem bad u haduh Asia: u Sopater u nong Beria u khun u Pyrrhos: u Aristarkhos bad u Sekundos kiba na Thessaloni; u Gaius na Derbi; u Timothi bad ar ngut kiba na Asia, u Tykhikos bad u Trophimuos.<sup>5</sup> Kine ki la leit ha shuwa u Paul bad ki la ap ia ngi ha Troas.<sup>6</sup> Kumta ngi la mih noh da ka lieng na Philipi hadien ka Jingkhawai niam u Kpu Bakhlem thiat. Bad hadien san sngi, ngi la iakynduh ia kine ki brieve bad ngi la sah hangta kumba shitaiew.

#### Ka Jingleit Bakhatduh U Paul Sha Troas

<sup>7</sup>Ha ka sngi U Trai ngi baroh ngi la iakynduh lang ban bam ia ka jingkhawai U Trai. Namar ba u Paul un sa mih noh ha kaba lashai, kumta ha kata ka miet u la hikai sha ngi shibun kiei kiei haduh shiteng synia.<sup>8</sup> Ngii baroh ngi la iadon lang ha ka kamra ba haneng, ba la pynshai bha da ki sharak.<sup>9</sup> Te uwei u samlu uba kyrteng u Eutikhos uba la shong ha syndah ka jingkhangi, u la ioththiah lyngngai katba u Paul u dang hikai. Kyndit kyntan u la hap nalor ka mala kaba lai. Bad haba ki brieve ki la leit hiar shapoh ban rah ia u, ki shem ba u la iap.

<sup>10</sup>U Paul ruh de u la leit hiar sha ka jaka ba don u Eutikhos, ynda u la dem khohsiew bad u la buh ia la ka kti ha u. U la ong ha kita ki parabangeit, "Wat khuslai, u la im pat mynta."<sup>11</sup> Haden kata u Paul u la leit kiew biang sha kata ka kamra, u la kdiah ia u kpu bad ki la iabam. Te u la iai bteng ban hikai ia ki haduh ban da shai byrngteng, hadien kata u la leit noh.<sup>12</sup> Ki parabangeit ki la leit on noh ia u Eutikhos sha la iing bad la pyntngeng shikatdei eh ia ka dohnud jong ki baroh.

#### Ka Jingleit Lynti Na Troas Sha Miletos

<sup>13</sup>Te ngi la leit da ka lieng ha shuwa u Paul sha ka nongbah Assos, ngi da thmu ban iakynduh ia u hangta kumba u la bthah ia ngi, namar u la kham jied ban leit na ryngkew.<sup>14</sup> Haba ngi la iashem ia u ha Assos, ngi la kyntien lang ia u bad leit da ka lieng shaduh Mitylini.<sup>15</sup> Te kum lashai ngi la iamih noh nangta da ka lieng bad

ngi la poi hajan ka dewlynnong Khios. Ha ka sngi kaba bud pat ngi la poi ha ka dewlynnong Samos. Shisngi hadien ngi la wan poi sha ka nongbah Miletos.<sup>16</sup>U Paul u la lah thmu lypa ban iaïd kiar noh ia ka nongbah Ephesos. Bad um kwah ruh ban sah slem ha Asia, namar u da kyrkieh eh ban poi ha Jerusalem shuwa ka sngi Pentekost lada lah.

### U Paul U La İakren Bad Ki Basan Na Ephesos

<sup>17</sup>Na Miletos u Paul u la phah khubor sha ki Basan ka balang ha Ephesos ba kin wan ia kynduh ia u.

<sup>18</sup>Haba ki la wan u Paul u la ong ha ki, "Phi tip shaphang jong nga naduh mynnyngkong hi mynba nga la wan sha Asia. Phi la tip bha shaphang ka jingim jong nga mynba nga la sah lem bad phi.<sup>19</sup>Kumno ba ki Jiw ki la pyrkhath sniew pyrshah bad pynjynjar sat ia nga. Hynrei phi hi phi tip ba ngam wai noh ban shakri ia U Trai wat hapdeng ki ummat, khlem da pyrkhath shuwa ialade.<sup>20</sup>Hynrei nga la ai kaba bha tam sha phi. Da kaba ia thuh ia ka Gospel U Jisu sha ki brieve baroh bad ha ki iing ruh de.<sup>21</sup>Nga da ialap ruh ia ka jingkylla kaba mut sha ki Jiw bad sha ki Grik ba kin phai bad ngeit ha U Trai Jisu.

<sup>22</sup>"Hynrei mynta ka dei ia nga ban kohnguh ia U Mynsiem Bakhuid ban leit sha Jerusalem. Ngam tip ruh kaei ka ban jia ia nga hangta.<sup>23</sup>Hynrei nga tip ia kane, U Mynsiem Bakhuid u la ia thuh ia nga ba ha kawei pa kawei ka nongbah ki jingjynjar bad ki jingshahset byndi ki la ap lypa ia nga.<sup>24</sup>Ngam khuslai ia la ka jingim. Kaba kongsan eh ka long ba ngan ioh pyndep ia ka kam kaba U Trai Jisu u la phah ia nga bad kata ka long ban ialap sha ki brieve ia ka khubor jong ka jingpynim ei U Blei.

<sup>25</sup>"Nga tip ba phin ym iohi shuh ia nga, namar kata to shahshkor bha ia kaei kaba ngan ong. Mynba nga la long lem bad phi, nga la ia thuh lut ha phi ia kiei kiei baroh kiba dei shaphang ka hima U Blei.<sup>26</sup>Mynta ka sngi nga ong da ka jingsngewskhem, ba U Blei un ym pan jingkheih shuh na nga lada don napdeng jong phi ki bym pat ioh jingpynim.<sup>27</sup>Namar nga la dep ban ia thuh lut sha phi ia kata kaba U Blei u kwah ia phi ban tip.<sup>28</sup>To sumar bha shaphang ialade bad ia kata ka kynhun baroh ha kaba U Mynsiem u la pynlong ia phi ki nongsharai ia kata ka balang U Trai kaba u la thied da la ka jong ka snam.<sup>29</sup>Nga tip hadien ka jingleit

noh jong nga, ki brieve kiba runar kum ki suri kin sa wan hapdeng jong phi bad kin ia leh ban pynjot noh ia kata ka kynhun.<sup>30</sup>Kumjuh ruh, wat napdeng ka kynhun hi kin sa mih ki nonghikai ki ban ialam bakla noh ia ki bangeit na ka jingshisha da ki jinghikai bashukor jong ki.<sup>31</sup>Namar kata to sharai! Da kaba kynmaw ruh ba jin lai snem nga la ia syllok bad phi da ki jingjw ummat shaphang kumno ka dei ia phi ban im.

<sup>32</sup>"Mynta nga aiti noh ia phi ha ka jingsumar U Blei bad ha kata ka khubor jong ka jingaiei ka ban pynshaitbor ia phi bad kaba wanrah jingkyrkhu sha baroh ki riwkhuid jong u.<sup>33</sup>Mynba nga la don lem bad phi, ngam ju ikwah ia ka spah lane ia ka jainphong jongno jongno ruh.<sup>34</sup>Phi hi phi tip ba nga trei shitom ban pyndap ialade bad ia kita kiba don lem bad nga.<sup>35</sup>Nga la pyni nuksa ruh ia phi, kumno ba nga da trei shitom bad kyrshan ia kita kiba tlot, nga da pynkynmaw ruh ia ki jinghikai U Trai Jisu: 'Ba ka jingkyrkhu bakhraw ka long ban ai ban ia kaba pdiang.'

<sup>36</sup>Haba u Paul u la dep ban kren, u la dem khohsiew bad ki la iaduwei lang baroh.<sup>37-38</sup>Ki da iam sngewsih namar ki kyntien u Paul kiba u la ong, ba kin ym iohi shuh ia u. Ynda ki la kdup bad khublei khatduh ia u, te ki la leit on lynti ia u haduh ha lieng.

### U Paul U Leit Sha Jerusalem

**21**<sup>1</sup>Te ynda ngi la lah khublei ia ki basan, ngi la mih noh da ka lieng beit beit sha ka dewlynnong Kos. Bad kum lashai sha Rhodos, nangta pat sa sha Patara.<sup>2</sup>Hangta ngi la shem ia ka lieng kaba leit sha Phoiniki, te ngi la kiew bad ngi la mih noh ruh.

<sup>3</sup>Ngi la iaïd lyngba shaphang shatei jong ka Kypros bad ngim shym la sangeh hangta, hynrei ngi la iaïd beit sha Syria. Te ngi la sangeh noh shuwa ha Tyros namar kata ka lieng kam pynhap ia ki jingkit hangta.<sup>4</sup>Ngi la iashem ruh ia ki parabangeit hangta bad ngi la sah bad ki kumba shitaiew. Ki da maham ruh ia u Paul ban ym leit sha Jerusalem namar U Mynsiem u la dep pynpaw ha ki.<sup>5</sup>Hynrei haba la dei ka por, ngi la leit phai biang sha ka lieng. Te ki parabangeit baroh naduh ki kynthei, khynnah ki la leit on lynti ia ngi bad ynda ngi la poi harud duriaw ngi la dem khohsiew bad ngi la ia duwai,<sup>6</sup>ynda ngi la lah khublei, ngi la kiew noh ha ka lieng, ki ruh ki la leit phai noh sha la iing.<sup>7</sup>Kumta ngi la bteng biang ia ka jingleit lynti na Tyros haduh Ptolemais. Hangta ngi la ia kynduh ia ki parabangeit bad sah

ruh bad ki shisngi. <sup>8</sup>Kum lashai ngi la mih noh na Ptolemais bad leit sha Kaisaria. Ynda ngi la poi hangta ngi la leit sah ha ka iing u Philip u nongialap, uba long uwei na kita ki hynñiew ngut ki rangbah. <sup>9</sup>U la don ruh saw ngut ki khun kynthei ba dang samla, kiba don ia ka jingai ban iathuhlypa. <sup>10</sup>Hadien katto katne sngi ba ngi la sah hangta, la wan poi u nongiathuhlypa na Judia uba kyrnteng u Agabos. <sup>11</sup>U la wan ha ngi bad u la pan ia u panpoh jong u Paul, u la khum ia la ki kti ki kjat bad u la iathuhlypa, u la ong, “U Mynsiem Bakhuid u iathuh shai, ‘Ba ki Jiw kin leh kumne ia u trai jong une u panpoh ha Jerusalem bad kin aiti noh ruh ha ki kti ki Jentil.”

<sup>12</sup>Te haba ngi la iohsngew ia kane, ma ngi bad ki parabangeit hangta ngi la kyrpad ia u Paul ban ym leit shuh sha Jerusalem. <sup>13</sup>Hynrei u Paul u la ong ha ki, “Balei phi ia iam kumne ban pynsngewsih ia nga? Nga la long la kloiy m tang ban shah set byndi ha Jerusalem, hynrei ban iap ruh na ka bynta ka kyrnteng U Trai Jisu!”

<sup>14</sup>Te haba ngim lah ban pynkhih ia kata ka jingkut jingmut baskhem jong u, ngi la sangeh noh na kaba kyrpad bad ngi la ong, “To ngin duwai ba U Trai un pyndep ia la ka jong ka jingthmu.”

<sup>15</sup>Hadien kane, ngi la khreh bad ngi la mih noh ban leit sha Jerusalem. <sup>16</sup>La don ruh ki synran na Kaisaria kiba la leit lang bad ngi bad ki la ialam ruh ia ngi ban sah ha ka iing u Mnason u parabangeit banyangkong eh na Kypros.

### **Ka Jingleit Jngoh U Paul ia U Jakob**

<sup>17</sup>Te ki hynmen bad ki para kiba ha Jerusalem haba ki la iohi ia ngi ki la sngewkmen shikatdei eh. <sup>18</sup>Te ha ka sngi kaba bud u Paul u la leit jngoh ia u Jakob bad baroh ki basan ki la iadon lang hangta. <sup>19</sup>Hadien ba u la khublei ia ki, u la iathuh bniah kumno ba U Blei u la pyndonkam ia u hapdeng ki Jentil.

<sup>20</sup>Te haba ki la iohsngew ia kita kiei kiei baroh, ki la iaroh ia U Blei bad ki la ong ruh ha u Paul, “Ko para, kumba phi la iohi ba bun bah na ki Jiw ki la ngeit ha U Jisu, hynrei kiba dang pyrkhath pat ba donkam ban bat pyrkhing ia ki hukum u Moses. <sup>21</sup>La iathuh ruh ha ki, kumno ba me la hikai ia kita ki Jiw kiba shong ha ki shnong jong ki Jentil ban lyndet noh ia ki hukum u Moses bad me la khang ruh ia ki khun jong ki ban otsher bad ban bud ia ki rukom jong ngi.

<sup>22</sup>“Ngin leh kumno? Namar ba ki parabangeit Jiw kin sa bna ba me la wan

poi shane. <sup>23</sup>Namar kata to leh kumba ngi batai ia me: Ngi don saw ngut ki briew kiba la smai hakhmat U Blei. <sup>24</sup>Leit lem bad ki sha kata ka jingiaseng pynkhuid bad men siew na ka bynta jong ki ba kin ioh khi ia la u jong u niuhkhlieh. Kumta kin ioh tip ba kita ki jingbna shaphang jong me kim long kiba shisha, hynrei ba me hi ruh me iaied beit da kaba sumar ia ki hukum u Moses.

<sup>25</sup>“Ha kaba iadei bad ki Jentil kiba la ngeit, ngi la phah da ka shithi ban bthah ia ki ia kaba ki dei ban leh:

‘Ban kyntait noh ia ki jingbam ba la knia ha ki bleithaw, ban kiar ruh na kaba bam ia ki mrad ba shu khyrwait bad ia ka snam bad ban kiar na ki jingklum sih.”

### **La Kem Noh ia U Paul**

<sup>26</sup>Kumta u Paul u la ialam ia kita ki saw ngut lem bad u. Ha ka sngi kaba bud u la pyndep ia kata ka jinglehniem ka jingpynkhuid. Hadien kata u la leit sha ka phyllaw ka Templ bad pynbna ia ka por ha kaba kita ki sngi ka jinglehniem ka jingpynkhuid kin kut. Ha ka sngi kaba khatduh yn ai ia ka jingainguh na ka bynta uwei-pa-uwei na ki.

<sup>27</sup>Te haba yn sa kut artad kita ki hynñiew sngi, la don ki Jiw na Asia kiba la iohi ia u Paul ha phyllaw ka Templ. Te ki la kynshoit ia uta u paidbah ban kem ia u. <sup>28</sup>Ki la ia pyrta, “Ko rangbah Israel, to iarap kloif Dei une u briew uba la leit kylleng ban hikai ia ki briew baroh ban ialeh pyrshah ia ki hukum u Moses, ia ki briew jong ngi bad pyrshah ia ka Templ. U da pynrung ruh ia ki Crik hapoh ka Templ kat ban pyntngit noh ia ka jaka kyntang!” <sup>29</sup>Ki Jiw ki la kren ia kane namar ba ki la iohi ia u Trophimos u nong Ephesos ba u don lang bad u Paul, ki da tharai ba u la pynrung lang ia u ha ka jaka kyntang ka Templ.

<sup>30</sup>Uta u paidbah uba la khiih bitar lep, u la ia mareh kyrthep sha ka Templ. Haba ki la kem ia u Paul ki la tan noh ia u shabar na kata ka jaka kyntang bad ki la khang noh ia ki khyrdop jong ka. <sup>31</sup>Katba ki dang ia pyrshang ban pyniap noh ia u, u rangbah ka pyrton shipai Rom ha Jerusalem u la ioh jingtip ia kane ka jingkhiihwin ha ka nongbah. <sup>32</sup>Mar kumta hi bran bran u la mareh sha kata ka jaka ba ialum paidbah, u da shim lang ruh ia ki rangbah shipai bad ki kynhun shipai. Haba uta u paidbah u la iohi ba la poi u rangbah ka pyrton shipai, ki la sangeh noh na kaba shoh ia u Paul.

<sup>33</sup>Uta u rangbah ka pyrton shipai u la hukum ia ki shipai ban kem noh ia u Paul,

te ki la khum noh ia u da ki ar tylli ki kynjri. Bad haba u la kylli, “Uei une? Bad ka kam sniew aiu ba u la leh?”<sup>34</sup>Te don kiba la ong da kumne, kiwei pat da kumwei bad namar ka jingkulmar bad jingkhynwin, u rangbah ka pyrton shipai um shym la lah ban tip ia ka jingshisha shaphang kaei kaba la jia. Te kumta u la hukum ban ialam noh ia u Paul shapoh ka kut shipai.<sup>35-36</sup>Kita ki shipai ruh ki la shu rah noh ia u Paul khnang ban iada ia u na ka kti uta u paithhur uba la thmu ban dkhat syndon ia ka jingim jong u. Uta u paidbah uba dang ia bud nadien u la pyrta artad, “Pyniap noh syndon ia u!”

<sup>37</sup>Te haba kin sa pynrung noh ia u shapoh ka kut shipai, u Paul u la kylli ia uta u rangbah ka pyrton shipai, “Nga lah ban kren ei ei ia me?”

U te u la ong, “Oh, me kren Grik?”<sup>38</sup>Ka mut mem dei uta u briew uba nga mut. Nga nang tharai ba me dei uta u nong ljipt uba la thaw ia ka kynhun lehnoh lem bad saw hajar ngut ki nongbud jong u ban ialeh pyrshah ia ka sorkar, kiba la phet rieh ruh sha khlaw.”

<sup>39</sup>U Paul u la ong, “Em, nga dei u Jiw na Tarsos, u trai shnong jong ka nongbah ba pawnam ka Kilikia. Sngewbha shah ia nga ban kren sha une u paidbah.”

<sup>40</sup>Te uta u rangbah ka pyrton shipai u la ai jingbit ia u Paul ban kren. Kumta u la ieng ha kita ki mawkyndon bad u la kaweh kti ban pynsngap ia uta u paidbah. Ynda haba uta u paidbah u la sngap jar, u Paul u la kren sha ki ha ka ktien Hebru.

### U Paul U La Kren Sha Uta U Paidbah

**22**<sup>1</sup>“Ko ki hynmen bad ki kpa jong nga, to sngap mynta ia ki jingiasaid da jong nga ha phi.”

<sup>2</sup>Te haba kita ki Jiw ki la iohsngew ba u kren ha ka ktien Hebru, ki la sngap jar baroh. Te u la ong,

<sup>3</sup>“Nga long u jiw, ia uba la kha ha Tarsos bad la pynsan ia nga ha Kilikia. Nga la shah hikai ruh ha u Gamaliel,<sup>a</sup> uba la hikai bniah ia nga shaphang ka hukum jong ki kpa tymmen jong ngi. Nga la shakri shitrhem ruh ia U Blei kumba long ma phi ha kane ka sngi.<sup>4</sup>Nga la pynshitom bein ia ki briew kiba bud ia kata ka Lynti, don ruh ia kiba la pyniap. Nga da khum ruh ia ki shynrang bad kynthei bad set ia ki ha ka byndi.

<sup>5</sup>“Ki rangbah lyngdoh bad ka dorbar ki

rangbah Jiw ki lah ban iathuh ha phi ba ka long kaba shisha. Nga la ioh ruh ia ka jingthoh na ki ia kaba la thoh sha ki rangbah Jiw ha Damaskos, ban leit khum noh ia ki nongbud U Jisu bad ban wallam pat ia ki sha Jerusalem ba yn ioh pynshitom ia ki.

### U Paul U Iathuh Kumno Ba La Pynkylla Ia U

<sup>6</sup>“Hynrei ka la jia te ha kaba shiteng sngi ha kata ka lynti ban poi artad sha Damaskos. Kynsan kynsan ka jingshai ba tyngshaiñ na bneng ka la long sawdon ia nga.<sup>7</sup>Nga la kyllon khram ha madan bad nga la iohsngew ia ka sur kaba ong, ‘Saul, Saul, balei me pynshitom bein ia nga?’

<sup>8</sup>“Te nga la kylli ‘Me long uei, ah Trai?’ Kata ka sur ka la ong, ‘Nga long U Jisu ka Nasaret, ia uba me pynshitom bein.’<sup>9</sup>Ki briew kiba don bad nga kim sngewthuh ia kata ka sur kren, hynrei ki la shu iohi ia kata ka jingshai.

<sup>10</sup>“Nga la kylli pat, ‘Kaei kaba nga dei ban leh, ah Trai?’ Te U Trai u la jubab, ‘To ieng mynta leit ruh sha kata ka nongbah. Te yn sa iathuh ia me ia kaba me dei ban leh.’”

<sup>11</sup>Ngam lah shuh ban iohi, namar kata ka jingtyngshaiñ kaba la thaba ha nga. Kumta kita ki briew ki la btin lynti ia nga shapoh ka nongbah Damaskos.

<sup>12</sup>“Te la don ha Damaskos uwei u briew uba kyrteng u Ananias<sup>b</sup> uba riwblei bad uba sumar bha ia ki hukum u Moses ia uba la ju burom eh da ki Jiw baroh.<sup>13</sup>Une te u la wan ia kynduh ia nga bad u la ong, ‘Saul, u para jong nga, to peit pat mynta!’ Kumta hi la plie biang ia ki khmat jong nga bad nga la iohi ia u.

<sup>14</sup>“U Ananias u la iathuh ha nga, ‘U Blei ki kpa jong ngi u la jied ia me la mynslem bah ban pyntip ia ki jingthmu jong u bad ban pynpaw ia U Bahok jong u bad ban iohsngew ruh ia ki ktien jong u.<sup>15</sup>Men long u sakhi sha ki briew shaphang kita baroh kiba me la iohi bad iohsngew.<sup>16</sup>Mynta, wat pyntud. To ieng joit, to shah ruh ban pynbaptis ia me ba yn ioh sait noh ia ki pop jong me, da kaba ngeit ha U Jisu ba yn ioh pynim ia me.’

<sup>17</sup>“Hadien kata, nga la wan phai noh sha Jerusalem. Katba nga dang duwai ha ka Temp, nga la ioh ka jingithupaw.<sup>18</sup>Nga la iohi ia U Jisu, u da ong ruh, ‘To pynkloi, mih noh na Jerusalem! Namar kine ki

<sup>a</sup> 22:3 Gamaliel U nonghikai ba pawnam jong ki Pharisi, u dei ruh nongialam ia ka kynhun Jiw. Peit ruh ha Ki Kam ki Apostol 5:34.

<sup>b</sup> 22:12 Ananias Ha ki Kam ki Apostol don lai ngut kiba kyrteng Ananias. Ki Kam ki Apostol 5:1 bad 23:2 ia kiwei pat ki ar ngut.

briew kin ym ngeit ia ka jingphla jong me shaphang jong nga.’

<sup>19</sup>“Nga la ong, Ah Trai, ki hi ki tip kumno ba nga la set byndi bad sympat ruh ia kita ki bangeit. Nga da thwet ruh ha ki synagog ban ioh kem noh ia kita kiba la ngeit ha me. <sup>20</sup>Ki tip ruh ba nga don lang bad ki mynba la pyniap ia u shakri jong me u Stephan. Nga da ieng lang bad mynjur ia ki jingleh jong ki haba nga la pynbat ia ki jaiñ jong kita kiba pyniap ia u’

<sup>21</sup>“Hynrei U Jisu u la ong ha nga, ‘Mih noh mynta. Ngan phah noh ia me jngai nangne sha ki Jentil.’”

<sup>22</sup>Te haba uta u paidbah u la lah sngap ia ki jingken u Paul haduh hangta, u la pyrta biang, “To pyniap noh ia une u briew! Um donhok ban im.” <sup>23</sup>Ki la iai pyrta jam, ki da kad ruh ia la ki jaiñphong bad kynting pumpum sha suiñ. <sup>24</sup>Hadien kata u rangbah ka pyrton shipai u la hukum ban ialam noh ia u Paul shapoh ka kut bad ban sympat ia u namar u da kwah eh ban tip balei ba une u paidbah u la khiih bitar pyrshah ia u haduh katne katne. <sup>25</sup>Katba ki shipai ki dang khum ia ka ban sympat ia u, u Paul u la ong ia u rangbah shipai hangta, “Hato ka shong hok mo ban sympat ia u trai shngong Rom khlem da bishar shuwa ia u?”

<sup>26</sup>Te haba uta u rangbah shipai u la iohsngew ia kane, u la leit iathuh ha uta u rangbah ka pyrton shipai. U da ong, “Me tip ia kaei kaba me la leh? Une u briew u dei u trai shngong Rom!”

<sup>27</sup>Uta u rangbah ka pyrton shipai u la wan dalade ban kylli na u Paul, “To iathuh ia nga, hato me dei shisha u trai shngong Rom?”

Ute u la jubab, “Hooiid.”

<sup>28</sup>Uta u rangbah ka pyrton shipai u la ong, “Nga la siew da ka dor kaba heh bha ban long u trai shngong ha Rom.”

Hynrei u Paul u la ong, “Ia nga la kha kum u trai shngong.”

<sup>29</sup>Kumta kumta hi kita kiba la pynkhreh ban tohkit ia u Paul ki la kynriah noh na u. Te uta u rangbah ka pyrton shipai u la sheptieng namar ba u la lah khum kynjri ia u Paul uba long u trai shngong.

### U Paul U Kren Bad Ki Nongialam Jiw

<sup>30</sup>Te ha ka sngi kaba bud uta u rangbah ka pyrton shipai u da kwah eh ban tip thikna balei ba ki Jiw ki kynnoh pyrshah ia u. Kumta u la hukum ia kita ki lyngdoh nongialam bad ia ka dorbar ba ha khlieh ban iawan lang bad u la wallam ia u Paul hakhmat kata ka dorbar.

**23** <sup>1</sup>Te u Paul u la khmih sha kita kiba don ha ka dorbar bad u la ong, “Ko para, nga la im ia ka jingim kaba bha hakhmat U Blei bad nga la leh ia kata kaba nga sngewdei.” <sup>2</sup>U Ananias, u rangbah lyngdoh haba u la iohsngew ia ki jingken u Paul u la hukum ia kita kiba ieng ha syndah ban thab na ka shyntur jong u. <sup>3</sup>Te u Paul u la ong ha u Ananias, “U Blei ruh un sa shoh ia me kumjuh! Naba me long kum ka kynroh ba tngit ia kaba la shu pushara ronglieh. Me shong hangto ban bishar ia nga da ka Hukum u Moses, pynban me hi me pynkheñ ia ka hukum da kaba me phah ia ki ban shoh ia nga.”

<sup>4</sup>Kita kiwei ruh kiba ieng hajan u Paul ki la ong, “Haduh katta me nud ban kren beññ ia u rangbah lyngdoh jong U Blei?”

<sup>5</sup>Te u Paul u la ong pat, “Para, ngam shym tip ba une u dei u rangbah lyngdoh. Ka Jingthoh Bakhuid ka ong, ‘men ym kren sniew ia u nongsynshar u paitlang jong me.’”

<sup>6</sup>U Paul u da tip ba ha kata ka dorbar la don lang ruh ki Saddusi bad ki Pharisi. Kumta u la kren jam, “Ko para, nga dei u Pharisi bad u khun jong u Pharisi! La bishar ia nga hangne namar ba nga ngeit ba ka don ka jingmihpat ia kiba iap.”

<sup>7</sup>Haba u Paul u la kren ia ki tei ki kyntien la mih ka jingiasaid bajur hapdeng ki Pharisi bad ki Saddusi. <sup>8</sup>Namar ki Saddusi kim ngeit ba ka don ka jingmihpat hadien ka jingiap lane ki angel lymne ki mynsiem, katba ki Pharisi ki ngeit ia kita baroh. <sup>9</sup>Baroh ki Jiw ki la sdang ban nang pyrta jam. La don ruh na ki nonghikai ka hukum, kiba long ki Pharisi ki la ieng ban iasaid, “Ngim shem kano kano ka jingbakla bad une u briew. Hynrei lehse u angel lane u mynsiem u la kren shisha ha u.”

<sup>10</sup>Kata ka jingiania ka la poi shaduh u pud ban ia kynrup marmet. Uta u rangbah ka pyrton shipai u la sheptieng ba ioh kita ki Jiw kin patar lyngkhot lyngkhai ia u Paul. Kumta u la hukum ia ki shipai ban ialam noh ia u na khmat kita ki Jiw shapoh ka kut shipai.

<sup>11</sup>Te ha ka miet kaba bud U Trai Jisu u la ieng hajan u Paul bad u la ong, “To long shlur! Kumba me la phla ia nga ha Jerusalem, men leh kumjuh ha Rom ruh.”

### Ki Jiw Ki Iasylla Ban Pyniap Noh Ia U Paul

<sup>12</sup>Ha ka step kaba bud la don napdeng ki Jiw kiba la iasylla lang ban pyniap noh ia u Paul. Ki da ia smai ban ym bam lymne

dih ei ei tad ynda ki la ioh pyniāp shuwa ia u. <sup>13</sup>Te la don kumba palat sawphew ngut ei ei kiba la ia smai kumta. <sup>14</sup>Haba ki la iawan hakhmat ki rangbah lyngdoh bad ki nongialam Jiw ba kham rangbah, ki la ong, “Ngi la smai ba ngin ym bam lymne dih ei ei tad ynda ngi la ioh pyniāp noh shuwa ia u Paul. <sup>15</sup>Mynta ngi kwah ba phin leh kumne: Na kane ka dorbar ba hajrong eh, phah khubor sha u rangbah ka pyrton shipai. Bthah ia u ba un wallam biang ia u Paul shane, khnang ba ngin ioh ban tohkit shuh shuh ia u. Te ngi ngin ap thap ban pyniāp noh ia u ha ka lynti shane.”

<sup>16</sup>Hynrei u pyrta jong u Paul u la tip ia kata ka jingthmu jong ki. U la leit sha kata ka kut shipai ban iathuh ha u Paul. <sup>17</sup>Kumta u Paul u la khot ia uwei na ki rangbah shipai bad u la ong, “Ialam ia une u samla sha u rangbah ka pyrton shipai namar u don ka khubor ban iathuh ha u.”

<sup>18</sup>Te uta u rangbah shipai u la ialam noh ia uta u samla sha uta u rangbah ka pyrton shipai, u da ong, “U Paul u nongsah byndi u la phah ia nga ban ialam ia une u samla namar u don ei ei ban iathuh ha me.”

<sup>19</sup>Uta u rangbah ka pyrton shipai u la ialam noh ia u samla sha ka jaka ba kham kynjah. Bad u la kylli, “Me don ban iathuh aiu?”

<sup>20</sup>Uta u samla u la ong, “Ki Jiw ki la iakut ban kyrpad ia me ban wan ialam arsut ia u Paul sha ka dorbar lasha ka sngi, khnang ba men pyrkhāt ba ki kwah tohkit biang ia u. <sup>21</sup>Hynrei wat ngeit ia ki! namar la don palat sawphew ngut ki brieve kiba la ap thap ban ioh pyniāp noh ia u. Ki da smai ruh ba kin ym bam lymne dih ei ei tad haduh ba kin da ioh pyniāp shuwa ia u Paul. Mynta ki ap sa tang ia ka jingmynjur jong me.”

<sup>22</sup>Kumta u rangbah shipai u la phah noh ia uta u samla, u da ong, “Wat iathuh hano hano ruh ba me la pyntip ha nga ia kata ka jingthmu jong ki.”

### La Īalam Noh Īa U Paul Sha Kaisaria

<sup>23</sup>Hadien kata u rangbah ka pyrton shipai u la khot ia ki ar ngut ki rangbah shipai. U la ong ia ki, “Pynkhreh arspah ngut ki shipai ki ban leit sha Kaisaria. Kumjuh ruh hynniēwphew ngut ki shipai shong kulai bad arspah ngut ki ba rah sum, ki ban mih ha ka por khyndai baje mynmiet. <sup>24</sup>Pynkhreh ruh ia ki kulai ban pynshong ia u Paul khnang ba kin ialam biang biang ia u ha u Lat Pheliks.” <sup>25</sup>U rangbah ka pyrton shipai u da thoh ruh bad ka shithi kaba ong:

<sup>26</sup>Na u Klaudios Lusias,

Ha u Lat Pheliks uba donburom.

Khublei,

<sup>27</sup>La don na ki Jiw kiba la kem ia une u brieve bad thmu ban pyniāp noh ruh ia u. Hynrei hadien ba nga la tip ba u dei u trai shnong Rom, nga la leit lem bad ki shipai ban pyllait noh ia u. <sup>28</sup>Nga da kwah eh ban tip ba balei ki la mudui pyrshah ia u. Kumta nga la ialam ia u hakhmat ka dorbar jong ki. <sup>29</sup>Te nga la sngewthuh: ba ka jingmudui jong ki ka long tang halor ki nongrim ba u pyrshah ia ki aiñ bad ki hukum jong ki, hynrei ym haduh u pud ban shah set byndi lane rai pyniāp ia u. <sup>30</sup>La don ruh ba pyntip sha nga ba ki Jiw ki la apthap ban pyniāp noh ia u. Kumta nga la rai ban phah noh ia u sha me. Nga la bthah ruh ia kita ki Jiw ba kin pynsngew ia ki jingmudui jong ki hakhmat jong me.

<sup>31</sup>Te ki shipai ki la leh kumba la bthah. Bad ha kata hi ka miet la ialam noh ia u Paul sha ka nongbah Antipatris. <sup>32</sup>Te kum lasha kita ki shipai shong kulai ki la ialam noh ia u Paul sha Kaisaria, hynrei kiwei pat ki shipai lem bad ki nongrah sum ki la leit phai biang sha la ka kut shipai kaba ha Jerusalem. <sup>33</sup>Kita ki shipai shong kulai haba ki la rung sha Kaisaria, ki la aiti noh ia kata ka shithi bad ia u Paul ha ka kti u Lat Pheliks.

<sup>34</sup>U Lat te haba u la pule ia ka shithi u la kylli ia u Paul, “Me dei na ka shnong aiu?” Kumta u la tip ba u dei na Kilikia. <sup>35</sup>U Lat u la ong pat, “Ngan sa bishar ia me ynda la poi kita ki nongmudui jong me shane.” Kumta u Lat u la hukum ban pynsah ia u Paul ha ka iingbah ba la tei da u Herod.

### Ki Jiw Ki Mudui Pyrshah Īa U Paul

**24** <sup>1</sup>Hadien sangi u Ananias, u rangbah lyngdoh ryngkat ki nongialam Jiw ba rangbah lem bad u nongiasaid aiñ uba kyrterng Tertullos. Ki la ialeit lang sha Kaisaria ban mudui pyrshah ia u Paul hakhmat u Lat. <sup>2-3</sup>Hadien ba la khot ia u Paul sha kata ka dorbar, u Tertullos u la sdang ban mudui pyrshah ia u.

U da ong, “Ko Pheliks ba donburom, ki brieve jong ngi ki shongsuk namar jong me, ki jinghuri hura kiba mih ha ka ri jong ngi la lah ban pynbeit pat ia ki da ka jingbishar



bastad jong me. Ngi da sngewnguh eh ia kata. <sup>4</sup>Te ban ym shim ia ka por jong me. Ngan kren beit sha ka phang. Sngewbha iaishah bad ngi. <sup>5</sup>Une u briew u dei u nongpynkulmar shnong. U la pynkulmar thlim ia kiba bun ki Jiw ha kylleng ka pyrthei. U dei u nongialam jong ka kynhun Nasaret. <sup>6</sup>U la thmu ruh ban pynsang ia ka Templ, hynrei ngi la lah ban pynsangeh noh ia u bad ngi la kwah ban bishar ia u kat kum ka aiñ jong ngi. <sup>7</sup>Hynrei u rangbah ka pyrton shipai, u Lusias u la wan bad shim noh ia u na ngi da ka bor, <sup>8</sup>bad u la hukum ia ki nongmudui ban wan hakhmat jong me. Te mynta men lap ba ka long kaba shisha haba men tohkit hi ia u." <sup>9</sup>Kita ki Jiw ruh ki la ia kohnguh khlieh ba ka long kaba shisha.

### U Paul U İasaid Da İalade Hakhmat U Pheliks

<sup>10</sup>Hadien kata u Lat u la ai dak ia u Paul ban kren ei ei. Te u Paul u la ong, "Ko Lat Pheliks, nga tip ba me la synshar ia kane ka ri la bun snem mynta, kumta nga la sngewshlan ban iaada ialade hakhmat jong me. <sup>11</sup>Kumba me lah ban sngewthuh dalade, ym pat palat khatar sngi naduh ba nga la wan rung sha Jerusalem ban mane. <sup>12</sup>Kine ki Jiw kim shym lap shisien ruh ba ngan iania badno badno lymne kynshoit iano iano. La ka long ha ka Templ, ha ki synagog ne ha ki nongbah. <sup>13</sup>Kim lah ruh ban pynshisha ia kita ki jingkynduh jong ki pyrshah ia nga.

<sup>14</sup>"Hynrei nga phla ha me ia kane ba nga mane ia U Blei ki kpa jong ngi kum u nongbud ia kata ka Lynti, ia kaba kine ki Jiw ki ong ba kam long ka lynti kaba dei. Nga ruh nga ngeit ia baroh ba la hikai ha ka hukum u Moses bad ia ki jingthoh jong ki nongiathuhlypa. <sup>15</sup>Nga don ruh ka jingkyrmen ha U Blei kumba kine ki Jiw ki don, ka jingkyrmen ba ka don ka jingmihpat ia ki bahok bad kiba pop. <sup>16</sup>Kumta katba lah nga ialeh ban don ka jingiatiplem bakhuid hakhmat U Blei bad hakhmat ki briew baroh.

<sup>17-18</sup>"Hadien ba nga la jah bun snem na Jerusalem, nga la leit phai biang ban ioh iarap ia ki briew jong nga lem bad ki jingai sngewbha ban tyrwa sha ka Templ. Katba nga dang leh ia niam hapdeng ka jingpyndep ia ka niam ka jingpynkhuid, la don ki Jiw kiba la lap ia nga hangta. Ngam shym la thaw jingkulmar ei ei bad ym shym don ruh kiba la ialum sawdong ia nga hangta. <sup>19</sup>Hynrei katto katne ki Jiw kiba na ki thain Asia kiba don hangta.

Ki dei ban ieng hangne hakhmat jong me. Lada nga la leh shisha ia kano kano ka bymdei, ki dei ma ki, ki ban mudui pyrshah ia nga, namar ki don hangta. <sup>20</sup>Ai ba kita ki briew kin iathuh hi la ki la shem ne em kano kano ka kam bymhok mynba la bishar ia nga hakhmat ka dorbar bah ha Jerusalem. <sup>21</sup>Hynrei tang kawei nga la kren shai bha hakhmat jong ki, "Phi bishar ia nga tang namar ba nga ngeit ba don ka jingmihpat ia ki briew hadien ka jingiap!"

<sup>22</sup>U Pheliks uba la sngewthuh shibun shaphang kata ka Lynti, u la pynkut noh shuwa ia kata ka jingbishar bad u la ong, "Ynda la poi u Lusias u rangbah ka pyrton shipai hangne, ngin sa shim ia ka rai kaei kaba ngi dei ban leh." <sup>23</sup>Kumta u la ai hukum ia uta u rangbah shipai hangta ban pahara ia u Paul, hynrei ym ban pyrkhing than eh bad ban shah ruh ia ki lok jong u ban wallam ia kat kaba u donkam.

### U Paul U La Kren İa U Pheliks Bad Ka Tnga Jong U

<sup>24</sup>Hadien kyndiat sngi u Pheliks lem bad ka tnga jong u ka Drosilla kaba dei ka Jiw, haba ki la phah wan ia u Paul, ki la shahshkor ruh ia ki jingkynduh jong u shaphang ka jingngeit ha U Jisu Khrist. <sup>25</sup>Hynrei u Pheliks u da sngewsheptieng katba u Paul u dang ialap shaphang kaba leh hok, ka bor halor lade bad ka sngi bishar ka ban sa wan. Kumta u la ong, "To khie leit noh, ngan sa phah khot pat ia me ynda nga la lait por." <sup>26</sup>Hynrei u Pheliks u don da kawei pat ka jingthmu mynba u la pynbeit ban don ka jingiakren bad u Paul. U da kyrmen ba u Paul un thong pisa ia u, kumta u la phah wan ia u Paul ban iakren bad u bunsien.

<sup>27</sup>Hynrei hadien ar snem, u Porkios Phistos u la wan shimti kum u Lat ha ka jaka u Pheliks. Te u Pheliks u la nang pynsah ia u Paul ha iingbyndi ban pynsngewbha ia ki Jiw.

### U Paul U La Pan Ban İakynduh İa U Kaisar

**25** <sup>1</sup>Lai sngi hadien ba u Phistos u la shimti kum u Lat, u la leit na Kaisaria sha Jerusalem. <sup>2</sup>Ki rangbah lyngdoh bad ki rangbah Jiw ba kham pawkhmat ki la wanrah ia ki jingmudui hakhmat u Phistos. <sup>3</sup>Ki da kyrpad ia ka jingsngewlem na u ban phah biang ia u Paul sha Jerusalem namar ki la iasylla ban pyniap noh ia u ha lynti. <sup>4</sup>Hynrei u Phistos u la jubab, "Em, ngin pynsah ia u ha Kaisaria. Shen hi ngan sa leit noh, <sup>5</sup>bad

phin ialeit lang bad nga. Lada shisha une u briew u la leh bymdei, phi lah ban mudui ia u hangtei.”

<sup>6</sup>U Phistos u la nangsah ha Jerusalem sa kumba phra haduh shiphew sngi, hadien kata u la leit phai pat sha Kaisaria. Ha ka sngi kaba bud u Phistos haba u la shong ha ka khet bishar u la phah wallam ia u Paul hakhmat jong u. <sup>7</sup>Ynda u Paul u la rung ha kata ka kamra, kita ki Jiw kiba la wan na Jerusalem ki la ieng sawdong ia u. Ki la sei shibun ki jingmudui pyrshah ia u, hynrei kim lah pat ban pynshisha ia kawei ruh. <sup>8</sup>U Paul u la iasaid da ialade, da kaba ong, “Ngam shym la leh bymdei pyrshah ia ka aiñ Jiw, ia ka Templ, lymne ia u Kaisar.”

<sup>9</sup>Hynrei u Phistos u da kwah eh ban pynsgewbha ia ki Jiw, kumta u la kylli ia u Paul, “Hato me kwah ban leit sha Jerusalem ba ngan ioh bishar ia me hangta, halor kine ki jingmudui?”

<sup>10</sup>U Paul u la ong, “Mynta nga ieng kum hakhmat ka khet bishar u Kaisar hi. Ka dei hangne keiñ ban bishar ia nga. Ngam shym la leh kano kano kaba pyrshah ia ki Jiw kumba me hi me tip. <sup>11</sup>Lada shisha nga la leh bakla kaba dei ia nga ban iap kat kum ka aiñ, ngan ym kyrpad ban pyllait ia nga nangta. Hynrei lada kine ki jingkyntoh kim long kiba shisha, ym don uba lah ban aiti noh ia nga ha ki. Em, wat la katta ruh nga kwah ba u Kaisar un bishar ia nga!”

<sup>12</sup>Hadien ba u Phistos u la iakren bad ki nongaibuit jong u, u la ong, “Me la pan ban ieng hakhmat u Kaisar, kumta ruh men leit sha u Kaisar!”

### U Phistos U La Pan Jingmut Na U Syiem Agrippa Shaphang U Paul

<sup>13</sup>Khyndiat sngi hadien kane, u Syiem Agrippa lem bad ka Berniki ki la wan jngoh ia u Phistos ha Kaisaria. <sup>14</sup>Hadien ba ki la sah bun sngi, u Phistos u la iathuh ha u syiem shaphang u Paul. U da ong, “La don u briew ha ka iingbyndi naduh ka por u Pheliiks. <sup>15</sup>Mynba nga la leit sha Jerusalem, ki rangbah lyngdoh bad ki nongialam Jiw ba rangbah ki la mudui pyrshah ia u. Ki da kwah eh ruh ba ngan rai pynrem ia u da ka jingiap. <sup>16</sup>Hynrei nga la ong sha ki, ‘Haba don ka jingujor pyrshah iano iano, ki Rom kim ju rai pynrem khlem da pynkynduh shuwa markhmat bad ki nongmudui. Hadien kata yn ailad ia ki ruh ban iasaid da ialade halor kita ki jingsah kynnoh.’

<sup>17</sup>“Kumta mynba ki Jiw ki la iawan shane, khlem pyntud ha ka sngi kaba bud hi nga la phah wallam ia u Paul hakhmat

ka khet bishar. <sup>18</sup>Kita ki Jiw ki la mudui pyrshah ia u, hynrei ym ia ki kam runar kumba nga la tharai. <sup>19</sup>Ki jingkyntoh ki long beit tang shaphang ka niam jong ki hi bad shaphang uwei u briew uba kyrnteng U Jisu, uba la iap hynrei ia uba u Paul u iai ialap ba u dang im. <sup>20</sup>Nga la dum ka buit ka stad kumno ngan leh bad kane ka kam. Nga la kylli ruh ia u Paul, ‘Hato me kwah ban leit sha Jerusalem ban ioh bishar ia me hangta?’ <sup>21</sup>Hynrei u Paul u la kyrpad ban sah ha Kaisaria bad ban ap ia ka rai bakhatduh jong u Patsha. Kumta nga la pynsah ia u tad haduh ba ngan da ioh phah ia u hakhmat u Kaisar ha Rom.”

<sup>22</sup>U Agrippa u la ong ha u Phistos, “Nga ruh nga kwah ban iohsgew ia une u briew.”

U Phistos u la ong, “Lashai men sa iohsgew ia u.”

<sup>23</sup>Ynda kum lashai, u Agrippa lem bad ka Berniki, ki la wan rung sha ka kamra bishar hapdeng ka jingpdiang burom ba ishongkun bha, ba la synran ruh da ki riewpawkhmat kata ka nongbah. U Phistos u la hukum ia ki shipai ban wallam ia u Paul shapoh.

<sup>24</sup>U Phistos u la ong, “Ko Syiem Agrippa bad ma phi kiba la iadon lang hangne, phi la iohi ia une u briew. Baroh ki Jiw kiba hangne bad ha Jerusalem ki la ufor pyrshah ia u, ki da pyrta ruh ba dei ban rai pynrem ia u da ka jingiap. <sup>25</sup>Haba nga la bishar ia u, ngam shym la shem ei ei kaba u la leh kat haduh ba ka dei ia u ban iap. Hynrei u la pan ban shah bishar ha u Kaisar, kumta nga la rai ban phah ia u sha Rom. <sup>26</sup>Wat la katta ruh, ngam sngewngang kumno ban thoh sha u Kaisar kiei ki kam sniew ba une u briew u la leh. Kumta nga la wallam ia u hakhmat jong phi baroh, khamtam eh hakhmat jong me, ko Syiem Agrippa khnang ba men ioh kylli ei ei na u ba ngan lah ban thoh sha u Kaisar. <sup>27</sup>Namar kan long bieit ia ngi ban phah ia u koidi sha u Kaisar khlem ki jingkyntoh kiba shongnia.”

### U Paul Hakhmat U Syiem Agrippa

**26** <sup>1</sup>U Agrippa u la ong ia u Paul, “To kren mynta ban iada ialade.” U Paul haba u la kaweh ia la ki kti u la sdang ban kren. <sup>2</sup>U la ong, “Ko Syiem Agrippa, ka long ka kabu bakhrav ia nga ban ieng hakhmat jong me ha kane ka sngi bad ban jubab ia baroh ki jingmudui jong ki Jiw pyrshah ia nga. <sup>3</sup>Nga sngewkmen eh ban iathuh sha me, namar me hi ruh me tip bha ia ki niam ki rukom jong ki Jiw bad kita ki jingiasaid

jong ki. Te nga kyrpad ia me to sngap shah slem ia nga.

<sup>4</sup>“Baroh ki Jiw ki tip bha shaphang ka jingim jong nga naduh basdang, kumno nga la im ha la shnong bad hadien kata ha Jerusalem. <sup>5</sup>Kine ki Jiw ki la ithuh ia nga naduh kaba mynnyngkong. Lada ki mon, kin jin da la iathuh ruh ba nga dei u Pharisi uba bha. Kum u Pharisi nga tip khambha ban bud pyrkhing ia ka niam Jiw ban ia kiwei pat. <sup>6</sup>Nga ngeit ba mynta ruh nga shah bishar dei namar ba nga kyrmen ia ka jingkular kaba U Blei u la pynlong bad ki kpa tymmen jong ngi. <sup>7</sup>Kane ka jingkular kaba baroh ki khatar jait ki Israel ki kyrmen ban iohpdiang. Bad namar kane ka jingkyrmen ki Jiw ki shakri ia U Blei miet la bad sngi. Ko Syiem, dei shaphang kane ka jingkyrmen ruh ba ki Jiw ki tian bishar pyrshah ia nga. <sup>8</sup>Balei ki briew ki pyrkhata ba kam lah long ba U Blei u lah ban pynmihpat ia ki briew na ka jingiap?

<sup>9</sup>“Nga la ju pyrkhata ban leh da kaba tynggeh pyrshah ia U Jisu uba na Nasaret. <sup>10</sup>Nga la sdang ruh na Jerusalem. Ki rangbah lyngdoh ki la pynkupbor ia nga ba ngan set byndi ia ki briew jong U Blei bad haba la pyniap ia ki, nga da iamynjur bha bad kata. <sup>11</sup>Nga ju leit rung sha ki synagog ban pynshitom ia ki bad pyrshor ruh ia ki ban len noh ia U Jisu. Haduh katta nga da sngew bitar ia ki, nga da leit khnang sha kiwei pat ki nongbah ban thwet bad pynshitom ia ki.

### U Paul U Iathuh Kumno U Iashem Bad U Jisu

<sup>12</sup>“Da kane ka jingthmu ki rangbah lyngdoh ki la ai jingbit bad pynkupbor ia nga ban leit sha Damaskos. <sup>13</sup>Ha ka lynti shata, ha ka por shiteng sngi, nga la iohi ia ka jingtyngshain kaba kham palat ban ia ka sngi. Ka la long sawdong ia nga lem bad kita kiba bad nga. <sup>14</sup>Ngi la kyllon khram ha madan. Hadien kata nga la iohsngew ia ka sur kren ha ka ktien Hebru, ka da ong, ‘Saul Saul, balei me pynshitom bein ia nga? Balei me pynmysaw ialade da kaba ialeh pyrshah ia nga.’

<sup>15</sup>“Nga la ong, ‘Me dei u ei, ah Trai?’

“U Trai u la ong, ‘Nga dei U Jisu, ia uba me pynshitom bein. <sup>16</sup>Ieng joit mynta! Nga la jied ia me ban long u shakri jong nga. Naba men leit iathuh ia ki briew shaphang jong nga ia kaei kaba me la iohi mynta bad ia kita kiei kiba ngan sa pyni ha me, na kata ka daw nga la wan sha me. <sup>17</sup>Ngan ri pynim ia me na ka kti ki Jiw bad na ka kti

ki Jentil ruh de haba ngan sa phah noh ia me hapdeng jong ki. <sup>18</sup>Men pynpeit noh ia ki khmat jong ki ba kin tip ia ka jingshisha, ba kin ioh phai noh na ka jingdung sha ka jingshai, na ka bor u Soitan sha U Blei, khnang ba yn ioh mab noh ia ki pop jong ki bad kin iohbynta lem bad u paitlang U Blei, kita kein ia kiba la ioh pynkhuid da kata ka jingngeit jong ki ha nga.’”

### U Paul U Iathuh Ia Ki Jingtrei Jong U

<sup>19</sup>U Paul u la nga ian bieteng ban kren: “Ko Syiem Agrippa, hadien ba nga la ioh ia kane ka jingithupaw na bneng, nga la kohnguh ban leh ia kata. <sup>20</sup>Nga la iathuh sha ki briew ba kin kylla kaba mut bad phai khmat noh sha U Blei. Nga la hikai ruh ia ki ban im kum ki jingthaw ba thymmai. Nga la leit nyngkong sha Damaskos, hadien kata nga la leit sha Jerusalem bad ki bynta jong ka Judia ban ialap sha ki. Nga la leit ruh sha ki Jentil.

<sup>21</sup>“Na kata ka daw ki Jiw ki la kem ia nga bad thmu pyniap noh ruh ia nga ha ka Templ. <sup>22</sup>Hynrei U Blei u la iarap ia nga bad haduh mynta ka sngi ruh u dang iarap ia nga. Kumjuh ha kane ka sngi U Blei u la iarap ia nga ba ngan ieng hangne bad iathuh ha baroh ia kaei kaba nga la iohi. Bad ngam shym la kren ia kaei kaei kaba khyllah, hynrei tang ia kata kaba u Moses bad ki nongiathuhlypa ki la kren ba kan jia. <sup>23</sup>Ki da iathuh ba ka dei ia U Mesaiah ban iap bad ban long uba nyngkong eh ban mihpat na kiba iap. Ki da ong ruh, ba un wallam ia ka jingshai jong ka jingpynim ei U Blei sha ki jiw bad sha ki Jentil.”

### U Paul U Pyrshang Ban Pynkohnguh Ia U Agrippa

<sup>24</sup>Katba u Paul u dang iasaid da ialade kumta, u Phistos u la kem ktien, “Paul, me la khleh bieit! Ka jingbung ka jingtip jong me ka la pynlamwir ia me.”

<sup>25</sup>U Paul u la ong, “Ko Phistos ba donburom, ngam shym kren lamwir. Nga la iathuh tang ia kaba shisha bad kaba don jingmut. <sup>26</sup>U Syiem Agrippa u tip bha shaphang kane bad nga lah ban kren laitluid hakhmat jong u. Nga tip ba u la iohsngew shaphang kine kiei kiei, namar ki la jia ha kaba paw. <sup>27</sup>Ko Syiem Agrippa, hato me ngeit ia kaba la thoh da ki nongiathuhlypa? Nga tip me ngeit!”

<sup>28</sup>U Syiem Agrippa u la phai ktien sha u Paul, “Hato me pyrkhata ba me lah ban pynngeit ia nga da kaba suk ban long ‘u nongbud ia U Khrist?’”

<sup>29</sup>U Paul u la ong, “Kam shong la ka suk ne ka eh. Hynrei nga duwai ha U Blei ym tang ia me hynrei ia kita baroh kiba iohsngew ia nga ha kane ka sngi ba kin iohlait im bad ban long kum ma nga hi, lait noh na kine ki kynjri!”

<sup>30</sup>Hadien kata u Syiem Agrippa, u Lat Phistos, ka Berniki bad baroh kiba don hangta haba ki la ieng joit <sup>31</sup>ki la mih noh na kata ka kamra. Ki da iakren paralok hi, ki la ong, “Une u brieve um shym la leh kano kano kaba sniew kat ban rai pynrem ne set byndi ia u.” <sup>32</sup>Bad u Agrippa u la ong ha u Phistos, “Ngi lah ban pyllait noh ia u mynta, hynrei u la dep pan ban iakynduh ia u Kaisar.”

### U Paul U La Leit Da Ka Lieng Sha Rom

**27** <sup>1</sup>Te kumba la rai, ngi la leit da ka lieng sha Italy. Te la buh ia u Julios u rangbah shipai uba la shakri ha ka kynhun shipai bakyrpang u patsha ban pahara ia u Paul lem bad ia kiwei de ki koidi ha kata ka jingleit. <sup>2</sup>Ynda ngi la kiew ha ka lieng na Adramyttion ngi la mih ban leit lyngba ki shong bapher kiba ha Asia. U Aristarkhos, uba na Thessaloni ha Mekadonia ruh u la leit lem bad ngi.

<sup>3</sup>Ha ka sngi kaba bud ngi la poi ha nongbah Sidon. U Julios u la leh bha ia u Paul, u la ailad ruh ia u ban leit jngoh ia la ki para hangta kiba la pynbiang ruh kat kaba u donkam. <sup>4</sup>Ynda ngi la mih noh na kata ka nongbah, ngi la iaid najan ka Kypros namar ka jingjur palat ka lyer kaba la beh pyrshah ia ngi. <sup>5</sup>Ngi la leit lyngba ka duriaw najan Kilikia bad Pamphilia, te ngi la iapoi sha nongbah Maira kaba ha Lykia. <sup>6</sup>Hangta u rangbah shipai u la shem ia ka lieng ka ban mih na Aleksandria ban leit sha Itali. Kumta u la pynkiew ia ngi ha kata ka lieng.

<sup>7</sup>Te ha kata ka jingiaid lynti kaba suki jai bad kaba la bam bun sngi, da kaba eh ngi la poi ha Knidos namar ka lyer ka la beh pyrshah ia ngi. Ngim shym la la lah ban iaid jngai nangta, kumta ngi la phai noh shaphang shathie jong ka Krit hajan Salmoni. <sup>8</sup>Da kaba eh bha ngi la iaid narud jong ka bad poi haduh kata ka jaka rieh lieng hajan ka nongbah Lasia ia kaba la khot, ka Kad lieng ba shngaii.

<sup>9</sup>Te kaba bun ka por ka la sepei bad ka jingleit ruh ka long kaba ma namar ka la lah long lypa hadien ka sngi ka jingshahjingit ki Jiwi. Kumta u Paul u la maham ia ki, <sup>10</sup>“Ko rangbah, nga la iohi lypa ia ki jingeh ha kane ka jingiaid lynti jong ngi. Ngi lah ban duh noh ia ka lieng,

ia kiei kiei kiba ha ka, wat ia ka jingim jong ngi hi ruh!” <sup>11</sup>Hynrei u kaptan bad u trai jong kata ka lieng kim shym la shahshkor ia u Paul. Kumta uta u rangbah shipai ruh u la kham kohnguh ia kita ban ia kaba u ngeit ia u Paul. <sup>12</sup>Namar ba kata ka kad lieng ruh kam long kaba biang ban rieh ha ka por tlang. Kumta bun ki la ai jingmut ban mih noh nangta. Da ka jingkyrmen ban poi ha Phoiniks bad ban rieh tlang hangta. Ka Phoiniks ka dei ka dewlynnong jong ka Krit kaba phai shathie lam sepngi bad shatei lam sepngi.

### Ka 'Eriong 'Erngit

<sup>13</sup>Ka lyer kaba jem na shathie ka la sdang ban beh bad ki brieve ha kata ka lieng ki la pyrkhath, “Ngi la ioh ia ka jingbeh ka lyer kumba ngi kwah!” Kumta ki la tan noh ia ki proh lieng bad ngi la iaid katba lah markhap ka rud duriaw Krit. <sup>14</sup>Hynrei ka lyer bajur ba la khot “Er lam mihngi” ka la beh na ka dewlynnong. <sup>15</sup>Ka lyer ka la beh pyrshah ia ka lieng bad ka la rong noh ia ka bad haba ngim lah shuh ban pynphai ia ka, ngi la shu ieh bad ailad kat shaba kit ka lyer.

<sup>16</sup>Ngi la leit narum iwei i dewlynnong rit ba la khot Klauda. Bad da ka jingiaida ita i dewlynnong rit na ka lyer, da ka said ngi la lah ban shim ia ki lieng rit. <sup>17</sup>Hadien ba ki la wallam ia kita ki liengrit, ki la teh pyrkhong bha ia kata ka lieng bah baroh sawdong da ki tyllai namar kita ki brieve ki da sheptieng ioh ba kan leit tur ha u shiyap Sartis. Kumta ki la pynhiar ia ki lama bad ailad ia ka lieng kat shaba kit ka lyer.

<sup>18</sup>Te ha ka sngi kaba bud, ka lyer kaba jur ka la sdang ban beh, haduh ba ki la bret noh katto katne ki tiar na kata ka lieng. <sup>19</sup>Ha ka sngi kaba bud ki la bret sa ki tiar jong kata ka lieng. <sup>20</sup>La bun sngi ngim iohi shuh ia ka sngi lymne ki khlor. Namar ka jingjur palat ka lyer, ngi la duh jingkyrmen ruh wat ban dang laim.

<sup>21</sup>Hadien bun sngi ba kita ki brieve ki la sah khlem bam. U Paul u la ieng bad kren hapdeng jong ki, u da ong, “Ko rangbah, ba phin jin da la sngap ia nga ban ym mih na Krit, ngin ym iakynduh kat kine ki jingeh bad jingduhnong. <sup>22</sup>Mynta ruh nga don ban ong, wat khuslai, iwei ruh na phi in ym iap noh, hynrei ngin duh tang ia kane ka lieng. <sup>23</sup>Mynnin mynmiet u angel jong U Blei ia uba nga mane, u la mih paw ha nga. <sup>24</sup>U la ong, ‘Paul, wat sngew sheptieng! Namar ka dei ia me ban ieng hakhmat u Kaisar. Bad U Blei u la kular

ban ri pynim ia kita baroh kiba bad me.<sup>25</sup>Kumta ko rangbah, ym don ei ei ban sngew sheptieng. Nga shaniah ha U Blei bad nga da sngewskhem ruh ba kata baroh kan sa jia kumba u angel u la iathuh ha nga.<sup>26</sup>Hynrei ngin sa shah kyndat sha ka dewlynnong.”

<sup>27</sup>Ka la long te ha ka miet kaba khatsaw ba la kynting ia ngi da ka lyer ha ka duriaw Adria. Ki maji ki dang tharai ba ngi la jan poi ryngkew.<sup>28</sup>Ynda ki la pynngam ia ki tyllai ba la teh sisa, ki shem ba ka jingjylliew ka long kumba shispah arphew phut ei ei. Ki la leit kham sha khmat bad thew biang, te ka la long khyndaiphew phut.<sup>29</sup>Ki maji ki la sheptieng ioh ba kumno re kumno ngin tyngkhuh mawsiang, kumta ki la pynhap saw tyllai ki proh lieng. Te ki la ia duwai ba kan mih noh ka sngi.<sup>30</sup>Te ki maji ki la pyrshang ban phet noh na kata ka lieng, haba ki la pynhiar ia ki lieng rit da ki tyllai ki la leh mynleh kum ban leit teh bha ia kita ki proh na sha khmat jong ka lieng.<sup>31</sup>Hynrei u Paul u la ong ha u rangbah shipai bad ha kita kiwei pat ki shipai, “Lada kine ki maji kim sah ha kane ka lieng, phin ym iohlait im.”<sup>32</sup>Kumta kita ki shipai ki la ot noh ia ki tyllai bad pynhap ia kita ki liengrit shapoh um.

<sup>33</sup>Ha shuwa ia kan sa shai byrngut, u Paul u la kyrpad ia kata ki briew baroh ban bam jingbam. U la ong, “La palat artaiew ba phi la shu iai ap. Phi khlem bam ei ei haduh jin khatsaw sngi.<sup>34</sup>Nga kyrpad ia phi mynta to iabam khyndiat khnang ba phin im. Namar iwei ruh i shñiuh in ym hap noh na ka khlieh jong phi.”<sup>35</sup>Hadien ba u la kren ia kane, u Paul u la shim ia u kpu u la ainguh ia U Blei hakhmat jong ki baroh bad haba u la kdiah u la sam sha uwei-pa-uwei.<sup>36</sup>Kumta haba ki la sngewtngen na ki kyntien u Paul, ki la iabam lang baroh.<sup>37</sup>La don baroh kumba arspah hynñiewphew hynriew ngut ki briew ha kata ka lieng.<sup>38</sup>Ynda ngi la bam kdang, ngi la bret noh ruh ia u kew ba sah sha duriaw khnang ban kham pynsting ia ka lieng.

### Ka Jingpaitlieng

<sup>39</sup>Haba la shai ka bneng, ki maji kim shym la ithuh ia ka jaka, hynrei ki la iohi ia ki kyndong um bad u shyiap kumta ki la pyrshang katba lah ban pynñiad ia ka lieng nangta narud duriaw.<sup>40</sup>Kumta ki la ot noh ia baroh ki proh lieng bad iehnoh sha duriaw. Ha kajah ka por ruh ki la law ia ki tyllai kiba teh ia ki boitha. Nangta pat ki

la kyntiew ia ka lama khnang ba ka lyer kan kynting ia ka lieng shaphang ryngkew.<sup>41</sup>Hynrei ka lieng ka la tyngkhuh ia ka 'dewshyiap bad ka khmut jong ka lieng ka la sahkut hangta khlem khiih shuh. Te la pynpait lyngkhot lyngkhai ia ka tdong jong ka lieng da ki jingatphyllung bajur.

<sup>42</sup>Ki shipai ki la mut ban pynñiap noh ia ki koidi baroh khnang ba kin ym iohlait phet na kti jong ki.<sup>43</sup>Hynrei u Julios u rangbah shipai u da kwah eh ban ri pynim ia u Paul. Um shah ia kita ki shipai ban pynñiap noh ia ki koidi. U la ong ia kita kiba nang ban jngi ban ryngkoh bad jngi sha ryngkew.<sup>44</sup>Kiwei pat da kaba pynndonkam ia ki lyngkhot dieng jong kata ka lieng. Da kaba leh kumne ngi la lait im bad poi ryngkew lang baroh.

### U Paul Ha Ka Dewlynnong Malta

**28**<sup>1</sup>Ynda ngi la ia poi ha ryngkew, ngi la tip ba kata ka dei ka dewlynnong Malta.<sup>2</sup>Ki trai shnong hangta ki la leh sbun ia ngi. Te ka la jur slap bad khriat bha, kumta ki la sliew ding bad khot sngewbha ia ngi ruh ban syaid ding.<sup>3</sup>U Paul ruh u la lum ia ki diengiap ban thang ha ka ding. Namar ka jingkhluit u 'seiñ bih u la mih na khap kita ki dieng bad puh ia ka kti u Paul.<sup>4</sup>Ki briew jong kata ka shnong haba ki la iohi ia u bseiñ ba u da kyllaiñ ia ka kti jong u Paul, ki la ong, “Khlem pep une u dei u nongpynñiap briew! Ka kput kylliang kam shym la pylait ia u wat haba u la lait im na ka duriaw ruh.”<sup>5</sup>Hynrei haba u Paul u la kynther noh ia uta u bsein ha ka ding, ym shym la pynmynsaw ei ei ia u.<sup>6</sup>Te kita ki briew ki la khmih lynti ba kan sieb bad un kyllon iap ha madan. Ynda ki la iai ap kham slem bad haba kam shym la jia ei ei kaba sniew ia u ki la pyrkhath noh da kamwei. Ki la ong, “U long u blei!”

<sup>7</sup>Te hajan hangta la don ki lyngkha ba la long trai da uwei u riewpawkhmat jong ka hima Rom ha kata ka dewlynnong, uba kyrting u Publios. Une u la pdiang sngewbha ia ngi sha ka iing jong u bad u la leh bha ruh ia ngi. Bad ngi la sah ha kata ka iing jong u kumba lai sngi.<sup>8</sup>Te u kpa jong u Publios u la shitom eh namar ka khieshoh bad ka suhot, hynrei haba u Paul u la leit ban duwai ia u, u la buh ia la ki kti ha u bad la pynkhiah noh ruh ia u.<sup>9</sup>Hadien kane ka jingjia, baroh kiba pang ha kata ka dewlynnong ki la wan sha u Paul, Te u la pynkhiah ia ki ruh.

<sup>10-11</sup>Haba ngi la sah hangta lai bnai, ki briew jong kata ka shnong ki la leh burom

shikatdei eh ia ngi. Bad haba ngi la khreh ban mih noh, ki la ai lut kat kaba ngi donkam ha kata ka jingleit lynti jong ngi.

### U Paul U Leit Rung Sha Rom

Te ngi la kiew ha kata ka lieng kaba na Aleksandria, kaba la rieh tlang ha kata ka dewlynnong Malta. Ha khmut jong kata ka lieng ka la don ka shap jong ki 'lei synrap. <sup>12</sup>Ngi la wan poi ha ka nongbah Surakus. Ynda ngi la sah hangta lai sngi, ngi la mih noh pat. <sup>13</sup>Ngi la poi sa sha Rhejiom. Ha ka sngi kaba bud, namar ba ka Iyer ka la beh na shaphang shathie jong ka sepngi ngi la iohlad ban mih bad hadien shisngi ngi la poi ha ka nongbah Putioli. <sup>14</sup>Te hangta ngi la iashem ia ki parabangeit, kiba la kyrpad ia ngi ban sah bad ki shitaiew. Khatduh eh ngi la poi ha Rom. <sup>15</sup>Te ki parabangeit ha Rom haba ki la iohsngew shaphang jong ngi ki la wan iakynduh ia ngi haduh ka jaka iew u Appios bad ha ki Lai iing basa. Haba u Paul u la iohi ia kine ki parabangeit u la ainguh ia U Blei bad la pyntngen ia u.

### U Paul Ha Rom

<sup>16</sup>Haba ngi la poi ha Rom, la shah ia u Paul ban shong kyrpang marwei. Hynrei hapoh ka jingap phira u shipai.

<sup>17</sup>Te hadien lai sngi u Paul u la khot katto katne na ki riewpawkhmat ki Jiw. Haba ki la iapoi lang baroh, u la ong, "Ko para, wat la ngam shym leh kano kano kaba ia pyrshah bad ki brieve jong ngi lymne ia ki dustur pateng ki kpa tymmen jong ngi, hynrei la khum ia nga ha Jerusalem bad la aiti noh ia nga ha ki nong Rom. <sup>18</sup>Kine ki la tohkit ia nga, haba kim shem daw ei ei kaba nga dei ban iap ki la kwah ban pyllait noh ia nga. <sup>19</sup>Hynrei namar ba ki Jiw kim kwah ia kata. Kumta ngam banse ban kyrpad ban wan sha Rom khnang ban ioh ia ka jingbishar kaba hok na u Kaisar. Hynrei kam mut pat ba ngan mudui pyrshah ia la ki brieve ba ki leh bymdei ia nga. <sup>20</sup>Namar kata ka daw nga la kwah ban iakynduh ia phi bad iakren bad phi. La teh ia nga da une u kynjri namar nga ngeit ha kata ka jingkyrmen u Israel."

<sup>21</sup>Ki Jiw ki la jubab ia u Paul, "Ngim shym la iohpdang shithi ei ei na Judia shaphang jong me. Kumjuh ruh ki Jiw kiba la wan nangta kim shym la wanrah khubor ei ei ha ngi shaphang jong me. <sup>22</sup>Ngi kwah mynta ban iohsngew na me, balei ki brieve

na kylleng ki kren pyrshah ia kane ka kynhun jong me."

<sup>23</sup>Kumta u Paul lem bad kita ki Jiw ki la pynbeit ia ka sngi bakyrpang na ka bynta ka jingiakynduh. Te ha kata ka sngi ba la iakut kiwei ruh ki Jiw ki la iawan lang ha ka iing sah u Paul. Te baroh shisngi u la kren sha ki, da kaba iathuh shaphang ka hima U Blei. U da pynshai na ki hukum u Moses bad na ki jingthoh jong ki nongiathuhlypa ban pynkohnguh ia ki ban ngeit ha U Jisu. <sup>24</sup>Te la don napdeng kita ki Jiw kiba la ngeit ia kaei kaba u la ong, hynrei katba kiwei pat kim shym la ngeit. <sup>25</sup>Ki la sdang ban iasaid nia hapdeng para ma ki bad ki da mih noh ruh nangta. Hynrei u Paul u la ong shuh shuh sha ki: "U Mynsiem Bakhuid u la kren ia kaba shisha sha ki kpa tymmen jong phi lyngba u nongiathuhlypa Isaiah. U da ong,

<sup>26</sup> 'Khie leit ong ha une u paitlang:

Phin shahshkor bad iohsngew,  
hynrei phin ym sngewthuh.

Phin peit bad phin iohi,

hynrei phin ym shemphang ia kaba phi iohi.

<sup>27</sup> Shisha, la khang noh ia ka

jingshemphang na une u paitlang.

Wat haba ki don ia ki shkor hynrei kim iohsngew.

Ki don ia ki khmat, hynrei ki la kyntait ban iohi.

Lada kim shym la khang noh ia la ka jingshemphang jong ki,

ki lah ban iohi da la ki khmat;

ki lah ban iohsngew da la ki shkor;  
ki lah ban shemphang ruh da la ki jingmut.

Te ki lah ban wan phai khmat sha nga, ba yn ioh pynkhiah ia ki.'

*Isaiah 6:9-10*

<sup>28</sup>"Nga kwah ia phi ki Jiw ban tip ba U Blei u la pah ia ka jingpynim jong u sha ki Jentil. Te kin shahshkor ia ka!" <sup>29</sup>Hadien ba u la kren ia kane, ki Jiw te ki la ia mih noh bad ki da iakren khñium para ma ki.

<sup>30</sup>Te u Paul u la sah ar snem pura ha kata ka iing wai. U da pdiang sngewbha ruh ia kat kiba wan ban iashem bad u. <sup>31</sup>Da ka jingshlur bad khlem jingpynwit ei ei u da ialap ha ki shaphang ka hima U Blei bad iathuh ruh ha ki shaphang U Jisu Khrist.